

獨醒從古笑靈均。長醉如今數伯倫。舊法依稀傳自杜。康新方要妙得於陳。

陳郎中帖傳此法。井泉王相資重丸。麴蘖精靈用上寅。麴用七月上寅。水用九月九日。釀糯豈勞炊范黍。

撇筍何假漉陶巾。常嫌竹葉猶凡濁。始覺榴花不正真。甕揭開時香酷烈。

餅封貯後味甘辛。捧疑明水從空化。飲似陽和滿腹春。色洞玉壺無表裏。

光搖金盞有精神。能銷忙事成閒事。轉得愛人作樂人。應是世閒賢聖物。

與君還往擬終身。

池鶴二首

高竹籠前無伴侶。亂雞羣裏有風標。低頭乍恐丹砂落。晒翅常疑白雪消。

轉覺鷓鴣毛色下。苦嫌鸚鵡語聲嬌。臨風一嘆思何事。悵望青田雲水遙。

【一】

池中此鶴鶴中稀。恐是遼東老令威。帶雪松枝翹膝脛。放花菱片綴毛衣。

低迴且向林閒宿。奮迅終須天外飛。若問故巢知處在。主人相戀未能歸。

對酒五首

巧拙賢愚相是非。何如一醉盡忘機。君知天地中寬窄。鵬鷃鸞皇各自飛。

蝸牛角上爭何事。石火光中寄此身。隨富隨貧且歡樂。不開口笑是癡人。

【二】

丹砂見火去無迹。白髮泥人來不休。賴有酒仙相暖熱。松喬醉即到前頭。

百歲無多時壯健。一春能幾日清明。相逢且莫推辭醉。聽唱陽關第四聲。

【四】

第四聲。勸君更勸一杯酒。西出陽關無故人。

【五】

昨日低眉問疾來。今朝收淚弔人回。眼前流例君看取。且遣琵琶送一杯。

僧院花

欲悟色空爲佛事。故栽芳樹在僧家。細看便是華嚴偈。方便風開智慧花。

老戒

我有白頭戒。聞於韓侍郎。老多憂活計。病更戀班行。鬢鏤誇身健。周遮說話長。

不知吾免否。兩鬢已成霜。

戊申歲暮詠懷三首

窮冬月末兩三日。半百年過六七時。龍尾趁朝無氣力。牛頭參道有心期。

榮華外物終須悟。老病傍人豈得知。猶被妻兒教漸退。莫求致仕且分司。

【一】

唯生一女才十二。祇欠三年未六旬。婚嫁累輕何怕老。飢寒心慣不憂貧。紫泥丹筆皆經手。赤紱金章盡到身。更擬踟躕覓何事。不歸嵩洛作閒人。

【三】

七年囚閉作籠禽。但願開籠便入林。幸得展張今日翅。不能辜負昔時心。人閒禍福愚難料。世上風波老不禁。萬一差池似前事。又應追悔不抽簪。

贈夢得

心中萬事不思量。坐倚屏風臥向陽。漸覺詠詩猶老醜。豈宜憑酒更粗狂。頭垂白髮我思退。脚蹋青雲君欲忙。只有今春相伴在。花前賸醉兩三場。

想東遊五十韻并序

太和三年春。予病免官後。憶遊浙右數郡。兼思到越一訪微之。故兩浙之間。一物已上。想皆在目。吟且成篇。不能自休。盈五百字。亦猶孫興公想天台山而賦之也。

海內時無事。江南歲有秋。生民皆樂業。地主盡賢侯。郊靜銷戎馬。城高逼斗牛。平河七百里。沃壤二三州。坐有湖山趣。行無風浪憂。食寧妨解纜。寢不廢乘流。泉石諧天竺。煙霞識虎邱。餘芳認蘭澤。遺詠思蘋洲。茵紅塗粉。菰蒲綠潑油。鱗一作鱗差漁戶舍。綺錯稻田溝。紫洞藏仙窟。玄泉貯怪湫。精神昂老鶴。姿彩媚潛蚪。

靜閱天工妙。閒窺物狀幽。投竿出比目。擲果下彌猴。味苦蓮心小。漿甜蔗節稠。橘苞從自結。藕孔是誰鏤。逐日移潮信。隨風變櫂謳。遞夫交烈火。候吏次鳴騶。梵塢形疑踊。閭門勢欲浮。客迎攜酒榼。僧待置茶甌。小宴閑談笑。初筵雅獻酬。稍催朱蠟炬。徐動碧牙籌。圓盞飛蓮子。長裾曳石榴。柘枝隨畫鼓。調笑從香毬。幕颺雲飄檻。簾褰月露鉤。舞繁紅袖凝。歌切翠眉愁。絃管寧容歇。杯盤未許收。良辰宜酌酎。卒歲好優遊。膾縷鮮仍細。尊絲滑且柔。飽餐爲日計。穩睡是身謀。名媿空虛得。官知止足休。自嫌猶屑屑。衆笑太悠悠。物表疎形役。人寰足悔尤。蛾須遠燈燭。兔勿近置罟。幻世春來夢。浮生水上漚。百憂中莫入。一醉外何求。未死癡王湛。無兒老鄧攸。蜀琴安膝上。周易在牀頭。去去無程客。行行不繫舟。勞君頻問訊。勸我少淹留。雲雨多分散。關山苦阻修。一吟江月別。七見日星周。珠玉傳新什。鸞鸞念故儔。懸旌心宛轉。束楚意綢繆。驛舫裝青雀。官槽秣紫驪。鏡湖期遠泛。禹穴約冥搜。預掃題詩壁。先開望海樓。飲思親履舄。宿憶竝衾綯。志氣吾衰也。風情子在不。應須相見後。別作一家遊。

病免後喜除賓客

臥在漳濱滿十旬。起爲商皓伴三人。從今且莫嫌身病。不病何由索得身。

長樂亭別

灞漣風煙函谷路。曾經幾度別長安。昔時蹙促爲遷客。今日從容自去官。
優詔幸分四皓秩。祖筵慙繼二疏歡。塵纓世網重重縛。迴顧方知出得難。

陝府王大夫相迎偶贈

紫微閣老自多情。白首園公豈要迎。伴我綠槐陰下歇。向君紅旆影前行。
綸巾髮少渾敲仄。籃輦肩齊甚穩平。但問主人畱幾日。分司賓客去無程。

別陝州王司馬

笙歌惆悵欲爲別。風景闌珊初過春。爭得遣君詩不苦。黃河岸上白頭人。

將至東都先寄令狐畱守

黃鳥無聲葉滿枝。閒吟想到洛城時。惜逢金谷三春盡。恨拜銅樓一月遲。
詩境忽來還自得。醉鄉潛去與誰期。東都添箇狂賓客。先報壺觴風月知。

答崔十八見寄

明朝欲見琴樽伴。洗拭金杯拂玉徽。君乞曹州刺史替。我拋刑部侍郎歸。
倚瘡老馬收蹄立。避箭高鴻盡翅飛。豈料洛陽風月夜。故人垂老得相依。

贈皇甫賓客

輕衣穩馬槐陰路。漸近東來漸少塵。耳聞久憎聞俗事。眼明初喜見閒人。
昔曾對作承華相。今復連爲博望賓。始信淡交宜久遠。與君轉老轉相親。

歸履道宅

驛吏引藤輦。家童開竹扉。往時多暫住。今日是長歸。眼下有衣食。耳邊無是非。
不論貧與富。飲水亦應肥。

問江南物

歸來未及問生涯。先問江南物在耶。引手摩挲青石笋。迴頭點檢白蓮花。
蘇州舫故龍頭闌。王尹橋傾鴈齒斜。別有夜深惆悵事。月明雙鶴在裴家。

蕭庶子相過

半日停車馬。何人在白家。慇懃蕭庶子。愛酒不嫌茶。

答尉遲少尹問所須

乍到頻勞問所須。所須非玉亦非珠。愛君水閣宜閒詠。每有詩成許去無。

詠閒

但有閒銷日。都無事繫懷。朝眠因客起。午飯伴僧齋。樹合陰交戶。池分水夾階。
就中今夜好。風月似江淮。

同崔十八寄元浙東王陝州

未能同隱雲林下。且復相招祿仕閒。隨月有錢勝賣藥。終年無事抵歸山。
鏡湖水遠何由泛。棠樹枝高不易攀。惆悵八科殘四在。兩人榮鬧兩人閒。

答蘇庶子月夜聞家僮奏樂見贈

牆西明月水東亭。一曲霓裳按小伶。不敢邀君無別意。絃生管澀未堪聽。

偶吟

里巷多通水。林園盡不扃。松身為外戶。池面是中庭。元氏詩三帙。陳家酒一瓶。
醉來狂發詠。隣女映籬聽。

白蓮池汎舟

白藕新花照水開。紅窓小舫信風迴。誰教一片江南興。逐我慙慙萬里來。

池上卽事

行尋磴石引新泉。坐看修橋補釣船。綠竹挂衣涼處歇。清風展箆困時眠。
身閒當貴真天爵。官散無憂卽地仙。林下水邊無厭日。便堪終老豈論年。

酬裴相公見寄二絕

習靜心方泰。勞生事漸稀。可憐安穩地。捨此欲何歸。

【二】

一雙垂翅鶴。數首解嘲文。物是迂閒物。爭堪伴相君。

答夢得聞蟬見寄

開緘思浩然。獨詠晚風前。人貌非前日。蟬聲似去年。槐花新雨後。柳影欲秋天。
聽罷無他計。相思又一篇。

令狐尙書許過弊居先贈長句

不矜軒冕愛林泉。許到池頭一醉眠。已遣平治行藥逕。兼教掃拂釣魚船。
應將筆硯隨詩主。定有笙歌伴酒仙。祇候高情無別物。蒼苔石笋白花蓮。

自題

老宜官冷靜。貧賴俸優饒。熱月無堆案。寒天不趁朝。傍看應寂寞。自覺甚逍遙。
徒對盈樽酒。兼無愁可銷。

答崔十八

勞將白叟比黃公。今古由來事不同。我有商山君未見。清泉白石在曾中。

偶詠

禦熱蕉衣健。扶羸竹杖輕。誦經凭檻立。散藥遶廊行。暝樞無風落。秋蟲欲雨鳴。

身閒當將息。病亦有心情。

答蘇六

但喜暑隨三伏去。

不知秋送二毛來。

更無別計相寬慰。

故遣陽關勸一杯。

秋遊

下馬閒行伊水頭。

涼風清景勝春遊。

何事古今

句裏

不多說著洛陽秋。

偶作

張翰一杯酒。榮期三樂歌。

聰明傷混沌。

煩惱汗頭陀。

簞冷秋生早。

堦閒日上多。

近來門更靜。無雀可張羅。

遊平泉贈晦叔

照水容雖老。登山力未衰。

欲眠先命酒。

暫歇亦吟詩。

且喜身無縛。終慙鬢有絲。

迴頭語閒伴。閒校十年遲。

不出門

不出門來又數句。

將何銷日與誰親。

鶴籠開處見君子。

書卷展時逢古人。

自靜其心延壽命。

無求於物長精神。

能行便是真修道。

何必降魔調伏身。

歎鶴病

右翅低垂左脛傷。

可憐風貌甚昂藏。

亦知白日青天好。

未要高飛且養瘡。

臨都驛送崔十八

勿言臨都五六里。

扶病出城相送來。

莫道長安一步地。

馬頭西去幾時迴。

與君後會知何處。

爲我今朝盡一杯。

對鏡

三分鬢髮二分絲。

曉鏡秋容相對時。

去作忙官應太老。

退爲閒叟未全遲。

靜中得味何須道。

穩處安身更莫疑。

若使至今黃綺在。

聞吾此語亦分司。

白樂天詩後集卷十

律詩

凡一百十四首

勸酒十四首并序

予分秩東都。居多暇日。閒來輒飲。醉後輒吟。苦無詞章不成謠詠。每發一意則成一篇。凡十四篇。皆主於酒。聊以自勸。故以何處難忘酒。不如來飲酒命篇。

何處難忘酒七首

何處難忘酒。長安喜氣新。初登高第日。乍作好官人。省壁明張榜。朝衣穩稱身。此時無一盞。爭奈帝城春。

【二】

何處難忘酒。天涯話舊情。青雲俱不達。白髮遞相驚。二十年前別。三千里外行。此時無一盞。何以敘平生。

【三】

何處難忘酒。朱門羨少年。春分花發後。寒食月明前。小院迴羅綺。深房理管絃。此時無一盞。爭過豔陽天。

【四】

何處難忘酒。霜庭老病翁。聞聲啼蟋蟀。乾葉落梧桐。鬢爲愁先白。顏因醉暫紅。此時無一盞。何計奈秋風。

【五】

何處難忘酒。軍功第一高。還鄉隨露布。半路授旌旄。玉柱剝蔥手。金章爛椹袍。此時無一盞。何以騁雄豪。

【六】

何處難忘酒。青門送別多。斂襟收涕淚。簇馬聽笙歌。煙樹灞陵岸。風塵長樂坡。此時無一盞。爭奈去畱何。

【七】

何處難忘酒。逐臣歸故園。赦書逢驛騎。賀客出都門。半面瘴煙色。滿衫鄉淚痕。此時無一盞。何物可招魂。

不如來飲酒七首

莫隱深山去。君應到自嫌。齒傷朝水冷。貌苦夜霜嚴。漁去風生浦。樵歸雪滿巖。不如來飲酒。相對醉厭厭。

【二】

莫作農夫去。君應見自愁。迎春犁瘦地。趁晚餽羸牛。數被官加稅。稀逢歲有秋。不如來飲酒。相伴醉悠悠。

【三】

莫作商人去。悽惶君未諳。雪霜行塞北。風水宿江南。藏鏹百千萬。沈舟十二三。不如來飲酒。仰面醉酣酣。

【四】

莫事長征去。辛勤難具論。何曾畫麟閣。祇是老轅門。蟣蝨衣中物。刀鎗面上痕。不如來飲酒。合眼醉昏昏。

【五】

莫學長生去。仙方誤殺君。那將薤上露。擬待鶴邊雲。矻矻皆燒藥。纍纍盡作墳。不如來飲酒。閒坐醉醺醺。

【六】

莫上青雲去。青雲足愛憎。自賢誇智慧。相軋鬪功能。魚爛緣吞餌。蛾焦爲撲燈。不如來飲酒。任性醉騰騰。

【七】

莫入紅塵去。令人心力勞。相爭兩蝸角。所得一牛毛。且滅嗔中火。休磨笑裏刀。不如來飲酒。穩臥醉陶陶。

洛陽春

洛陽陌上春長在。昔別今來二十年。唯覓少年心不得。其餘萬事盡依然。

恨去年

老去猶耽酒。春來不著家。去年來校晚。不見洛陽花。

早出晚歸

早起或因攜酒出。晚歸多是看花迴。若拋風景長閒坐。自問東京作底來。

魏王堤

花寒懶發鳥慵啼。信馬閒行到日西。何處未春先有思。柳條無力魏王堤。

嘗黃醕新耐憶微之

世閒好物黃醕酒。天上閒人白侍郎。愛向卯時謀洽樂。亦曾酉日放爺狂。醉來枕麴貧如富。身後堆金有若亡。元九計程殊未到。甕頭一盞共誰嘗。

觀行樂

少年信美何曾久。春日雖遲不再中。歡笑勝愁歌勝哭。請君莫道等頭空。

老慵

豈是交親向我疎。老慵自愛閉門居。近來漸喜知聞斷。免惱嵇康索報書。

酬別微之臨都驛醉後作

灋頭峽口錢塘岸。三別都經二十年。且喜筋骸俱健在。勿嫌鬢鬢各皤然。君歸北闕朝天帝。我住東京作地仙。博望自來非棄置。承明重入莫拘牽。醉收杯杓停燈語。寒展衾裯對枕眠。猶被分司官繫絆。送君不得過甘泉。

予與微之老而無子。發於言歎。著在詩篇。今年冬各有一子。戲作二什。一以相賀。一以自嘲。

常憂到老都無子。何況新生又是兒。陰德自然宜有慶。皇天可得道無知。一園水竹今爲主。百卷文章更付誰。莫慮鷓鴣無浴處。卽應重入鳳凰池。

【二】

五十八翁方有後。靜思堪喜亦堪嗟。一珠甚小還慙蚌。八子雖多不羨鴉。秋月晚生丹桂實。春風新長紫蘭芽。持杯祝願無他語。慎勿頑愚似汝爺。

自問

年來私自問。何故不歸京。佩玉腰無力。看花眼不明。老慵難發遣。春病已滋生。賴有彈琴女。時時聽一聲。

晚桃花

一樹紅桃亞拂池。竹遮松蔭晚開時。非因斜日無由見。不是閒人豈得知。寒地生材遺校易。貧家養女嫁常遲。春深欲落誰憐惜。白侍郎來折一枝。

夜調琴憶崔少卿

今夜調琴忽有情。欲彈惆悵憶崔卿。何人解愛中徽上。秋思邊頭八九聲。

阿崔

謝病臥東都。羸然一老夫。孤單同伯道。遲暮過商瞿。豈料鬢成雪。方看掌弄珠。已衰寧望有。雖晚亦勝無。蘭入前春夢。桑懸昨日弧。里閭多慶賀。親戚共歡娛。膩剃新胎髮。香紉小繡襦。玉芽開手爪。酥點點肌膚。弓冶將傳汝。琴書勿墜吾。未能知壽夭。何暇慮賢愚。乳氣初離殼。啼聲漸變鷓。何時能反哺。供養白頭烏。

贈鄰里往還

問予何故獨安然。免被飢寒婚嫁牽。骨肉都盧無十口。糧儲依約有三年。但能抖擻人閒事。更是逍遙地上仙。唯恐往還相厭賤。南家飲酒北家眠。

王子晉廟

子晉廟前山月明。人間往往夜吹笙。鸞吟鳳唱聽無拍。多似霓裳散序聲。

晚起

晚起憐春暖。歸遲愛月明。放慵長飽睡。聞健且閒行。北闕停朝簿。西方入社名。唯吟一句偈。無念是無生。

酬皇甫賓客

玄晏家風黃綺身。深居高臥養精神。性慵無病常稱病。心足雖貧不道貧。

竹院君閒銷永日。花亭我醉送殘春。自嫌詩酒猶多興。若比先生是俗人。

池上贈韋山人

新竹夾平流。新荷拂小舟。衆皆嫌好拙。誰肯伴閒遊。客爲忙多去。僧因飯暫留。獨憐韋處士。盡日共悠悠。

無夢

老眼花前闇。春衣雨後寒。舊詩多忘卻。新酒且嘗看。拙定於身穩。慵應趁伴難。漸銷名利想。無夢到長安。

對小潭寄遠上人

小潭澄見底。閒客坐開襟。借問不流水。何如無念心。彼惟清且淺。此乃寂而深。是義誰能答。明朝問道林。

閒吟二首

留司老賓客。春盡興如何。官寺行香少。僧房寄宿多。閒傾一盞酒。醉聽兩聲歌。憶得陶潛語。羲皇無以過。

【二】

閒遊來早晚。已得一週年。嵩洛供雲水。朝廷乞俸錢。長歌時獨酌。飽食後安眠。

聞道山樵發。明朝向玉泉。

獨遊玉泉寺

三月三十日

雲樹玉泉寺。肩舁半日程。更無人作伴。祇共酒同行。新葉千萬影。殘鶯三兩聲。閒遊竟未足。春盡有餘情。

晚出尋人不遇

籃輦不乘乘晚涼。相尋不遇亦無妨。輕衣穩馬槐陰下。自要閒行一兩坊。

苦熱

頭痛汗盈巾。連宵復達晨。不堪逢苦熱。猶賴是閒人。朝客應煩倦。農夫更苦辛。始慙當此日。得作自由身。

銷暑

何以銷煩暑。端居一院中。眼前無長物。窗下有清風。熱散由心靜。涼生爲室空。此時身自得。難更與人同。

行香歸

出作行香客。歸如坐夏僧。牀前雙草屨。簷下一紗燈。珮委腰無力。冠欹髮不勝。鸞臺龍尾道。合盡少年登。

同王十七庶子李六員外鄭二侍御同年四人遊龍門有感而作
 一曲悲歌酒一樽。 同年零落幾人存。 世如閱水應堪歎。 名似浮雲豈足論。
 各從祿仕休明代。 共感平生知己恩。 今日與君重上處。 龍門不是舊龍門。
 池上小宴問程秀才

洛下林園好自知。 江南景物闌相隨。 淨淘紅粒罽香飯。 薄切紫鱗烹水葵。
 雨滴篷聲青雀舫。 浪搖花影白蓮池。 停杯一問蘇州客。 何似吳松江上時。
 橋亭卯飲

卯時偶飲齋時臥。 林下高橋橋上亭。 松影過窗眠始覺。 竹風吹面醉初醒。
 就荷葉上包魚鮓。 當石渠中浸酒瓶。 生計悠悠身兀兀。 甘從妻喚作劉伶。
 舟中夜坐

潭邊霽後多清景。 橋下涼來足好風。 秋鶴一雙船一隻。 夜深相伴月明中。
 戲和微之答竇七行軍之作 依本韻

旌鉞從藁鞬。 賓僚禮數全。 夔龍來要地。 鷓鴣下遼天。 赭汗騎驕馬。 青蛾舞醉仙。
 合成江上作。 散到洛中傳。 陋巷能無酒。 貧池亦有船。 春裝秋未寄。 謾道有閒錢。
 閒忙

奔走朝行內。 棲遲林墅閒。 多因病後退。 少及健時還。 斑白霜侵鬢。 蒼黃日下山。
 閒忙俱過日。 忙校不如閒。

西風來幾日。 一葉已先飛。 新霽乘輕屐。 初涼換熟衣。 淺渠銷慢水。 疎竹漏斜暉。
 薄暮青苔巷。 家僮引鶴歸。

題西亭
 多見朱門富貴人。 林園未畢即無身。 我今幸作西亭主。 已見池塘五度春。
 觀遊魚

遶池閒步看魚遊。 正值兒童弄釣舟。 一種愛魚心各異。 我來施食爾垂鉤。
 看採蓮
 小挑閒上小蓮船。 半採紅蓮半白蓮。 不似江南惡風浪。 芙蓉池在臥牀前。

菱池如鏡淨無波。 白點花稀青角多。 時唱一聲新水調。 謾人道是採菱歌。
 天老
 早世身如風裏燭。 暮年髮似鏡中絲。 誰人斷得人閒事。 少天堪傷老又悲。

秋池

洗浪清風透水霜。

水邊閒坐一繩牀。

眼塵心垢見皆盡。

不是秋池是道場。

登天宮閣

午時乘興出。薄暮未能還。高上煙中閣。平看雪後山。委形羣動裏。任性一生閒。洛下多閒客。其中我最閒。

新雪二首

寄楊舍人

不思北省煙霄地。

不憶南宮風月天。

唯憶靜恭楊閣老。

小園新雪煖爐前。

【二】

不思朱雀街東鼓。

不憶青龍寺後鐘。

唯憶夜深新雪後。

新昌臺上七株松。

日高臥

怕寒放懶日高臥。

臨老誰言牽牽身。

夾幕繞房深似洞。

重裯襯枕暖於春。

小青衣動桃根起。

嫩綠醅浮竹葉新。

未裏頭前傾一盞。

何如衝雪趁朝人。

和微之任校書郎日過三鄉

三鄉過日君年幾。

今日君年五十餘。

不獨年催身亦變。

校書郎變作尙書。

和微之十七與君別及朧月花枝之詠

別時十七今頭白。

惱亂君心三十年。

垂老休吟花月句。

恐君更結後身緣。

和微之歎槿花

朝榮殊可惜。暮落實堪嗟。若向花中比。猶應勝眼花。

思往喜今

憶除司馬向江州。

及此凡經十五秋。

雖在簪裾從俗累。

半尋山水是閒遊。

謫居終帶鄉關思。

領郡猶分邦國憂。

爭似如今作賓客。

都無一念到心頭。

題平泉薛家雪堆莊

怪石千年應自結。

靈泉一帶是誰開。

盛爲宛轉青蛇項。

噴作玲瓏白雪堆。

赤日旱天長看雨。

玄陰臘月亦聞雷。

所嗟地去都門遠。

不得肩舁每日來。

和微之道保生三日

相看鬢似絲。始作弄璋詩。且有承家望。誰論得力時。莫興三日歎。猶勝七年遲。予老微之七年我未能忘喜。君應不合悲。嘉名稱道保。乞姓號崔兒。但恐持相竝。蒹葭瓊樹枝。

哭皇甫七郎中湜

志業過玄晏。詞華似禰衡。多才非福祿。薄命是聰明。不得入閒壽。還留身後名。涉江文一首。便可敵公卿。持正奇文甚多。涉江一章尤著。

晚起

爛熳朝眠。頻伸晚起時。煖爐生火早。寒鏡裏頭遲。融雪煎香茗。調酥煮乳糜。慵饑還自哂。快活亦誰知。酒性溫無毒。琴聲淡不悲。榮公三樂外。仍弄小男兒。

疑夢二首

莫驚寵辱虛憂喜。莫計恩讐浪苦辛。黃帝孔丘無處問。安知不是夢中身。

【二】

鹿疑鄭相終難辨。蝶化莊生詎可知。假使如今不是夢。能長於夢幾多時。

夜宴惜別

笙歌旋旋曲終頭。轉作離聲滿坐愁。箏怨朱絃從此斷。燭啼紅淚爲誰流。

夜長似歲歡宜盡。醉未如泥飲莫休。何況雞鳴卽須別。門前風雨冷修修。

歸來二周歲

歸來二周歲。二歲似須臾。池藕重生葉。林鴉再引雛。時豐實倉廩。春暖葺庖廚。

更作三年計。三年身健無。

吾土

身心安處爲吾土。豈限長安與洛陽。水竹花前謀活計。琴詩酒裏到家鄉。

榮先生老何妨樂。楚接輿歌未必狂。不用將金買莊宅。城東無主是春光。

題岐王舊山池石壁

樹深藤老竹迴環。石壁重重錦翠斑。俗客看來猶解愛。忙人到此亦須閒。

況當霽景涼風後。如在千巖萬壑間。黃綺更歸何處去。洛陽城內有商山。

病眼花

頭風目眩乘衰老。祇有增加豈有瘳。花發眼中猶足怪。柳生肘上亦須休。

大窠羅綺看纔辨。小字文書見便愁。必若不能分黑白。卻應無悔復無尤。

早飲醉中除河南尹敕到

雪擁衡門水滿池。溫爐卯後煖寒時。綠醅新酎嘗初醉。黃紙除書到不知。

厚俸自來誠忝濫。老身欲起尙遲疑。應須了卻丘中計。女嫁男婚三選資。

除夜

病眼少眠非守歲。老心多感又臨春。火銷燈盡天明後。便是平頭六十人。

府西池

柳無氣力枝先動。池有波紋冰盡開。今日不知誰計會。春風春水一時來。

天津橋

津橋東北斗亭西。到此令人詩思迷。眉月晚生神女浦。臉波春傍窈娘堤。
柳絲嫋嫋風線出。草縷茸茸雨剪齊。報道前驅少呼喝。恐驚黃鳥不成啼。

不准擬二首

籃輦騰騰一老夫。褐裘烏帽白髭鬚。早衰饒病多蔬食。筋力消磨合有無。
不准擬身年六十。上山仍未要人扶。

【二】

憶昔謫居炎瘴地。巴猿引哭虎隨行。多於賈誼長沙苦。子自左遷江峽。凡經七年。小技潘安白髮生。
不准擬身年六十。遊春猶自有心情。

府中夜賞

櫻桃廳院春偏好。石井欄堂夜更幽。白粉墻頭花半出。緋紗燭下水平流。
閒留賓客嘗新酒。醉領笙歌上小舟。舞袖飄飄棹容與。忽疑身是夢中遊。

府西池北新葺水齋。卽事招賓。偶題十六韻

繚繞府西面。潺湲池北頭。擊開明月峽。決破白蘋洲。清淺漪瀾急。蚤緣浦嶼幽。
直衝行徑斷。平入臥齋流。石壘青稜玉。波翻白片鷗。噴時千點雨。澄處一泓油。
絕境應難別。同心豈易求。少逢人愛翫。多是我淹留。夾岸鋪長簟。當軒泊小舟。

枕前看鶴浴。牀下見魚遊。洞戶斜開扇。疎簾半上鉤。紫浮萍泛泛。碧亞竹修修。
讀罷書仍展。碁終局未收。午茶能散睡。卯酒善消愁。簷雨晚初霽。窗風涼欲休。
誰能伴老尹。時復一閒遊。

哭崔兒

掌珠一顆兒三歲。鬢雪千莖父六旬。豈料汝先爲異物。常憂吾不見成人。
悲腸自斷非因劍。啼眼加昏不是塵。懷抱又空天默默。依然重作鄧收身。

初喪崔兒報微之晦叔

書報微之晦叔知。欲題崔字淚先垂。世間此恨偏敦我。天下何人不哭兒。
蟬老悲鳴拋蛻後。龍眠驚覺失珠時。文章千帙官三品。身後傳誰庇廕誰。

府齋感懷酬夢得時初喪崔兒。夢得以詩相安云。從此期君比。瓊樹一枝吹折一枝生。故有此落句以報之。

府伶呼喚爭先到。家醞提攜動輒隨。合是人生開眼日。自當年老斂眉時。
丹砂鍊作三銖土。玄髮看成一把絲。勞寄新詩遠安慰。不聞枯樹更生枝。

齋居

香火多相對。葷腥久不嘗。黃著數匙粥。赤箭一甌湯。厚俸將何用。閒居不可忘。
明年官滿後。擬買雪堆莊。

與諸道者同遊二室至九龍潭作

喜逢二室遊仙子。厭作三川守土臣。舉手摩挲潭上石。開襟抖擻府中塵。他日終爲獨往客。今朝未是自由身。若言尹是嵩山主。三十六峯應笑人。

履道池上作

家池動作經旬別。松竹琴魚好在無。樹暗小巢藏巧婦。渠荒新葉長慈姑。不因車馬時時到。豈覺林園日日蕪。猶喜春深公事少。每來花下得踟躕。

六十拜河南尹

六十河南尹。前途足可知。老應無處避。病不與人期。幸遇芳菲日。猶當強健時。萬金何假藉。一盞莫推辭。流水光陰急。浮雲富貴遲。人閒若無酒。盡合鬢成絲。

重修府西水亭院

因下疏爲沼。隨高築作臺。龍門分水入。金谷取花栽。遶岸行初匝。憑軒立未迴。園西有池位。畱與後人開。

與諸公同出城觀稼

老尹醉醺醺。來隨年少羣。不憂頭似雪。但喜稼如雲。歲望千箱積。秋憐五穀分。何人知帝力。堯舜正爲君。

水堂醉臥問杜三十一

聞君洛下住多年。何處春流最可憐。爲問魏王堤岸下。何如同德寺門前。無妨水色堪閒翫。不得泉聲伴醉眠。那似此堂簾幕底。連明連夜碧潺湲。

歲暮言懷

職與才相背。心將口自言。磨鉛教切玉。驅鶴遣乘軒。只合居巖窟。何因入府門。年終若無替。轉恐負君恩。

座中戲呈諸少年

衰容禁得無多酒。秋髮新添幾許霜。縱有風情應淡薄。假如老健莫誇張。興來吟詠從成癖。飲後酣歌少放狂。不爲倚官兼挾勢。因何入得少年場。

雪後早過天津橋偶呈諸客

官橋晴雪曉峨峨。老尹行吟獨一過。紫綬相輝應不惡。白鬚同色復如何。悠揚短景凋年急。牢落衰情感事多。猶賴洛中饒醉客。時時詎我喚笙歌。

新製綾襖成感而有詠

水波文襖造新成。綾軟縣勻溫復輕。晨興好擁向陽坐。晚出宜披蹋雪行。鶴氅毳疎無實事。木棉花冷得虛名。宴安往往歡侵夜。臥穩昏昏睡到明。

百姓多寒無可救。一身獨暖亦何情。心中爲念農桑苦。耳裏如聞飢凍聲。

爭得大裘長萬丈。與君都蓋洛陽城。

早春雪後贈洛陽李長官鄭明府二同年

府庭共賀三川雪。縣道分行百里春。

獻歲晴和風景新。銅駝街郭暖無塵。府庭共賀三川雪。縣道分行百里春。

醉吟

朱紱洛陽官位屈。青袍長水俸錢貧。有_何功德紆金紫。若比同年是幸人。

醉來忘渴復忘飢。冠帶形骸杳若遺。耳底齋鐘初過後。心頭卯酒未消時。

府酒五絕

變法

自慙到府來周歲。惠愛威稜一事無。唯是改張官酒法。漸從濁水作醍醐。

招客

日午微風且暮寒。春風冷峭雪乾殘。碧甃帳下紅爐畔。試爲來嘗一盞看。

辨味

甘露太甜非正味。醴泉雖潔不芳馨。杯中此物何人別。柔旨之中有典刑。

自勸

憶昔羈貧應舉年。脫衣典酒曲江邊。十千一斗猶賒飲。何況官供不著錢。

諭妓

燭淚夜粘桃葉袖。酒痕春汚石榴裙。莫辭辛苦供歡宴。老後思量悔殺君。

晚歸早出

筋力年年減。風光日日新。退衙歸逼夜。拜表出侵晨。何處臺無月。誰家池不春。

莫言無勝地。自是少閒人。坐厭推囚案。行嫌引馬塵。幾時辭府印。卻作自由身。

南龍興寺殘雪

南龍興寺春晴後。緩步徐吟遶四廊。老趁風花應不稱。閒尋松雪正相當。

吏人引從多乘輦。賓客逢迎少下堂。不擬人閒更求事。些些疎懶亦何妨。

天宮閣早春

天宮高閣上何頻。每上令人耳目新。前日晚登緣看雪。今朝晴望爲迎春。

林鶯何處吟箏柱。墻柳誰家曬麴塵。可惜三川虛作主。風光不屬白頭人。

履道居三首

莫嫌地窄林亭小。莫厭貧家活計微。大有高門鑲寬宅。主人到老不曾歸。

東里素帷猶未徹。

南鄰丹旆又新懸。

衡門蝸舍自慙愧。

收得身來已五年。

【二】

世事平分衆所知。

何嘗苦樂不相隨。

唯餘耽酒狂歌客。

只有樂時無苦時。

和夢得冬日晨興

漏傳初五點。

雞報第三聲。

帳下從容起。

窗閒矚聰明。

照書燈未滅。

煖酒火重生。

理曲絃歌動。

先聞唱渭城。

雪夜對酒招客

帳小青氈暖。

杯香綠蟻新。

醉憐今夜月。

歡憶去年人。

闌落燈花燼。

閒生草座塵。

慇懃報絃管。

明日有嘉賓。

贈晦叔憶夢得

自別崔公四五年。

因何臨老轉風流。

歸來不說秦中事。

歇定唯謀洛下遊。

酒面浮花應是喜。

歌眉斂黛不關愁。

得君更有無厭意。

猶恨樽前欠老劉。

醉後重贈晦叔

老伴知君少。

歡情向我偏。

無論疎與數。

相見輒欣然。

各以詩成癖。

俱因酒得仙。

笑迴青眼語。

醉竝白頭眠。

豈是今投分。

多疑宿結緣。

人間更何事。

攜手送衰年。

睡覺

星河耿耿漏絲絲。

月闌燈微欲曙天。

轉枕頻伸書帳下。

披裘箕踞火爐前。

老眠早覺常殘夜。

病力先衰不待年。

五欲已銷諸念息。

世閒無境可勾牽。

白樂天詩後集卷十一

律詩

凡七
十首

和令狐相公寄劉郎中兼見示長句

日月天衢仰面看。

尚淹池鳳滯臺鸞。

碧幢千里空移鎮。

赤筆三年未轉官。

別後縱吟終少興。

病來雖飲不多歡。

酒軍詩敵如相遇。

臨老猶能一據鞍。

卽事

見月連宵坐。

聞風盡日眠。

室香羅藥氣。

籠煖焙茶煙。

鶴啄新晴地。

雞棲薄暮天。

自看淘酒米。

倚杖小池前。

期宿客不至

風飄雨灑簾帷故。竹映松遮燈火深。宿客不來嫌冷落。一樽酒對一張琴。

問移竹

問君移竹意如何。慎勿排行但閉窠。多種少栽皆有意。大都少校不如多。

重陽席上賦白菊

滿園花菊鬱金黃。中有孤叢色似霜。還似今朝歌酒席。白頭翁入少年場。

偶吟二首

眼下有衣兼有食。心中無喜亦無憂。正如身後有何事。應向人閒無所求。

靜念道經深閉目。閒迎禪客小低頭。猶殘少許雲泉興。一歲龍門數度遊。

【二】

晴教曬藥泥茶竈。閒看科松洗竹林。活計縱貧長淨潔。池亭雖小頗幽深。

厨香炊黍調和酒。應暖安絃拂拭琴。老去生涯祇如此。更無餘事可勞心。

何處春先到

何處春先到。橋東水北亭。凍花開未得。冷酒著難醒。就日移輕榻。遮風展小屏。

不勞入勸醉。鶯語漸丁寧。

勉閒遊

天時人事常多故。一歲春能幾處遊。不時塵埃便風雨。若非疾病即悲憂。

貧窮心苦多無興。富貴身忙不自由。唯有分司官恰好。閒遊雖老未能休。

寄兩銀榼與裴侍郎。因題二絕

貧無好物堪爲信。雙榼雖輕意不輕。願奉謝公池上酌。丹心綠酒一時傾。

【二】

慣和麴蘖堪盛否。重用鹽梅試洗看。小器不知容幾許。襄陽米賤酒升寬。

小橋柳

細水涓涓似淚流。日西惆悵小橋頭。衰楊葉盡空枝在。猶被霜風吹不休。

哭微之二首

八月涼風吹白幕。寢門廊下哭微之。妻孥朋友來相弔。唯道皇天無所知。

【二】

文章卓犖生無敵。風骨英靈歿有神。哭送咸陽北原上。可能隨例作灰塵。

雪夜喜李郎中見訪兼酬所贈

可憐今夜鵝毛雪。引得高情鶴氅人。紅蠟燭前明似晝。青氈帳裏暖如春。

十分滿盞黃金液。一尺中庭白玉塵。對此欲留君便宿。詩情酒分合相親。

任老

不_レ愁陌上春光盡。亦任庭前日影斜。面黑眼昏頭雪白。老應無可更增加。

勸歡

火急歡娛慎勿遲。眼看老病悔難追。樽前花下歌筵裏。會有求來不得時。

答玉尚書問履道池舊橋

虹梁鴈齒隨年換。素板朱欄逐日修。但恨尚書能久別。莫愁州守不頻遊。重移舊柱開中眼。亂種新花擁兩頭。李郭小船何足問。待君乘過濟川舟。

晚歸府

晚從履道來歸府。街路雖長尹不嫌。馬上涼於牀上坐。綠槐風透紫蕉衫。

從龍潭寺至少林寺題贈同遊者

山屐田衣六七賢。蹇芳蹋翠弄潺湲。九龍潭月落杯酒。三品松風飄管絃。強健且宜遊勝地。清涼不覺過炎天。始知駕鶴乘雲外。別有逍遙地上仙。

夜從法王寺下歸嶽寺

雙刹夾虛空。緣雲一徑通。似從初利下。如過劔門中。燈火光初合。笙歌曲未終。

可憐師子座。昇出淨名翁。

宿龍潭寺

夜上九潭誰是伴。雲隨飛蓋月隨杯。明年尚作三川守。此地兼將歌舞來。

嵩陽觀夜奏霓裳

開元遺曲自淒涼。況近秋天調是商。愛者誰人唯白尹。奏時何處在嵩陽。

迴臨山月聲彌怨。散入松風韻更長。子晉少姨聞定怪。人閒亦便有池裳。

過元家履信宅

雞犬喪家分散後。林園失主寂寥時。落花不語空辭樹。流水無情自入池。

風蕩醺船初破漏。雨淋歌閣欲傾欂。前庭後院傷心事。唯是春風秋月知。

和杜錄事題紅葉

寒山十月旦。霜葉一時新。似燒非因火。如花不待春。連行排絳帳。亂落剪紅巾。

解駐籃輦看。風前唯兩人。

題崔常侍濟上別墅

求榮爭寵任紛紛。脫棄金貂祇有君。散員疎去未爲貴。小邑陶休何足云。

山色好當晴後見。泉聲宜向醉中聞。主人憶爾爾知否。拋卻青雲歸白雲。

過溫尚書舊莊

白石清泉拋濟口。碧幢紅旆照河陽。村人都不知時事。猶自呼爲處士莊。

天壇峰下贈杜錄事

年顏氣力漸衰殘。王屋中峰欲上難。頂上將探小有洞。喉中須噓大還丹。與君先去掃天壇。

贈僧五首

鉢塔院如大師

師年八十三。登壇秉律凡六十年。每歲於師處授八關戒者九度。

百千萬劫菩提種。八十二年功德林。若不秉持僧行苦。將何報答佛恩深。慈悲不瞬諸天眼。清淨無塵幾地心。每歲八關蒙九授。

神照上人

照以說壇爲佛事。

心如定水隨形應。口似懸河逐病治。曾向衆中先禮拜。西方去日莫相遺。

自遠禪師

遠以無事爲佛事。

自出家來常自在。緣身一衲一繩牀。令人見即心無事。每一相逢是道場。

宗實上人

實即樊司空之子。捨官位妻子出家。

榮華恩愛棄成唾。戒定眞如和作香。今古雖殊同一法。瞿曇拋卻轉輪王。

清閒上人

自蜀入洛。於長壽寺說法度人。

梓潼眷屬何年別。長壽壇場近日開。應是蜀人皆度了。法輪移向洛中來。

彈秋思

信意閒彈秋思時。調清聲直韻疎遲。近來漸喜無人聽。琴格高低心自知。

自詠

隨宜飲食聊充腹。取次衣裘亦煖身。未必得年非瘦薄。無妨長福是單貧。老龜豈羨犧牲飽。蟠木寧爭桃李春。隨分自安心自斷。是非何用問閒人。

分司初到洛中偶題六韻兼戲呈馮尹

相府念多病。春宮容不才。官衙依口得。俸祿逐身來。白首林園在。紅塵車馬迴。招呼新客旅。掃掠舊池臺。小舫宜攜樂。新荷好蓋杯。不知金谷主。早晚賀筵開。

春風

春風先發苑中梅。櫻杏桃梨次第開。薺花榆莢深村裏。亦道春風爲我來。

洛橋寒食日十韻

上苑風煙好。中橋道路平。蹴球塵不起。潑火雨新晴。宿醉頭仍重。晨遊眼乍明。老慵雖省事。春誘尙多情。遇客踟躕立。尋花取次行。連錢嚼金勒。鑿落寫銀罍。

府醞傷教送。官娃喜要迎。舞腰那及柳。歌舌不如鶯。鄉國真堪戀。光陰可令輕。三年遇寒食。盡在洛陽城。

快活

可惜鶯啼花落處。一壺濁酒送殘春。可憐月好風涼夜。一部清商伴老身。

飽食安眠消日月。閒談冷笑接交親。誰知將相王侯外。別有優游快活人。

送令狐相公赴太原

六纛雙旌萬鐵衣。并汾舊路滿光輝。青衫書記何年去。紅旆將軍昨日歸。潘鎮例

詩作馬蹄隨筆走。獵酣鷹翅伴觥飛。北都莫作多時計。再為蒼生入紫微。紅旆

不出

簷前新葉覆殘花。席上餘杯對早茶。好是老身銷日處。誰能騎馬傍人家。

惜落花

夜來風雨急。無復舊花林。枝上三分落。園中二寸深。日斜啼鳥思。春盡老人心。

莫怪添杯飲。情多酒不禁。

老病

畫聽笙歌夜醉眠。若非月下即花前。如今老病須知分。不負春來二十年。

憶晦叔

遊山弄水攜詩卷。看月尋花把酒杯。六事盡思君作伴。幾時歸到洛陽來。

送徐州高僕射赴鎮

大紅旆引碧幢旌。新拜將軍指點行。戰將易求何足貴。書生難得始堪榮。

離筵歌舞花叢散。候騎刀槍雪隊迎。應笑蹉跎白頭尹。風塵唯管洛陽城。

琴酒

耳根得所琴初暢。心地忘機酒半酣。若使啓期兼解醉。應言四樂不言三。

聽幽蘭

琴中古曲是幽蘭。為我殷勤更弄看。欲得身心俱靜好。自彈不及聽人彈。

六年秋重題白蓮

素房含露玉冠鮮。紺葉搖風鈿扇圓。本是吳州供進藕。今為伊水寄生蓮。

移根到此三千里。結子經今六七年。不獨池中花故舊。兼乘舊日採花船。

元相公輓歌詞三首

銘旌官重威儀盛。騎吹聲繁鹵簿長。後魏帝孫唐宰相。六年七月葬咸陽。

【二】

墓門已閉笳簫去。唯有夫人哭不休。蒼蒼露草咸陽壠。此是千秋第一秋。

【三】

送葬萬人皆慘澹。反虞駟馬亦悲鳴。琴書劍珮誰收拾。三歲遺孤新學行。

重修香山寺畢。題二十二韻以紀之。

闕塞龍門口。祇園鷲嶺頭。曾隨滅劫壞。今遇勝緣修。再瑩新金刹。重裝舊石樓。病僧皆引退。忙客亦淹留。四望窮沙界。孤標出澹洲。地圖鋪洛邑。天柱倚崧丘。兩面蒼蒼岸。中心瑟瑟流。波翻八灘雪。堰護一潭油。臺殿朝彌麗。房廊夜更幽。千花高下塔。一葉往來舟。岫合雲初吐。林開霧半收。靜聞樵子語。遠聽棹郎謳。官散殊無事。身閒甚自由。吟來攜筆硯。宿去抱衾裯。霽月當窗白。涼風滿簟秋。煙香封藥竈。泉冷洗茶甌。南祖心應學。西方社可投。先宜知止足。次要悟浮休。覺路隨方樂。迷塗到老愁。須除愛名障。莫作戀家囚。便合窮年住。何言竟日遊。可憐終老地。此是我菟裘。

臥聽法曲霓裳

金磬玉笙和已久。牙牀角枕睡常遲。朦朧閒夢初成後。宛轉柔聲入破時。樂可理心應不謬。酒能陶性信無疑。起嘗殘酌聽餘曲。斜背銀缸半下帷。

結之

歡愛今何在。悲啼亦是空。同爲一夜夢。共過十年中。

五鳳樓晚望

六年八月十日作

晴陽晚景濕煙銷。五鳳樓高天泱寥。野綠全經朝雨洗。林紅半被暮雲燒。龍門翠黛眉相對。伊水黃金綫一條。自入秋來風景好。就中最好是今朝。

寄劉蘇州

去年八月哭微之。今年八月哭敦詩。何堪老淚交流日。多是秋風搖落時。泣罷幾回深自念。情來一倍苦相思。同年同病同心事。除卻蘇州更是誰。

送客

病上籃輿相送來。衰容秋思兩悠哉。涼風嫋嫋吹槐子。卻請行人勸一杯。

秋思

夕照紅於燒。晴空碧勝藍。獸形雲不一。弓勢月初三。鴈思來天北。砧愁滿水南。蕭條秋氣味。未老已深諳。

酬夢得秋夕不寐見寄

次用本韻

碧簾絳紗帳。夜涼風景清。病聞和藥氣。渴聽碾茶聲。露竹偷燈影。煙松護月明。

何言千里隔。秋思一時生。

題周家歌者

清緊如敲玉。深圓似轉簧。一聲腸一斷。能有幾多腸。

憶夢得

夢得能唱竹枝。聞者愁絕。

齒髮各蹉跎。疎慵與病和。愛花心在否。見酒興如何。年長風情少。官高俗慮多。幾時紅燭下。聞唱竹枝歌。

贈同座

春黛雙蛾斂。秋蓬兩鬢侵。謀歡身太晚。恨老意彌深。薄解燈前舞。尤能酒後吟。花叢便不入。猶自未甘心。

夜招晦叔

庭草留霜池結冰。黃昏鐘絕凍雲凝。碧氈帳上正飄雪。紅火爐前初炷燈。高調秦箏一兩弄。小花蠻榼二三升。為君更奏湘神曲。夜就儂家能不能。

戲答皇甫監

時皇甫監初喪偶。

寒宵勸酒君須飲。君是孤眠七十身。莫道非人身不煖。十分一盞煖於人。

和楊師臯傷小姬英英

自從嬌睩一相依。共見楊花七度飛。玳瑁牀空收枕席。琵琶絃斷倚屏幃。人間有夢何曾入。泉下無家豈是歸。墳上少啼畱取淚。明年寒食更沾衣。

池邊卽事

氈帳胡琴出塞曲。蘭塘越棹弄潮聲。何言此處同風月。薊北江南萬里情。

聞樂感鄰

老去親朋零落盡。秋來絃管感傷多。尙書宅畔悲鄰笛。廷尉門前歡雀羅。綠綺窗空分妓女。絳紗帳掩罷笙歌。歡娛未足身先去。

爭奈書生薄命何

東隣王大理。去冬云亡。南鄰崔尙書。今秋薨逝。

太和六年冬暮贈崔常侍晦叔時爲河南尹。髮毛霜一色。光景水爭流。易過唯冬日。難銷是老愁。香開綠蟻酒。煖擁褐綾裘。已共崔君約。樽前倒卽休。

戲招諸客

黃醅綠醕迎冬熟。絳帳紅爐逐夜開。誰道洛中多逸客。不將書喚不曾來。十二月二十三日作。兼呈晦叔。案頭曆日雖未盡。向後唯殘六七行。牀下酒瓶雖不滿。猶應醉得兩三場。

病身不許依年老。拙宦虛教逐日忙。聞健偷閒且歡飲。一杯之外莫思量。

白樂天詩後集卷十二

律詩 凡九十首

七年元日對酒五首

慶弔經過嬾。逢迎跪拜遲。不因時節日。豈覺此時衰。

【一】

衆老憂添歲。余衰喜入春。年開第七秩。屈指幾多人。

【二】

三杯藍尾酒。一櫟膠牙餠。除卻崔常侍。無人共我爭。

【三】

今朝吳興洛。相憶一欣然。夢得君知否。俱過本命年。余與蘇州劉郎中同壬子歲。今年六十二。

【四】

同歲崔何在。同年杜又無。余與吏部崔相公甲子同歲。與循州杜相公及第同年。秋冬二人俱逝。應無藏避處。只有且歎娛。

七年春題府廳

潦倒守三川。因循涉四年。推誠廢鉤距。示恥用蒲鞭。以此稱公事。將何銷俸錢。

雖非好官職。歲久亦妨賢。

早春醉吟寄太原令狐相公蘇州劉郎中

雪夜閒遊多秉燭。花時暫出亦提壺。別來少遇新詩敵。老去難逢舊飲徒。

大振威名降北虜。勤行惠化活東吳。不知歌酒騰騰興。得似河南醉尹無。

洛下送牛相公出鎮淮南

北闕至東京。風光十六程。坐移丞相閣。春入廣陵城。紅旆擁雙節。白鬚無一莖。萬人開路看。百吏立班迎。闔外君彌重。樽前我亦榮。何須身自得。將相是門生。

元和初。牛相公應制策。登三等。余爲翰林考覈官。

箏

雲髻飄蕭綠。花顏旖旎紅。雙眸剪秋水。十指剝春蔥。楚豔爲門閥。秦聲是女工。甲鳴銀玦瓌。柱觸玉玲瓏。猿苦啼嫌月。鶯嬌語詭風。移愁來手底。送恨入絃中。趙瑟清相似。胡琴鬧不同。慢彈迴斷鴈。急奏轉飛蓬。霜珮鏘還委。冰泉咽復通。珠聯千拍碎。刀截一聲終。綺麗精神定。矜能意態融。歇時情不斷。休去思無窮。

燈下青春夜。樽前白首翁。且聽應得在。老耳未多聾。

洛中春遊呈諸親友

莫歎年將暮。須憐歲又新。府中三遇臘。洛下五逢春。春樹花珠顆。春塘水麴塵。春娃無氣力。春馬有精神。詠春遊一時之態竝轡鞭徐動。連盤酒慢巡。經渦舊鄰里。追逐好交親。笑語銷閒日。酣歌送老身。一生歡樂事。亦不少於人。

酬舒三員外見贈長句

自請假來多少日。五旬光景似須臾。已判到老為狂客。不分當春作病夫。楊柳花飄新白雪。櫻桃子綴小紅珠。頭風不敢多多飯。能酌三分相勸無。

將歸一絕

欲去公門返野扉。預思泉竹已依依。更憐家醞迎春熟。一甕醜醜待我歸。

罷府歸舊居

自此後重授賓客歸履道宅作

陋巷乘籃入。朱門挂印迴。腰閒拋組綬。纓上拂塵埃。屈曲閒池沼。無非手自開。青蒼好竹樹。亦是眼看栽。石片擡琴匣。松枝閣酒杯。此生終老處。昨日卻歸來。

睡覺偶吟

官初罷後歸來夜。天欲明前睡覺時。起坐思量更無事。身心安樂復誰知。

問支琴石

凝因星隕空中落。歎被泥埋澗底沈。天上定應勝地上。支機未必及支琴。提攜拂拭知恩否。雖不能言合有心。

自喜

身慵難勉強。性拙易遲迴。布被辰時起。柴門午後開。忙驅能者去。閒逐鈍人來。自喜誰能會。無才勝有才。

裴常侍以題薔薇架十八韻見示因廣為三十韻以和之

託質依高架。攢華對小堂。晚開春去後。獨秀院中央。霧景朱明早。芳時白晝長。穠因天與色。麗共日爭光。剪碧排千萼。研朱染萬房。煙條塗石綠。粉蘂撲雌黃。根動彤雲涌。枝搖赤羽翔。九微燈炫轉。七寶帳熒煌。淑氣熏行徑。清陰接步廊。照梁迷藻稅。耀壁變雕牆。爛若聚然火。殷於葉得霜。臙脂含臉笑。蘇合裛衣香。浹洽濡晨露。玲瓏漏夕陽。合羅排勘縷。醉暈淺深粧。乍見疑迴面。遙看誤斷腸。風朝飛燕。雨夜泣蕭娘。桃李慙無語。芝蘭讓不芳。山榭何細碎。石竹苦尋常。蕙慘偃欄避。蓮羞映浦藏。怯教蕉葉戰。妬得柳花狂。豈可輕嘲詠。應須痛比方。畫屏風自展。繡織蓋誰張。翠錦挑成字。丹砂印著行。猩猩凝血點。瑟瑟蹙金匡。

散亂萎紅片。尖纖嫩紫芒。觸僧飄毳褐。留妓冒羅裳。寡和陽春曲。多情騎省郎。
 緣誇美顏色。引出好文章。東顧辭仁里。西歸入帝鄉。語曰。里仁爲美。又妻君所居。名仁里。假如君愛殺。
 畱著莫移將。裴君題詩之次。而常侍詔到。唱和未竟。而軒騎西歸。故云。

感舊詩卷

夜深吟罷一長吁。老淚燈前濕白鬚。二十年前舊詩卷。十人酬和九人無。

酬李二十侍郎

箏老蘭長花漸稀。衰翁相對惜芳菲。殘鶯著雨慵休囀。落絮無風凝不飛。
 行撥木芽供野食。坐牽蘿蔓挂朝衣。十年分手今同醉。醉未如泥莫道歸。

和夢得

夢得來詩云。設讀圖書四十車。年年爲郡老天涯。一生不得文章力。百口空爲飽煖家。

綸閣沈沈無寵命。蘇臺籍籍有能聲。豈唯不得清文力。但恐空傳冗吏名。
 郎署廻翔何水部。江湖畱滯謝宣城。所嗟非獨君如此。自古才難共命爭。

贈草堂宗密上人

吾師道與佛相應。念念無爲法法能。口藏宣傳十二部。心臺照耀百千燈。
 盡離文字非中道。長住虛空是小乘。少有人知菩薩行。世閒只是重高僧。

喜照密閑實四上人見過

紫袍朝士白髯翁。與俗乖疎與道通。官秩三廻分洛下。交遊一半在僧中。
 臭帑世界終須出。香火因緣久願同。齋後將何充供養。西軒泉石北窗風。

贈皇甫六張十五李二十三賓客

昨日三川新罷守。今年四皓盡分司。幸陪散秩閒居日。好是登山臨水時。
 家未苦貧常醞酒。身雖衰病尙吟詩。龍門泉石香山月。早晚同遊報一期。

微之敦詩晦叔相次長逝。歸然自傷。因成二絕

併失鷓鴣侶。空畱麋鹿身。只因嵩洛下。長作獨遊人。

【二】

長夜君先去。殘年我幾何。秋風滿衫淚。泉下故人多。

池上閒詠

青莎臺上起書樓。綠藻潭中繫釣舟。日晚愛行深竹裏。月明多上小橋頭。
 暫嘗新酒還成醉。亦出中門便當遊。一部清商聊送老。白鬚蕭颯管絃秋。

涼風歎

昨夜涼風又颯然。螢飄葉墜臥床前。逢秋莫歎須知分。已過潘安三十年。
 和高僕射罷節度讓尙書授少保分司喜遂游山水之作

暫辭八座罷雙旌。便作登山臨水行。能以忠貞酬重任。不將富貴礙高情。

朱門出去簪纓從。絳帳歸來歌吹迎。鞍轡鬧裝光滿馬。何人信道是書生。

送考功崔郎中赴闕

稱意新官又少年。秋涼身健好朝天。青雲上了無多路。卻要徐驅穩著鞭。

送楊八給事赴常州

無嗟別青瑣。且喜擁朱輪。五十得三品。百千無一人。須勤念黎庶。莫苦憶交親。此外無過醉。毗陵何限春。

聞歌者唱徵之詩

新詩絕筆聲名歇。舊卷生塵篋笥深。時向歌中聞一句。未容傾耳已傷心。

醉送李二十常侍赴鎮浙東

靖安客舍花枝下。共脫青衫典濁醪。今日洛橋還醉別。金杯翻汗麒麟袍。

喧闐夙駕君脂轄。酌醑離筵我藉糟。好去商山紫芝伴。珊瑚鞭動馬頭高。

醉別程秀才

五度龍門點額廻。卻緣多藝復多才。貧泥客路粘難出。愁鎖鄉心掣不開。何必更遊京國去。不如且入醉鄉來。吳絃楚調瀟湘弄。爲我殷勤送一杯。

程生善琴。尤能沈湘曲。

自詠

白衣居士紫芝仙。半醉行歌半坐禪。今日維摩兼飲酒。當時綺季不請錢。

等閒池上畱賓客。隨事燈前有管絃。但問此身銷得否。分司氣味不論年。

把酒思閒事二首

把酒思閒事。春愁誰最深。乞錢羈客面。落第舉人心。月下低眉立。燈前抱膝吟。

憑君勸一醉。勝與萬黃金。

〔一〕

把酒思閒事。春嬌何處多。試鞍新白馬。弄鏡小青娥。掌上初教舞。花前欲按歌。

憑君勸一醉。勸了問如何。

衰荷

白露凋花花不殘。涼風吹葉葉初乾。無人解愛蕭條境。更遶衰叢一匝看。

池上送考功崔郎中兼別房寶二妓

文昌列宿徵還日。洛浦行雲放散時。鵝鷺上天花逐水。無因再會白家池。

自問

依仁臺廢悲風晚。履信池荒宿草春。

晦叔亭臺在依仁。微之池館在履信。

自問老身騎馬出。

送陳許高僕射赴鎮

敦詩閱禮中軍帥。重士輕財大丈夫。
花鈿坐遠黃金印。絲竹行隨白玉壺。

常與師徒同苦樂。不教親故隔榮枯。
商皓老狂唯愛醉。時時能寄酒錢無。

青氈帳二十韻

合聚千羊蠶。施張百子卷。

司馬遷書云。張空卷。

骨盤邊柳健。色染塞藍鮮。北製因戎剏。

南移逐虜遷。汰風吹不動。禦雨濕彌堅。
有頂中央聳。無隅四嚮圓。傍通門豁爾。
內密氣溫然。遠別關山外。初安庭戶前。
影孤明月夜。價重苦寒年。軟暖圍氈毯。
鎗縱束管絃。最宜霜後地。偏稱雪中天。
側置低歌座。平鋪小舞筵。閒多揭簾入。
醉便擁袍眠。鐵檠移燈背。銀囊帶火懸。
深藏曉蘭焰。闇貯宿香煙。獸炭休親近。
狐裘可棄損。硯溫融凍墨。瓶煖變春泉。
蕙帳徒招隱。茅庵浪坐禪。貧僧應歎羨。
寒士定雷連。賓客於中接。兒孫向後傳。
王家誇舊物。未及此青氈。
王子敬語倫兒。青氈我家舊物。

幸免非常病。甘當本分衰。眼昏燈最覺。腰瘦帶先知。
樹葉霜紅日。鬢鬢雪白時。

悲愁緣欲老。老過卻無悲。

同諸客額子家公主舊宅

平陽舊宅少人遊。應是遊人到卽愁。
臺傾滑石猶殘砌。簾斷真珠不滿鉤。

布穀烏啼桃李院。絡絲蟲怨鳳皇樓。
聞道至今蕭史在。鬢鬢雪白向明州。

答夢得八月十五日夜翫月見寄

南國碧雲客。東京白首翁。松江初有月。
不知娃館上。何似石樓中。

其夜余在龍門石樓上望月。

伊水正無風。遠思兩鄉斷。清光千里同。

初冬早起寄夢得

起戴烏紗帽。行披白布裘。爐溫先煖酒。
手冷未梳頭。早起煙霜白。初寒鳥雀愁。

秋夜聽高調涼州

樓上金風聲漸緊。月中銀字韻初調。
促張絃柱吹高管。一曲涼州入次寥。

香山寺二絕

空門寂靜老夫閒。伴鳥隨雲往復還。
家醞滿瓶書滿架。半移生計入香山。

【一】

愛風巖上攀松蓋。戀月潭邊坐石稜。且共雲泉結緣境。他生當作此山僧。

送舒著作重授省郎赴闕

三歲相依在洛都。遊花宴月飽歡娛。惜別笙歌多怨咽。願畱軒蓋少蜘蛛。劍磨光彩依前出。鵬舉風雲逐後驅。從此求閒應不得。更能重醉白家無。

同諸客嘲雪中馬上妓

珊瑚鞭鞞馬蜘蛛。引手低蛾索一盂。腰爲逆風成弱柳。面因衝冷作凝酥。銀篋穩簪烏羅帽。花襜宜乘叱撥駒。雪裏君看何所似。王昭君妹寫真圖。

喜劉蘇州恩賜金紫遙想賀宴以詩慶之

海內姑蘇太守賢。恩加章綬豈徒然。賀賓喜色欺杯酒。醉妓歡聲遏管絃。魚珮菁鱗光照地。鶻銜瑞帶勢冲天。莫嫌鬢上些些白。金紫由來稱長年。

藍田劉明府攜酌相過與皇甫郎中卯時同飲醉後贈之

臘月九日煖寒客。卯時十分空腹杯。玄晏舞狂烏帽落。藍田醉倒玉山頽。貌偷花色老暫去。歌蹋柳枝春闌來。不爲劉家賢聖物。愁翁笑口大難開。

劉蘇州以華亭一鶴遠寄以詩謝之

老鶴風姿異。衰翁詩思深。素毛如我鬢。丹頂似君心。松際雪相映。雞羣塵不侵。

殷勤遠來意。一隻重千金。

早春憶蘇州寄夢得

吳苑四時風景好。就中偏好是春天。霞光曙後殷於火。水色晴來嫩似煙。士女笙歌宜月下。使君金紫稱花前。誠知歡樂堪畱戀。其奈離鄉已四年。

嘗新酒憶海叔二首

樽裏看無色。杯中動有光。自君拋我去。此物共誰嘗。

【一】

世上強欺弱。人間醉勝醒。自君拋我去。此語更誰聽。

負春

病來道士教調氣。老去山僧勸坐禪。孤負春風楊柳曲。去年斷酒到今年。

池上閒吟二首

高臥閒行自在身。池邊六見柳條新。幸逢堯舜無爲日。得作羲皇向上人。四皓再除猶且健。三川罷守未全貧。莫愁客到無供給。家醞香濃野菜春。

【二】

非莊非宅非蘭若。竹樹池亭十畝餘。非道非僧非俗吏。褐裘烏帽閉門居。

夢遊信意寧殊蝶。心樂身閒便是魚。雖未定知生與死。其閒勝負兩何如。

早春招張賓客

久雨初晴天氣新。風煙草樹盡欣欣。雖當冷落衰殘日。還有陽和暖活身。池色溶溶藍染水。花光焰焰火燒春。商山老伴相收拾。不用隨他年少人。

營閒事

自笑營閒事。從朝到日斜。澆畦引泉脈。掃逕避蘭芽。暖變墻衣色。晴催木筆花。桃根知酒渴。晚送一甌茶。

感春

老思不禁春。風光照眼新。花房紅鳥觜。池浪碧魚鱗。倚棹誰為伴。持杯自問身。心情多少在。六十二三人。

春池上戲贈李郎中

滿池春水何人愛。唯我迴看指似君。直似按藍新汁色。與君南宅染羅裙。

翫半開花贈皇甫郎中

八年寒食日。池東小樓上作。

勿訝春來晚。無嫌花發遲。人憐全盛日。我愛半開時。紫蠟粘為蒂。紅蘇點作蕊。成都新夾纈。漢碎臙脂。樹杪真珠顆。墻頭小女兒。淺深粧駁落。高下火參差。

蝶戲爭香朶。鶯啼選穩枝。好教郎作伴。合共酒相隨。醉翫無勝此。狂嘲更讓誰。

猶殘少年興。不似老人詩。西日憑輕照。東風莫殺吹。明朝應爛熳。後夜更離披。

林下遙相憶。樽前闕有期。銜杯嚼菜思。唯我與君知。

池邊

柳老香絲宛。荷新鈿扇圓。殘春深樹裏。斜日小樓前。醉遣收杯杓。閒聽理管絃。

池邊更無事。看補採蓮船。

家醞新熟。每嘗輒醉。妻姪等勸令少飲。因成長句以諭之。

君應怪我朝朝飲。不說向君君不知。身上幸無疼痛處。甕頭正是撇嘗時。

劉妻勸諫夫休醉。王姪分疏叔不癡。六十三翁頭雪白。假如醒黠欲何為。

送常秀才下第東歸

東歸多旅恨。西上少知音。寒食看花眼。春風落第心。百憂當二月。一醉直千金。到處公卿席。無辭酒盞深。

且遊

手裏一杯滿。心中百事休。春應唯仰醉。老更不禁愁。弄水迴船尾。尋花信馬頭。眼看筋力減。遊得且須遊。

題王家莊臨水柳亭

弱柳緣堤種。虛亭壓水閒。條疑逐風去。波欲上階來。翠羽偷魚入。紅腰學舞迴。春愁正無緒。爭不盡殘杯。

題令狐家木蘭花

膩如玉指塗朱粉。光似金刀剪紫霞。從此時時春夢裏。應添一樹女郎花。

拜表迴閒遊

玉珮金章紫花綬。紵衫藤帶白綸巾。晨興拜表稱朝士。晚出遊山作野人。達磨傳心令息念。玄元留語遣同塵。一曲狂歌醉送春。

配肆法堂方丈室。其閒豈是兩般身。

西街渠中種蓮壘石頗有幽致偶題小樓

朱檻低墻上。清流小閣前。雇人栽菡萏。買石造潺湲。影落江心月。聲移谷口泉。閒看卷簾坐。醉聽掩牕眠。路笑淘官水。家愁費料錢。是非君勿問。一對一儵然。

晚春閒居楊工部寄詩楊常州寄茶同到因以長句答之

宿醒寂寞眠初起。春意闌珊日又斜。勸我加餐因早笋。恨人休醉是殘花。悶吟工部新來句。渴飲毗陵遠到茶。兄弟東西官職冷。門前車馬向誰家。

玉泉寺南三里澗下多深紅躑躅繁豔殊常感惜題詩以示遊者

玉泉南澗花奇怪。不似花叢似火堆。今日多情唯我到。每年無故爲誰開。寧辭辛苦行三里。更與畱連飲兩杯。猶有一般孤負事。不將歌舞管絃來。

早服雲母散

曉服雲英漱井華。寥然身若在煙霞。藥銷日晏三匙飯。酒渴春深一碗茶。每夜坐禪觀水月。有時行醉翫風花。淨名事理人難解。身不出家心出家。

三月晦日晚聞鳥聲

晚來林鳥語殷勤。似惜風光說向人。遣脫破袍勞報暖。催沽美酒敢辭貧。聲聲勸醉應須醉。一歲唯殘半日春。

早夏遊平原迴

夏早日初長。南風草木香。肩輿頗平穩。澗路甚清涼。紫蕨行看採。青梅旋摘嘗。療飢兼解渴。一盞冷雲漿。

宿天竺寺迴

野寺經三宿。都城復一還。家仍念婚嫁。身尚繫官班。瀟洒秋臨水。沈吟晚下山。長閒猶未得。逐日且偷閒。

侍中晉公欲到東洛先蒙書問期宿龍門思往感今輒獻長句

昔蒙興化池頭送

太和三年春居易授賓客分司東來特蒙侍中於興化里池上宴送

今許龍門潭上期

聚散但慙長見念

榮枯安敢道相思

功成名遂來雖久

雲臥山遊去未遲

只如初破蔡州時

奉和晉公侍中蒙除畱守行及洛師感悅發中斐然成詠

鸞鳳翱翔在寥廓

貂蟬瀟洒出埃塵

致成堯舜昇平代

拋擲功名還史冊

分張歡樂與交親

南山老皓雖休去

送劉五司馬赴任硤州兼寄崔使君

位下才高多怨天

劉兄道勝獨恬然

貧於揚子兩三倍

筆硯莫拋畱壓案

筆瓢從陋也銷錢

郡丞自合當優禮

菩提寺上方晚眺

樓閣高低樹淺深

山光水色暝沈沈

嵩煙半卷青綃幕

飛鳥滅時宜極目

遠風來處好開襟

誰知不離簪纓內

楊柳枝詞八首

六么水調家家唱

白雪梅花處處吹

古歌舊曲君休聽

【一】

陶令門前四五樹

亞夫營裏百千條

何似東都正二月

黃金枝映洛陽橋

【二】

依依嫋嫋復青青

勾引春風無限情

白雪花繁空撲地

綠絲條弱不勝鶯

【三】

紅版江橋青酒旗

館娃宮暖日斜時

可憐雨歇東風定

萬樹千條各自垂

【四】

蘇州楊柳任君誇

更有錢塘勝館娃

若解多情尋小小

綠楊深處是蘇家

【五】

蘇家小女舊知名

楊柳風前別有情

剝條盤作銀環樣

卷葉吹爲玉笛聲

【六】

葉含濃露如啼眼

枝嫋輕風似舞腰

小樹不禁攀折苦

乞君畱取兩三條

【七】

人言柳葉似愁眉

更有愁腸似柳絲

柳絲挽斷腸牽斷

彼此應無續得期

浪淘沙詞六首

白樂天詩後集卷十二

一泊沙來一泊去。一重浪滅一重生。相攪相淘無歇日。會教山海一時平。

【二】

白浪茫茫與海連。平沙浩浩四無邊。暮去朝來淘不住。遂令東海變桑田。

【三】

青草湖中萬里程。黃梅雨裏一人行。愁見灘頭夜泊處。風翻閭浪打船聲。

【四】

借問江湖與海水。何似君情與妾心。相恨不如潮有信。相思始覺海非深。

【五】

海底飛塵終有日。山頭化石豈無時。誰道小郎拋小婦。船頭一去沒廻期。

【六】

隨波逐浪到天涯。遷客生還有幾家。卻到帝鄉重富貴。請君莫忘浪淘沙。

白樂天詩後集卷十三

律詩

凡八
十首

讀老子

言者不知知者默。此語吾聞於老君。若道老君是知者。緣何自著五千文。

讀莊子

莊生齊物同歸一。我道同中有不同。遂性逍遙雖一致。鸞鳳終校勝蛇蟲。

讀禪經

須知諸相皆非相。若住無餘卻有餘。言下忘言一時了。夢中說夢兩重虛。

空花豈得兼求果。陽焰如何更覓魚。攝動是禪禪是動。不禪不動即如如。

感興二首

吉凶禍福有來由。但要深知不要憂。只見火光燒潤屋。不聞風浪覆虛舟。

名爲公器無多取。利是身災合少求。雖異匏瓜難不食。大都食足早宜休。

【二】

魚能深入寧憂釣。鳥解高飛豈觸羅。熱處爭先炙手去。悔時其奈噬臍何。
樽前誘得猩猩血。幕上偷安燕燕窠。我有一言君記取。世閒自取苦人多。

問鶴

烏鳶爭食雀爭窠。獨立池邊風雪多。盡日蹋冰翹一足。不鳴不動意如何。

代鶴答

鷹爪攫雞雞肋折。鵲拳蹙鴈鴈頭垂。何如斂翅水邊立。飛上雲松棲穩枝。

閒臥有所思二首

向夕寒簾臥枕琴。微涼入戶起開襟。偶因明月清風夜。忽想遷臣逐客心。
何處投荒初恐懼。誰人遠澤正悲吟。始知洛下分司坐。一日安閒直萬金。

【一】

權門要路是身災。散地閒居少禍胎。今日憐君嶺南去。當時笑我洛中來。
蟲全性命緣無毒。木盡天年爲不才。大抵吉凶多自致。李斯一去二疏迴。

喜閒

瀟酒伊嵩下。優游黃綺閒。未曾一日悶。已得六年閒。魚鳥爲徒侶。煙霞是往還。
伴僧禪閉目。迎客笑開顏。興發宵游寺。慵時晝掩關。夜來風月好。悔不宿香山。

詩酒琴人例多薄命。予酷好三事。雅當此科。而所得已多。爲幸斯甚。偶成。

狂詠聊寫愧懷。

愛琴愛酒愛詩客。多賤多貧多苦辛。中散步兵終不貴。孟郊張籍過於貧。
一之已歎關於命。三者何堪併在身。只合飄零隨草木。誰教凌厲出風塵。
榮名厚祿二千石。樂飲閒遊三十春。可得無厭時咄咄。猶言薄命不如人。

寄明州于駙馬使君三絕句

有花有酒有笙歌。其奈難逢親故何。近海饒風春足雨。白鬚太守悶時多。

【二】

平陽音樂隨都尉。畱滯三年在浙東。吳越聲邪無法用。莫教偷入管絃中。

【三】

何郎小妓歌喉好。嚴老呼爲一串珠。嚴尙書與于駙馬詩云。莫惜歌喉一串珠。海味腥鹹捐聲氣。
聽看猶得斷腸無。

閒臥

薄食當齋戒。散班同隱淪。佛容爲弟子。天許作閒人。唯置牀臨水。都無物近身。
清風散髮臥。兼不要紗巾。

春早秋初因時卽事兼寄浙東李侍郎

春早秋初晝夜長。可憐天氣好年光。和風細動簾帷暖。清露微凝枕簟涼。

窗下曉眠初減被。池邊晚坐乍移牀。閒從蕙草侵階綠。靜任槐花滿地黃。

理曲管絃聞後院。熨衣燈火映深房。四時新景何人別。遙憶多情李侍郎。

新秋喜涼

過得炎蒸月。尤宜老病身。衣裳朝不潤。枕簟夜相親。樓月纖纖早。波風嫋嫋新。

光陰與時節。先感是詩人。

初夏閒吟兼呈韋賓客

孟夏清和月。東都閒散官。體中無病痛。眼下未飢寒。世事聞常悶。交游見卽歡。

杯觴畱客切。妓樂取人寬。雪鬢隨身老。雲心著處安。此中殊有味。試說向君看。

哭崔二十四常侍

崔好酒放歌。忘懷生死。知疾不起。自爲誌文。

貂冠初別九重門。馬鬣新封四尺墳。薤露歌詞非白雪。旌銘官爵是浮雲。

伯倫常置隨身鍤。元亮先爲自祭文。莫道高風無繼者。一千年內有崔君。

奉酬侍中夏中雨後遊城南莊見示八韻

島樹閒林巒。雲收雨氣殘。四山嵐色重。五月水聲寒。老鶴兩三隻。新篁千萬竿。

化成天竺寺。移得子陵灘。心覺閒彌貴。身緣健更歡。帝將風后待。人作謝公看。

角里年雖老。高陽興未闌。佳辰不見召。爭免趁杯盤。來詩云。何處趁杯盤。

送兗州崔大夫駙馬赴鎮

戚里誇爲賢駙馬。儒家認作好詩人。魯侯不得辜風景。沂水年年有暮春。

少年問

少年怪我問如何。何事朝朝醉復歌。號作樂天應不錯。憂愁時少樂時多。

問少年

千首詩堆青玉案。十分酒寫白金盃。回頭卻問諸年少。作箇狂夫得了無。

代琵琶弟子謝女師曹供奉寄新調弄譜

琵琶師在九重城。忽得書來喜且驚。一紙展看非舊譜。四絃翻出是新聲。

蕤賓掩抑嬌多怨。散水玲瓏峭更清。珠顆淚霑金捍撥。紅粧弟子不勝情。

蕤賓。散水。皆新調名。

代林園戲贈

裴侍中新修集賢宅。成池館甚盛。數往遊宴。醉歸自戲耳。

南院今秋遊宴少。西坊近日往來頻。假如宰相池亭好。作客何如作主人。

戲答林園

豈獨西坊來往頻。 偷閒處處作遊人。 衡門雖是棲遲地。 不可終朝鎖老身。

重戲贈

集賢池館從他盛。 履道林亭勿自輕。 往往歸來嫌窄小。 年年為主莫無情。

重戲答

小水低亭自可親。 大池高館不關身。 林園莫妬裴家好。 憎故憐新豈是人。

早秋登天宮寺閣贈諸客

天宮閣上醉蕭辰。 絲管閒聽酒慢巡。 爲向涼風清景道。 今朝屬我兩三人。

曉上天津閣閒望。偶逢盧郎中張員外攜酒同傾

上陽宮裏曉鐘後。 天津橋頭殘月前。 空闊境疑非下界。 飄飄身似在寥天。

星河隱映初生日。 樓閣蔥蘢半出煙。 此處相逢傾一盞。 始知地上有神仙。

八月十五日夜同諸客翫月

月好共傳唯此夜。 境閒皆道是東都。 嵩山表裏千重雪。 洛水高低兩顆珠。

清景難逢宜愛惜。 白頭相勸強歡娛。 誠知亦有來年會。 保得晴明強健無。

對晚開夜合花贈皇甫郎中

移晚校一月。 花遲過半年。 紅開杪秋日。 翠合欲昏天。 白露滴未死。 涼風吹更鮮。

後時誰肯顧。 唯我與君憐。

醉遊平泉

狂歌箕踞酒樽前。 眼不看人面向天。 洛客最閒唯有我。 一年四度到平泉。

題贈平泉韋徵君拾遺

箕穎千年後。 唯君得古風。 位留丹陛上。 身入白雲中。 躁靜心相背。 高低跡不同。

籠雞與梁燕。 不信有冥鴻。

酬皇甫郎中對新菊花見憶

愛菊高人吟逸韻。 悲秋病客感衰懷。 黃花助興方攜酒。 紅葉添愁正滿階。

居士葷腥今已斷。 仙郎杯杓爲誰排。 愧君相憶東籬下。 擬廢重陽一日齋。

夜宴醉後畱獻裴侍中

九燭臺前十二姝。 主人畱醉任歡娛。 翩翩舞袖飛蝶。 宛轉歌聲一索珠。

坐久欲醒還酩酊。 夜深初散又踟躕。 南山賓客東山妓。 此會人間曾有無。

和韋庶子遠坊赴宴未夜先歸之作兼呈裴員外

促席畱歡日未曛。 遠坊歸思已紛紛。 無妨按轡行乘月。 何必逃杯走似雲。

銀燭忍拋楊柳曲。 金鞍潛送石榴裙。 到時常晚歸時早。 笑樂三分校一分。

集賢池答侍中問

主人晚入皇城宿。問客徘徊何所須。池月幸閒無用處。今宵能借客遊無。

楊柳枝二十韻

楊柳枝。洛下新聲也。洛之小妓有善歌之者。詞聲音韻。聽可動人。故賦之。

小妓攜桃葉。新歌蹋柳枝。粧成剪燭後。醉起拂衫時。繡履嬌行緩。花筵笑上遲。身輕委迴雪。羅薄透凝脂。笙引簧頻煖。箏催柱數移。樂童翻怨調。才子與妍詞。便想人如樹。先將髮比絲。風條搖兩帶。煙葉貼雙眉。口動櫻桃破。鬢低翡翠垂。枝柔腰嫋娜。萋嫩手葳蕤。唳鶴晴呼侶。哀猿夜叫兒。玉敲音歷歷。珠貫字纍纍。袖爲收聲點。釵因赴節遺。重重徧頭別。一一拍心知。塞北愁攀折。江南苦別離。黃遮金谷岸。綠映杏園池。春惜芳華好。秋憐顏色衰。取來歌裏唱。勝向笛中吹。曲罷那能別。情多不自持。纏頭無別物。一首斷腸詩。

答皇甫十郎中秋深酒熟見憶

煙景冷蒼茫。秋深夜夜霜。爲思池上酌。先覺甕頭香。未暇傾巾漉。還應染指嘗。醞翻慙氣味。琥珀讓晶光。若許陪歌席。須教散道場。月終齋戒畢。猶及菊花黃。
老去去
老去愧妻兒。冬來有勸詞。煖寒從飲酒。衝冷少吟詩。戰勝心還壯。齋勤體校羸。

由來世閒法。損益合相隨。

送宗實上人遊江南

忽辭洛下緣何事。擬向江南住幾時。每過渡頭應問法。無妨菩薩是船師。

和同州楊侍郎誇柘枝見寄

細吟馮翊使君詩。憶作餘杭太守時。君有一般輸我事。柘枝看校十年遲。

冬初酒熟二首

霜繁脆庭柳。風利剪池荷。月色曉彌苦。鳥聲寒更多。秋懷久寥落。冬計又如何。一甕新醅酒。萍浮春水波。

【二】

酒熟無來客。因成獨酌謠。人閒老黃綺。地上散松喬。忽忽醒還醉。悠悠暮復朝。殘年多少在。盡付此中銷。

送姚杭州赴任因思舊游二首

與君細話杭州事。爲我畱心莫等閒。閩里固宜勤撫恤。樓臺亦要數躋攀。笙歌縹緲虛空裏。風月依稀夢想閒。且喜詩人重管領。遙飛一盞賀江山。

【三】

渺渺錢塘路幾千。想君到後事依然。靜逢竺寺猿偷橘。閒看蘇家女採蓮。故妓數人憑問訊。新詩兩首倩畱傳。舍人雖健無多興。老校當時八九年。

杭人至今呼余為白舍人。

寄李相公

漸老只謀歡。雖貧不要官。唯求造化力。試為駐春看。

冬日平泉路晚歸

山路難行日易斜。煙村霜樹欲棲鴉。夜歸不到應閒事。熱飲三杯即是家。

利仁北街作

草色斑斑春雨晴。利仁坊北面西行。踟躕立馬緣何事。認得張家歌吹聲。

洛陽堰閒行

洛陽堰上新晴日。長夏門前欲暮春。遇酒即沽逢樹歇。七年此地作閒人。

過永寧

村杏野桃繁似雪。行人不醉為誰開。賴逢山縣盧明府。引我花前歡一杯。

往年稠桑曾喪白馬。題詩廳壁。今來尚存。又復感懷。更題絕句。

路傍埋骨蒿草合。壁上題詩塵蘚生。馬死七年猶悵望。自知無乃太多情。

羅敷水

野店東頭花落處。一條流水號羅敷。芳魂豔骨知何在。春草茫茫墓亦無。

路逢青州王大夫赴鎮立馬贈別

大旆擁金羈。書生得者稀。何勞問官職。豈不見光輝。赫赫人爭看。翩翩馬欲飛。

不期前歲尹。駐節語依依。前年春。予為河南尹。王為少尹。

和楊同州寒食乾坑會後聞楊工部欲到知予與工部有宿醒

夜飲歸常晚。朝眠起更遲。舉頭中酒後。引手索茶時。拂枕青長袖。敲簪白接羅。

宿醒無興味。先是肺神知。

和劉汝州酬侍中見寄長句因書集賢坊勝事戲而問之

洛川汝海封畿接。履道集賢來往頻。一復時程雖不遠。百餘步地更相親。

汝去洛程一宿。履道集賢兩宅相去一百三十步。

朱門陪宴多投轄。青眼畱歡任吐茵。聞道郡齋還有酒。

池上二絕

山僧對碁坐。局上竹陰清。映竹無人見。時聞下子聲。

【二】

小娃撐小艇。偷採白蓮迴。不解藏蹤跡。浮萍一道開。

白羽扇

素是自然色。圓因裁製功。颯如松起籟。飄似鶴翻空。盛夏不銷雪。終年無盡風。引秋生手裏。藏月入懷中。麈尾斑非匹。蒲葵陋不同。何人稱相對。清瘦白鬚翁。

五月齋戒罷。宴徹樂聞。韋賓客皇甫。郎中飲會亦稀。又知欲攜酒饌出齋。

先以長句呈謝

妓房匣鏡滿紅埃。酒庫封瓶生綠苔。居士爾時緣護戒。車公何事亦停杯。

散齋香火今朝散。開素盤筵後日開。隨意往還君莫怪。坐禪僧去飲徒來。

閒園獨賞

因夢得所寄蜂鶴之詠。因成此篇以和之。

午後郊園靜。晴來景物新。雨添山氣色。風借水精神。永日若爲度。獨遊何所親。仙禽狎君子。芳樹倚佳人。蟻鬪王爭肉。蝸移舍逐身。蝶雙知伉儷。蜂分見君臣。蠢蠕形雖小。逍遙性即均。不知鵬與鷁。相去幾微塵。

種柳三詠

白頭種松桂。早晚見成林。不及栽楊柳。明年便有陰。春風爲催促。副取老人心。

【三】

從君種楊柳。夾水意如何。準擬三年後。青絲拂綠波。仍教小樓上。對唱柳枝歌。

【三】

更想五年後。千千條麴塵。路傍深映月。樓上闇藏春。愁殺閒遊客。聞歌不見人。

偶吟

好官病免曾三度。散地歸休已七年。老自退閒非世棄。貧蒙強健是天憐。

韋荆南去畱春服。王侍中來乞酒錢。便得一年生計足。與君美食復甘眠。

池上卽事

移牀避日依松竹。解帶當風挂薜蘿。鈿砌池心綠蘋合。粉開花面白蓮多。

久陰新霽宜絲管。苦熱初涼入綺羅。家醞瓶空人客絕。今宵爭奈月明何。

南塘暝興

水色昏猶白。霞光暗漸無。風荷搖破扇。波月動連珠。蟋蟀啼相應。鴛鴦宿不孤。

小童頻報夜。歸步尙踟躕。

小宅

小宅里閭接。疎籬雞犬通。渠分南巷水。窗借北家風。庾信園殊小。陶潛屋不豐。

何勞問寬窄。寬窄在心中。

諭親友

適情處處皆安樂。大抵園林勝市朝。煩鬧榮華猶易過。優閒福祿更難銷。
自憐老大宜疎散。卻被交親歎寂寥。終日相逢不相見。兩心相去一何遙。

龍門送別皇甫澤州赴任。韋山人南遊。

隼旗歸洛知何日。鶴駕還嵩莫過春。惆悵香山雲水冷。明朝便是獨遊人。

劉蘇州寄釀酒糯米。李浙東寄楊柳枝舞衫。偶因嘗酒試衫。輒成長句寄謝之。

柳枝謾蹋試雙袖。桑落初香嘗一杯。金屑醅濃吳米釀。銀泥衫穩越娃裁。

舞時已覺愁眉展。醉後仍教笑口開。慙愧故人憐寂寞。三千里外寄歡來。

詔授同州刺史病不赴任。因詠所懷。

同州慵不去。此意復誰知。誠愛俸錢厚。其如身力衰。可憐病判案。何似醉吟詩。

勞逸懸相遠。行藏決不疑。徒煩人勸諫。只合自尋思。白髮來無限。青山去有期。

野心惟怕鬧。家口莫愁飢。賣卻新昌宅。聊充送老資。

寄楊六侍郎

時楊初授戶部。子不赴同州。

西戶最榮君好去。左馮雖穩我慵來。秋風一箸鱸魚鱠。張翰搖頭喚不廻。

韋七自太子賓客再除祕書監以長句賀而餞之

韋往年嘗與予同為祕監。

離筵莫惜且同歡。共賀新恩拜舊官。屈就商山伴麋鹿。好歸芸閣狎鸕鷀。

落星石上蒼苔古。畫鶴廳前白露寒。老監姓名題在壁。相思試為拂塵看。

酒熟憶皇甫十

新酒此時熟。故人何日來。自從金谷別。不見玉山頽。疎索柳花盃。寂寥荷葉杯。

今冬問氈帳。雪裏為誰開。

九年十一月二十一日感事而作

其日獨遊香山寺。

禍福茫茫不可期。大都早退似先知。當君白首同歸日。是我青山獨往時。

顧索素琴應不暇。憶牽黃犬定難追。麒麟作脯龍爲。何似泥中曳尾龜。

即事重題

重裘暖帽寬氈履。小閣低窗深地爐。身穩心安眠未起。西京朝士得知無。

將歸渭村先寄舍弟

一年年覺此身衰。一日日知前事非。詠月嘲風先要減。登山臨水亦宜稀。

子平嫁娶貧中畢。元亮田園醉裏歸。爲報阿連寒食下。與君釀酒掃柴扉。

看嵩洛有歎

今日看嵩洛。回頭歎世閒。榮華急如水。憂患大於山。見苦方知樂。經忙始愛閒。

未聞籠裏鳥。飛出肯飛還。

詠懷

隨緣逐處便安閒。

不入朝廷不住山。

心似虛舟浮水上。

身同宿鳥寄林閒。

尚平婚嫁了無累。

馮翊符章封卻還。

時阿羅初嫁。及同州官吏放歸。

處分貧家殘活計。

匹如身後莫相關。

詠老贈夢得

與君俱老也。自問老何如。

眼澀夜先臥。

頭慵朝未梳。

有時扶杖出。

盡日閉門居。

懶照新磨鏡。

休看小字書。

情於故人重。

跡共少年疎。

唯是閒談興。

相逢尚有餘。

白樂天詩後集卷十四

律詩

凡九十
六首

從同州刺史改授太子少傅分司

承華東署三分務。

履道西池七過春。

歌酒優游聊卒歲。

園林瀟灑可終身。

畱侯爵秩誠虛貴。

疏受生涯未苦貧。

月俸百千官二品。

朝廷雇我作閒人。

張良。疏受並
爲太子少傅。

奉和裴令公新成午橋莊綠野堂卽事

舊徑開桃李。

新池鑿鳳凰。

只添丞相閣。

不改午橋莊。

遠處塵埃少。

閒中日月長。

青山爲外屏。

綠野是前堂。

引水多隨勢。

栽松不趁行。

年華玩風景。

春事看農桑。

花妬謝家妓。

蘭偷荀令香。

遊絲飄酒席。

瀑布澗琴牀。

巢許終身穩。

蕭曹到老忙。

千年落公便。

進退處中央。

時裴加
中書令。

自題小艸亭

新結一茅茨。

規模儉且卑。

土階全壘塊。

山木半畱皮。

陰合連藤架。

藜香近菊籬。

壁宜藜杖倚。

門稱荻簾垂。

窗裏風清夜。

簷閒月好時。

畱連嘗酒客。

勾引坐禪師。

伴宿雙棲鶴。

扶行一侍兒。

綠醅量盞飲。

紅稻約升炊。

齷齪豪家笑。

酸寒富室欺。

陶廬閒自愛。

顏巷陋誰知。

螻蟻謀深穴。

鷓鴣占小枝。

各隨其分足。

焉用有餘爲。

自詠

細故隨緣盡。

衰形具體微。

鬪閒僧尙鬧。

較瘦鶴猶肥。

老遣寬裁襪。

寒教厚絮衣。

馬從銜草輾。

雞任啄籠飛。

只要天和在。

無令物性違。

自餘君莫問。

何是復何非。

新亭病後獨坐招李侍郎公垂

新亭未有客。竟日獨何爲。趁暖泥茶竈。防寒夾竹籬。頭風初定後。眼暗欲明時。淺把三分酒。閒題數句詩。應須置兩榻。一榻待公垂。

閒臥寄劉同州

軟褥短屏風。昏昏醉臥翁。鼻香茶熟後。腰暖日陽中。伴老琴長在。迎春酒不空。可憐閒氣味。唯欠與君同。

殘酌晚餐

閒傾殘酒後。煖擁小爐時。舞看新翻曲。歌聽自作詞。魚香肥潑火。飯細滑流匙。除卻慵饑外。其餘盡不知。

喜見劉同州夢得

紫綬白髭鬚。同平二老夫。論心共牢落。見面且歡娛。酒好攜來否。詩多記得無。應須爲春草。五馬少踟蹰。

裴令公席上贈別夢得

年老官高多別離。轉難相見轉相思。雪銷酒盡梁王起。便是鄒枚分散時。

尋春題諸家園林

閒健朝朝出。乘春處處尋。天供閒日月。人借好園林。漸以狂爲態。都無悶到心。

平生身得所。未省似而今。

又題一絕

貌隨年老欲何如。興遇春牽尙有餘。遙見人家花便入。不論貴賤與親疎。

家園三絕

滄浪峽水子陵灘。路遠江深欲去難。何似家池通小院。臥房階下插魚竿。

【二】

籬下先生時得醉。甕閒吏部暫偷閒。何如家醞雙魚榼。雪夜花時長在前。

【三】

鴛鴦怕捉竟難親。鸚鵡雖籠不著人。何似家禽雙白鶴。閒行一步亦隨身。

老來生計

老來生計君看取。白日遊行夜醉吟。陶令有田唯種黍。鄧家無子不留金。

人閒榮耀因緣淺。林下幽閒氣味深。煩慮漸銷虛白長。一年心勝一年心。

早春題少室東巖

三十六峰晴。雪銷嵐氣生。月留三夜宿。春引四山行。遠草初含色。寒禽未變聲。東巖最高石。唯我有題名。

早春即事

眼重朝眠足。頭輕宿酒醒。陽光滿前戶。雪水半中庭。物變隨天氣。春生逐地形。北簷梅晚白。東岸柳先青。葱壠抽羊角。松巢墮鶴翎。老來詩更拙。吟罷少人聽。

歎春風兼贈李二十侍郎二絕

樹根雪盡催花發。池岸冰消放草生。唯有鬚霜依舊白。春風於我獨無情。

【二】

道場齋戒今初畢。酒伴歡娛久不同。不把一杯來勸我。無情亦得似春風。

春來頻與李二賓客郭外同遊因贈長句

風光引步酒開顏。送老消春嵩洛閒。朝蹋落花相伴出。暮隨飛鳥一時還。我為病叟誠宜退。君是才臣豈合閒。可惜濟時心力在。放教臨水復登山。

二月二日

二月二日新雨晴。草芽菜甲一時生。輕衫細馬春年少。十字津頭一字行。

奉和令公綠野堂種花

綠野堂開占物華。路人指道令公家。令公桃李滿天下。何用堂前更種花。

清明日登老君閣望洛城贈韓道士

風光煙火清明日。歌哭悲歡城市閒。何事不隨東洛水。誰家又葬北邙山。中橋車馬長無已。下渡舟航亦不閒。冢墓纍纍人擾擾。遼東悵望鶴飛還。

三月三日

畫堂三月初三日。絮撲窗紗燕拂簷。蓮子數杯嘗冷酒。柘枝一曲試春衫。階臨池面勝看鏡。戶映花叢當下簾。指點樓南玩新月。玉鉤素手兩纖纖。

雨中聽琴者彈別鶴操

雙鶴分離一何苦。連陰雨夜不堪聞。莫教遷客婦妻聽。嗟嘆悲啼記殺君。

酬鄭二司錄與李六郎中寒食日相過同宴見贈

偶因冷節會嘉賓。況是平生心所親。迎接須矜疏傅老。祇供莫笑阮家貧。杯盤狼藉宜侵夜。風景闌珊欲過春。相對喜歡還悵望。同年只有此三人。

喜與楊六侍御同宿

岸幘靜言明月夜。匡牀閒臥落花朝。二三月裏饒春睡。七八年來不早朝。濁水清塵難會合。高鵬低鷄各逍遙。眼看又上青雲去。更卜同衾一兩宵。

殘春詠懷贈楊慕巢侍郎

位逾三品日。太子少傅位三品。年過六旬時。子今年六十五。不道官班下。其如筋力衰。猶憐好風景。

轉重舊親知。少壯難重得。歡娛且強爲。興來地上酌。醉出袖中詩。靜話開襟久。閒吟放盞遲。落花無限雪。殘鬢幾多絲。莫說傷心事。春翁易酒悲。

閒居春盡

閒泊池舟靜掩扉。老身慵出客來稀。愁應暮雨畱教住。春被殘鶯喚遣歸。揭甕偷嘗新熟酒。開箱試著舊生衣。冬裘夏葛相催促。垂老光陰速似飛。

春盡日天津橋醉吟。偶呈李尹侍郎

宿雨洗天津。無泥未有塵。初晴迎早夏。落照送殘春。興發詩隨口。狂來酒寄身。水邊行窺峩。橋上立逡巡。疏傳心情老。吳公政化新。三川徒有主。風景屬閒人。

池上逐涼二首

青苔地上消殘暑。綠樹陰閒逐晚涼。輕屐單衣薄紗帽。淺池平岸庫藤牀。簪纓怪我情何薄。泉石語君味甚長。徧問交親爲老計。多言宜靜不宜忙。

【二】

窗閒睡足休高枕。水畔閒來上小船。棹遣禿頭奴子撥。茶教纖手侍兒煎。門前便是紅塵地。林外無非赤日天。誰信好風清簟上。更無一事但翛然。

香山避暑二絕

六月灘聲如猛雨。香山樓北暢師房。夜深起凭闌干立。滿耳潺湲滿面涼。

【三】

紗巾草履竹疎衣。晚下香山蹋翠微。一路涼風十八里。臥乘籃輦睡中歸。

老夫

七八年來遊洛都。三分遊伴二分無。風前月下花園裏。處處唯殘个老夫。世事勞心非富貴。人生實事是歡娛。誰能逐我來閒坐。時共酣歌傾一壺。

香山下卜居

老須爲老計。老計在抽簪。山下初投足。人閒久息心。亂藤遮石壁。絕澗護雲林。若要深藏處。無如此處深。

無長物

莫訝家居窄。無嫌活計貧。只緣無長物。始得作閒人。青竹單牀簟。烏紗獨幅巾。其餘皆稱是。亦足奉吾身。

宿香山寺。酬廣陵牛相公見寄

手札八行詩一篇。無由相見但依然。君匡聖主方行道。我事空王正坐禪。支許徒思遊白月。夔龍未放下青天。應須且爲蒼生住。猶去懸車十四年。

牛相公今
年五十七。

以詩代書寄戶部楊侍郎勸買東鄰王家宅

勸君買取東鄰宅。

與我衡門相竝開。

雲映嵩峰當戶牖。

月和伊水入池臺。

林園亦要趁閒置。

筋力應須及健迴。

莫學因循白賓客。

欲年六十始歸來。

贈談客

上客清談何亶亶。

幽人閒思自寥寥。

請君休說長安事。

膝上風清琴正調。

初入香山院對月

太和六年秋作。

老住香山初到夜。

秋逢白月正圓時。

從今便是家山月。

試問清光知不知。

題龍門堰西澗

東岸菊葉西岸柳。

柳陰煙合菊花開。

一條秋水琉璃色。

闊狹纔容小舫迴。

除卻悠悠白少傅。

何人解入此中來。

秋霖中奉裴令公見招早出赴會馬上先寄六韻

雨闇三秋日。

泥深一尺時。

老人平旦出。

自問欲何之。

素書傳好語。

絳帳赴佳期。

續借桃花馬。

催迎楊柳姬。

嘗酒聽歌招客

一甕香醪新插藟。

雙鬟小妓薄能謳。

管絃漸好新教得。

羅綺雖貧免外求。

八月三日夜作

世上貪忙不覺苦。

人閒除醉即須愁。

不知此事君知否。

君若知時從我遊。

露白月微明。

天涼景物清。

草頭珠顆冷。

樓角玉鉤生。

夜衾香有思。

秋簟冷無情。

夢短眠頻覺。

宵長起暫行。

病中贈南鄰覓酒

謹老花先盡。

蓮凋子始成。

四時無了日。

何用嘆衰榮。

曉眠後寄楊戶部

頭痛牙疼三日臥。

妻看煎藥婢來扶。

今朝自校擡頭語。

先問南鄰有酒無。

秋雨夜眠

輾綾腰褥薄綿被。

涼冷秋天穩暖身。

一覺曉眠殊有味。

無因寄與早朝人。

涼冷三秋夜。

安閒一老翁。

臥遲燈滅後。

睡美雨聲中。

曉晴寒未起。

霜葉滿階紅。

喜夢得自馮翊歸洛兼呈令公

上客新從左輔迴。

高陽輿助洛陽才。

已將四海聲名去。

又占三春風景來。

甲子等頭憐共老。文章敵手莫相猜。鄒枚未用爭詩酒。且飲梁王賀喜杯。

齋戒滿夜戲招夢得

紗籠燈下道場前。白日持齋夜坐禪。無復更思身外事。未能全盡世間緣。

明朝又擬親杯酒。今夕先聞理管絃。方丈若能來問疾。不妨兼有散花天。

和令公問劉賓客歸來稱意無之作

水南秋一半。風景未蕭條。卓蓋迴沙苑。籃輿上洛橋。閒嘗黃菊酒。醉唱紫芝謠。

稱意那勞問。請錢不早朝。

酬夢得窮秋夜坐即事見寄

焰細燈將盡。聲遙漏正長。老人秋向火。小女夜縫裳。菊悴籬經雨。萍銷水得霜。

今冬暖寒酒。先擬共君嘗。

偶於維揚牛相公處覓得箏。箏未到。先寄詩來。走筆戲答

來詩云。但愁封寄去。魔物或驚禪。

楚匠饒巧思。秦箏多好音。如能惠一面。何啻直雙金。玉柱調須品。朱絃染要深。

會教魔女弄。不動是禪心。

答夢得秋庭獨坐見贈

林梢隱映夕陽殘。庭際蕭疎夜氣寒。霜草欲枯蟲思急。風枝未定鳥棲難。

容衰見鏡同惆悵。身健逢杯且喜歡。應是天教相煖熱。一時垂老與閒官。

長齋月滿。攜酒先與夢得對酌。醉中同赴令公之宴。戲贈夢得

齋公前日滿三旬。酒榼今朝一拂塵。乘興還同訪戴客。解醒仍對姓劉人。

病心湯沃寒灰活。老面花生朽木春。若怕平原怪先醉。知君未慣吐車茵。

奉酬淮南牛相公思黯見寄二十四韻

每對雙關。分敘兩意。

白老忘機客。牛公濟世賢。鷗棲心戀水。鵬舉翅摩天。累就優閒秩。連操造化權。

貧司甚瀟洒。榮路自喧闐。望苑三千日。台階十五年。是人皆棄忘。何物不陶甄。

雪夜尋僧舍。春朝列妓筵。長齋儼香火。密宴簇花鈿。自覺閒勝鬧。遙知醉笑禪。

是非分未定。會合杳無緣。我正思揚府。君應望洛川。西來風嫋嫋。南去鴈連連。

日落龍門外。潮生瓜步前。秋同一時盡。月共兩鄉圓。舊眷交歡在。新文氣調全。

慙無白雪曲。難答碧雲篇。金谷詩誰賞。燕城賦衆傳。珠應晒魚目。鉛未伏龍泉。

遠訊驚魔物。深情寄酒錢。霜紈一百匹。玉柱十三絃。

楚醴來樽裏。秦箏送耳邊。何時紅燭下。相對一陶然。

吳祕監每有美酒獨酌獨醉。但蒙詩報不以飲招。輒此戲酬。兼呈夢得

蓬山仙客下煙霄。對酒唯吟獨酌謠。不怕道狂揮玉爵。記云。飲玉爵者弗揮。亦曾乘興換金貂。

吳監前任散騎常侍。君稱名士誇能飲。王孝伯云。但當無事。讀離騷。痛飲。即可稱名士。我是愚夫可見招。獨酌謠云。愚夫子不招。

賴有伯倫為醉伴。何愁不解傲松喬。

酬夢得霜夜對月見懷

淒清冬夜景。搖落長年情。月帶新霜色。碓和遠鴈聲。暖憐爐火近。寒覺被衣輕。

枕上酬佳句。詩成夢不成。

初冬月夜得皇甫澤州手札并詩數篇。因遣報書。偶題長句。

清冷玉韻兩三章。落泊銀鈎七八行。心逐報書懸鴈足。夢尋來路遠羊腸。

水南地空多明月。山北天寒足早霜。履道所居在水南。澤州在太行之北地也。最恨潑醅新熟酒。

迎冬不得共君賞。

雪中酒熟。欲攜訪吳監。先寄此詩。

新雪對新酒。憶同傾一杯。自然須訪戴。不必待延枚。雪賦云。延枚叟。陳榻無辭解。

袁門莫懶開。笙歌與談笑。隨事自將來。

酬令公雪中見贈。訝不與夢得同相訪。

雪似鵝毛飛散亂。人披鶴氅立徘徊。鄒生枚叟非無興。唯待梁王召即來。

題酒甕呈夢得

若無清酒兩三甕。爭向白鬚千萬莖。麴蘖銷愁真得力。光陰催老苦無情。

凌煙閣上功無分。伏火爐中藥未成。更擬共君何處去。且來同作醉先生。

迂叟

一辭魏闕就商賓。散地閒居八九春。初時被目為迂叟。近日蒙呼作隱人。

冷煖俗情諳世路。是非閒論任交親。應須繩墨機關外。安置疎愚鈍滯身。

洛下閒居。寄山南令狐相公。

已收身向園林下。猶寄名於祿仕閒。不鍛嵇康彌懶靜。無金疏傅更貧閒。

支分門內餘生計。謝絕朝中舊往還。唯是相君忘未得。時思漢水夢巴山。

惜春贈李尹

春色有時盡。公門終日忙。兩衙但不闕。一醉亦何妨。芳樹花團雪。衰翁鬢撲霜。

知君倚年少。未苦惜風光。

對酒勸令公開春遊宴

時泰歲豐無事日。功成名遂自由身。前頭更有忘憂日。向上應無快活人。

自去年來多事故。從今日去少交親。宜須數數謀歡會。好作開成第二春。

與夢得偶同到敦詩宅感而題壁

山東纔副蒼生願。漢書云。山東出相。川上俄驚逝水波。履道淒涼新宅第。

敦詩宅在履道。修造初成。

宣城零落舊笙歌。崔家妓樂。多歸宣州也。園荒唯有薪堪採。門冷兼無雀可羅。今日相逢偶同到。

傷心不是故經過。

楊六尚書新授東川節度使代妻戲賀兄嫂二絕

劉綱與婦共昇仙。弄玉隨夫亦上天。何似沙哥領崔嫂。碧油幢引向東川。

【二】

金花銀碗饒君用。罽畫羅衣盡嫂裁。覓得黔婁為妹婿。可能空寄蜀茶來。

閒遊卽事

郊野遊行熟。村園次第過。驀山尋澗澗。蹋水渡伊河。寒食青青草。春風瑟瑟波。逢人共杯酒。隨馬有笙歌。勝事經非少。芳辰過亦多。還須自知分。不老擬如何。

六十六

七十欠四歲。此生那足論。每因悲物故。還且喜身存。安得頭長黑。爭教眼不昏。交游成拱木。婢僕見曾孫。瘦覺腰金重。衰憐鬢雪繁。將何理老病。應付與空門。

池上早春卽事招夢得

老更驚年改。閒先覺日長。晴熏榆莢黑。春染柳梢黃。雲破山呈色。冰融水放光。低平穩船舫。輕暖好衣裳。白角三升榼。紅茵六尺牀。偶遊難得伴。獨醉不成狂。我有中心樂。君無外事忙。經過莫慵懶。相去兩三坊。

因夢得題公垂所寄蠟燭因寄公垂

照梁初日光相似。出水新蓮豔不如。卻寄兩條君令取。明年雙引入中書。

宰相入朝。舉雙燭。餘官各一。

令公南莊花柳正盛欲偷一賞先寄二篇

最憶樓花千萬朵。偏憐堤柳兩三株。擬提社酒攜村妓。擅入朱門莫怪無。

映樓桃花。拂堤垂柳。莊上最勝絕處。故舉以爲對。

【二】

可惜亭臺閒度日。欲偷風景暫遊春。只愁花裏鶯鶯舌。飛入宮城報主人。

春夜宴席上戲贈裴淄州

九十不衰真地仙。裴年九十不衰。衰羸。六旬猶健亦天憐。子自謂也。今年相遇鶯花月。

此夜同歡歌笙筵。四座齊聲和絲竹。兩家隨分鬪金鈿。留君到曉無他意。

圖向君前作少年。

贈夢得

年顏老少與君同。眼未全昏耳未聾。放醉臥爲春日伴。趁歡行入少年叢。
尋花借馬煩川守。弄水偷船惱令公。聞道洛城人盡怪。呼爲劉白二狂翁。

晚春欲攜酒尋沈四著作。先以六韻寄之。

病容衰慘澹。芳景晚蹉跎。無計留春得。爭能奈老何。篇章慵報答。杯讌喜經過。
願我酒狂久。負君詩債多。沈前後惠詩十餘首。春來多醉。竟未酬答。今故云爾。敢辭攜綠蟻。只願見青蛾。最憶陽關唱。
真珠一串歌。沈有謔者。善唱。西出。陽關。無故人詞。

三月三日祓禊洛濱

并序。才調集。作祓禊日。遊於斗門亭。

開成二年三月三日。河南尹李待價。以人和歲稔。將禊於洛濱。前一日啓留守裴令公。
令公明日召太子小傅白居易。太子賓客蕭籍。李仍叔。劉禹錫。前中書舍人鄭居中國子
司業裴暉。河南少尹李道樞。倉部郎中崔晉司封員外郎張可績。駕部員外郎盧言。虞部
員外郎苗愔。和州刺史裴儔。淄州刺史裴洽。檢校禮部員外郎楊魯士。四門博士談弘譽
等一十五人。合宴乎舟中。由斗亭。歷魏堤。抵津橋。登臨泝沿。自晨及暮。簪組交映。歌笑閒
發。前水嬉而後妓樂。左筆研而右壺觴。望之若仙。觀者如堵。盡風光之賞。極遊泛之娛。美
景良辰。賞心樂事。盡得于今日矣。若不記錄。謂洛無人。晉公首賦一章。鏗然玉振。願謂四

座繼而和之。居易舉酒抽毫。奉十二韻。以獻

座上作。

三月草萋萋。黃鶯歇又啼。柳橋晴有絮。沙路潤無泥。禊事修初畢。遊人到欲齊。
金鈿耀桃李。絲管駭鳧鷖。轉岸迴船尾。臨流簇馬蹄。鬧翻楊子渡。蹋破魏王堤。
妓接謝公宴。詩陪荀令題。舟同李膺汎。醴爲穆生攜。水引春心蕩。花牽醉眼迷。
塵街從鼓動。煙樹任鴉棲。舞急紅腰軟。歌遲翠黛低。夜歸何用燭。新月鳳樓西。

同夢得寄賀東西川二楊尚書

龍節對持真可愛。鴈行相接更堪誇。兩川風景同三月。千里江山屬一家。
魯衛定知連氣色。潘楊亦覺有光華。子與二公。皆忝姻戚。應憐洛下分司伴。冷宴閒遊老看花。

喜小樓西新柳抽條

一行弱柳前年種。數尺柔條今日新。漸欲拂他騎馬客。未多遮得上樓人。
須教碧玉羞眉黛。莫與紅桃作麴塵。爲報金堤千萬樹。饒伊未敢苦爭春。

春晚酒醒尋夢得

料合同惆悵。花殘酒亦殘。醉心忘老易。醉眼別春難。獨出雖慵懶。相逢定喜歡。
還攜小蠻去。試覓老劉看。小蠻。酒榭名也。

感事

服氣崔常侍。晦叔。燒丹鄭舍人。居常。期生羽翼。那忽化灰塵。每遇淒涼事。還思潦倒身。唯知趁杯酒。不解鍊金銀。睡適三尸性。慵安五藏神。無憂亦無喜。六十六年春。

和裴令公南莊絕句。裴云。野人不識中書令。喚作陶家與謝家。

陶廬僻陋那堪比。謝墅幽微不足攀。何似嵩峰三十六。長隨申甫作家山。

宅西有流水。牆下構小樓。臨翫之時頗有幽趣。因命歌酒聊以自娛。

獨醉獨吟。偶題五絕。

伊水分來不自由。無人解愛爲誰流。家家拋向牆根底。唯我栽蓮越小樓。

【二】

水色波文何所似。麴塵羅帶一條斜。莫言羅帶春無主。自置樓來屬白家。

【三】

日灑水光搖素壁。風飄樹影拂朱欄。皆言此處宜絃管。試奏霓裳一曲看。

【四】

霓裳試罷唱梁州。紅袖斜翻翠黛愁。應是遙聞勝近聽。行人欲過盡迴頭。

【五】

獨醉還須得歌舞。自娛何必要親賓。當是一部清商樂。亦不長將樂外人。

偶作

籃舁出即忘歸舍。柴戶昏猶未掩關。聞客病時慙體健。見人忙處覺心閒。

清涼秋寺行香去。和暖春城拜表還。木鴈一篇須記取。致身才與不才閒。

同夢得酬牛相公初到洛中小飲見贈。時牛相公初罷揚州節度。就拜東都留守。

淮南揮手拋紅旆。洛下迴頭向白雲。政事堂中老丞相。制科場裏舊將軍。

宮城煙月饒全占。關塞風光請半分。詩酒放狂猶得在。莫欺白叟與劉君。

幽居早秋閒詠

幽僻置塵外。清涼水木閒。臥風秋拂簾。步月夜開關。且得身安泰。從他世險艱。

但休爭要路。不必入深山。軒鶴畱何用。泉魚放不還。誰人知此味。臨老十年閒。

和令狐僕射小飲聽阮咸

掩抑復淒清。非琴不是箏。還彈樂府曲。別占阮家名。古調何人識。初聞滿座驚。

落盤珠歷歷。搖珮玉琤琤。似勸杯中物。如含林下情。時移音律改。豈是昔時聲。

燒藥不成。命酒獨醉

白髮逢秋王。丹砂見火空。不能畱姹女。爭免作衰翁。賴有杯中綠。能爲面上紅。少年心不遠。只在半酣中。

送盧郎中赴河東裴令公幕

別時暮雨洛橋岸。到日涼風汾水波。苟令君應問我。爲言秋草閉門多。

送李滁州

君於覺路深畱意。我亦禪門薄致功。未悟病時須去病。已知空後莫依空。

白衣臥病嵩山下。卓蓋行春楚水東。誰道三年千里別。兩心同在道場中。

長齋月滿寄思黯

一日不見如三月。一月相思如七年。似隔山河千里地。仍當風雨九秋天。

明朝齋滿相尋去。挈榼抱衾同醉眠。

冬夜對酒寄皇甫十

霜殺中庭草。冰生後院池。有風空動樹。無葉可辭枝。十月苦長夜。百年強半時。

新開一瓶酒。那得不相思。

歲除夜對酒

衰翁歲除夜。對酒思悠然。草白經霜地。雲黃欲雪天。醉依香枕坐。慵傍暖爐眠。

洛下閒來久。明朝是十年。

白樂天詩後集卷十五

律詩

凡七十
五首

寄獻北都畱守裴令公

并序○今本遺此一行誤以序爲題

司徒令公分守東洛移鎮北都。一心勤王。三月成政。形容盛德實在歌詩。況辱知音。敢不先唱。輒奉五言四十韻寄獻以抒下情。

天上中台正。人閒一品高。中書令上應中台。司徒官一品。休明值堯舜。勳業過蕭曹。始擅文三捷。

進士及第。博學制策。連登三科。終兼武六韜。動人名赫赫。憂國意忉忉。盪蔡擒封豕。吳元濟也。

平齊斬巨鼉。李師道也。兩河收土宇。四海定波濤。寵重移宮籥。自東都畱守。授北京畱守。并州士馬豪。

恩新換闔旒。保釐東宅靜。周公召公東治洛宅。守護北門牢。晉國封疆濶。并州士馬豪。

胡兵驚赤幟。邊鴈避烏號。令下流如水。仁霑澤似膏。路喧歌五袴。軍醉感單膠。

將校森貔武。賓僚儼雉髦。客無煩夜柝。吏不犯秋毫。神在臺駘助。魂亡獫狁逃。

德星銷彗孛。霖雨滅腥臊。烽戍高臨代。關河遠控洮。汾雲晴漠漠。朔吹冷騷騷。

豹尾交衙戟。蚪鬚捧佩刀。通天白犀帶。照地紫麟袍。羌管吹楊柳。燕姬酌蒲萄。

蒲萄酒出太原。銀含鑿落盞。金屑琵琶槽。遙想從軍樂。應忘報國勞。紫微留北闕。

中書令。即紫微令也。綠野寄東臯。綠野堂在東都午橋莊也。忽憶前時會。多慙下客叨。清屑陪讌話。

美景從遊遨。花月還同賞。琴詩雅自操。朱紘拂宮徵。洪筆振風騷。近竹開方丈。

依林架桔槔。春池八九曲。畫舫兩三艘。徑滑苔粘屐。潭深水沒篙。綠絲縈岸柳。

紅粉映樓桃。皆午橋莊中景物之佳者。為穆先陳醴。居易每十齋日。在會常蒙以二勒湯代酒也。招劉共藉糟。劉夢得也。

舞鬢金翡翠。歌頸玉螭螭。盛德終難過。明時豈易遭。公雖慕張范。張良。范蠡。

帝未捨伊臯。眷戀心方結。踟躕首已搔。鸞鳳上寥廓。燕雀住蓬蒿。欲獻文狂簡。

徒煩思鬱陶。可憐四百字。輕重抵鴻毛。

和東川楊慕巢尚書府中獨坐感成在懷見寄十四韻

我是知君者。君今意若何。窮通時不定。苦樂事相和。東蜀歡殊渥。西江歎逝波。

只緣榮貴極。翻使感傷多。行斷風驚鴈。慕巢及楊九楊十。前年來兄弟三人。各在一處。年侵日下坡。片心休慘戚。

雙鬢已蹉跎。紫綬黃金印。青幢白玉珂。老將榮補貼。愁用道銷磨。外府饒杯酒。

中堂有綺羅。應須引滿飲。何不放狂歌。錦水通巴峽。香山對洛河。將軍馳鐵馬。

少傅步銅駝。深契憐松竹。高情憶薜蘿。懸車年甚遠。未敢故相過。

分司洛中多暇。數與諸客宴遊。醉後狂吟。偶成十韻。因招夢得賓客。兼呈

思黯奇章公。

性與時相遠。身將世兩忘。寄名朝士籍。寓興少年場。老豈無談笑。貧猶有酒漿。

隨時求伴侶。逐日用風光。數數遊何爽。些些病未妨。天教榮啓樂。人恕接輿狂。

改業為逋客。移家住醉鄉。不論招夢得。兼擬誘奇章。要路風波險。權門市井忙。

世閒無可戀。不是不思量。

小歲日喜談氏外孫女孩滿月

今日夫妻喜。他人豈得知。自嗟生女晚。敢訝見孫遲。物以稀為貴。情因老更慈。

新年逢吉日。滿月乞名時。因名引珠。桂燎熏花果。蘭湯洗玉肌。懷中有可抱。何必是男兒。

閒吟贈皇甫郎中親家翁

新與皇甫結姻。誰能嗟嘆光陰暮。豈復憂愁活計貧。忽忽不知頭上事。時時猶憶眼中人。

早為良友非交勢。晚接嘉姻不失親。最喜兩家婚嫁畢。一時抽得向平身。

夢得臥病攜酒相尋先以此寄

病來知少客。誰可以為娛。日晏開門未。秋寒有酒無。自宜相慰問。何必待招呼。

小疾無妨飲。還須挈一壺。

酬思黯戲贈

鍾乳三千兩。金釵十二行。妬他心似火。欺我鬢如霜。
慰老資歌笑。銷愁仰酒漿。眼看狂不得。狂得且須狂。

思黯自誇。前後服鍾乳三千兩。甚得力。而
歌舞之妓頗多。來詩戲予羸老。故戲答之。

又戲答絕句 來句云。不是道公狂不
得。恨公逢我不教狂。

狂夫與我世相忘。故態些些亦不妨。縱酒放歌聊自樂。接輿爭解教人狂。

令狐相公與夢得交情素深。眷予分亦不淺。一聞薨逝。相顧泫然。旋有使

來。得前月未歿之前數日書及詩寄贈。夢得哀吟悲歎。寄情於詩。詩成示

予。感而繼和

緘題重疊語殷勤。存歿交親自此分。前月使來猶理命。今朝詩到是遺文。

銀鈎見晚書無報。玉樹埋深哭不聞。最感一行絕筆字。尙言千萬樂天君。

令狐與夢得手札後云。見
樂天君。爲伸千萬之誠也。

洛下雪中頻與劉李二賓客宴集。因寄汴州李尙書

水南水北總紛紛。雪裏歡遊莫厭頻。日日聞來唯老病。年年少去是交親。

碧氈煖梅花濕。紅燎爐香竹葉春。今日鄒枚俱在洛。梁園置酒召何人。

看夢得題答李侍郎詩。詩中有文星之句。因戲和之

看題錦繡報瓊瓊。俱是人天第一才。好遣文星守躔次。亦須防有客星來。

閒適

俸祿優饒官不卑。就中閒適是分司。風光煖助遊行處。雨雪寒供飲宴時。

肥馬輕裘還且有。麤歌薄酒亦相隨。微躬所要今皆得。只是蹉跎得校遲。

戲答思黯 思黯有能事者。
以此戲之。

何時得見十三絃。待取無雲有月天。願得金波明似鏡。鏡中照出月中仙。

裴詩云。君若有心求逸足。我還留意在
名姝。蓋引妾換馬。戲意亦有所屬也。

安石風流無奈何。欲將赤驥換青蛾。不辭便送東山去。臨老何人與唱歌。

新歲贈夢得

暮齒忽將及。同心私自憐。漸衰宜減食。已喜更加年。紫綬行聯袂。籃輿出比肩。

與君同甲子。歲酒合誰先。

早春持齋答皇甫十見贈

正月晴和風氣新。紛紛已有醉遊人。帝城花笑長齋客。三十年來負早春。

戲贈夢得兼呈思黯

霜鬢莫欺今老矣。傳曰。今老矣。
無能爲也。一杯莫笑便陶然。陳郎中處爲高戶。裴使君前作少年。

陳商郎中。酒戶涓滴。裴洽使君。年九十餘。
顧我獨狂多自哂。與君同病最相憐。月終齋滿誰開素。須記奇章置一筵。

早春憶遊思黯南莊。因寄長句。

南莊勝處心常憶。借問軒車早晚遊。美景難忘竹廊下。好風爭奈柳橋頭。冰消見水多於地。雪霽看山盡入樓。若待春深始同賞。鶯殘花落卻堪愁。

酬皇甫十早春對雪見贈

漠漠復雰雰。東風散玉塵。明催竹窗曉。寒退柳園春。綠醞香堪憶。紅爐煖可親。忍心三兩日。莫作破齋人。

奉和思黯自題南莊見示兼呈夢得

謝家別墅最新奇。山展屏風花夾籬。曉月漸沈橋脚底。晨光初照屋梁時。臺頭有酒鶯呼客。水面無塵風洗池。除卻吟詩兩閒客。此中情狀更誰知。

送斬春李十九使君赴郡

可憐官職好文詞。五十專城未是遲。曉日鏡前無白髮。春風門外有紅旗。郡中何處堪攜酒。席上誰人解和詩。唯共交親開口笑。知君不及洛陽時。

自題酒庫

野鶴一辭籠。虛舟長任風。送愁還鬧處。移老入閒中。身更求何事。天將富此翁。此翁何處富。酒庫不曾空。劉仁執詩云。天將富此翁。以一醉為富也。

寒食日寄楊東川

不知楊六逢寒食。作底歡娛過此辰。兜率寺高宜望月。嘉陵江近好遊春。蠻旗似火行隨馬。蜀妓如花坐遶身。不使黔婁夫婦看。誇張富貴向何人。

醉後聽唱桂花曲

詩云。遙知天上桂花孤。試問嫦娥更有無。月宮幸有閒田地。何不中央種兩株。此曲韻怨切。聽輒感人。故云爾。

桂華詞意苦丁寧。唱到嫦娥醉便醒。此是人閒腸斷曲。莫教不得意人聽。

酬夢得以予五月長齋延僧徒絕賓友見戲十韻

賓客懶逢迎。翛然池館清。簷閒空燕語。林靜未蟬鳴。葷血還休食。杯觴亦罷傾。三春多放逸。五月暫修行。香印朝煙細。紗燈夕焰明。交游諸長老。師事古先生。竺乾古先生也。禪後心彌寂。齋來體更輕。不唯忘肉味。兼擬滅風情。蒙以聲聞待。難將戲論爭。虛空若有佛。靈運恐先成。

又和令公新開龍泉晉水二池

舊有潢汚泊。今為白水塘。詩云。方塘含白水。笙歌聞四面。樓閣在中央。春變煙波色。晴添樹木光。龍泉信為美。莫忘午橋莊。

早夏曉興贈夢得

窗明簾薄透朝光。臥整巾簪起下牀。背壁燈殘經宿焰。開箱衣帶隔年香。無情亦任他春去。不醉爭銷得晝長。一部清商一壺酒。與君明日煖新堂。

春日題乾元寺上方最高峰亭

危亭絕頂四無鄰。見盡三千世界春。但覺虛空無障礙。不知高下幾由旬。迴看官路三條線。卻望都城一片塵。賓客暫遊無半日。王侯不到便終身。始知天造空閒境。不為忙人富貴人。

奉和思黯相公以李蘇州所寄太湖石奇狀絕倫因題二十韻見示兼呈夢得

錯落復崔嵬。蒼然玉一堆。峰駢仙掌出。罅坼劒門開。峭頂高危矣。盤根下壯哉。精神欺竹樹。氣色壓亭臺。隱起磷磷狀。凝成瑟瑟胚。廉稜露鋒刃。清越扣瓊瑰。炭葉形將動。巍峩勢欲摧。奇應潛鬼怪。靈合蓄雲雷。黛潤霑新雨。斑明點古苔。未曾棲鳥雀。不肯染塵埃。尖削琅玕笋。窪剜瑪瑙壘。海神移碣石。畫障簇天台。在世為尤物。如人負逸才。渡江一葦載。入洛五丁推。出處雖無意。升沈亦有媒。拔從水府底。置向相庭隈。對稱吟詩句。看宜把酒杯。終隨金礦用。不學玉山頹。疏傅心偏愛。園公眼屢迴。共嗟無此分。虛管太湖來。居易與夢得俱典姑蘇州。

奉和思黯相公雨後林園四韻見示

新晴夏景好。復此池邊地。煙樹綠含滋。水風清有味。便成林下隱。都忘門前事。騎吏引歸軒。始知身富貴。

晚夏閒居絕無賓客欲尋夢得先寄此詩

魚笋朝餐飽。蕉紗暑服輕。欲為窗下寢。先傍水邊行。晴引鶴雙舞。秋生蟬一聲。無人解相訪。有酒共誰傾。老更諳時事。閒多見物情。只應劉與白。二叟自相迎。

寄李蘄州

下車書奏冀黃課。動筆詩傳鮑謝風。蘄州出好笛并蘄葉簞。江郡謳謠誇杜母。洛城歡會憶車公。不道蘄州歌酒少。

使君難稱與誰同。

酬思黯公晚夏雨後感秋見示

暮去朝來無歇期。炎涼暗向雨中移。夜長祇合愁人覺。秋冷先應瘦客知。兩幅彩箋揮逸翰。一聲寒玉振清辭。無憂無病身榮貴。何故沈吟亦感時。

久雨閒悶對酒偶吟

淒淒苦雨闇銅駝。嫋嫋涼風起漕河。自夏及秋晴日少。從朝至暮悶時多。

鷺臨池立窮魚筍。

隼傍林飛拂雀羅。

賴有杯中神聖物。

百憂無奈十分何。

雨後秋涼

夜來秋雨後。秋氣颯然新。團扇先辭手。生衣不著身。更添砧引思。難與簞相親。此境誰偏覺。貧閒老瘦人。

酬夢得早秋夜對月見寄

吾衰寡情趣。君病懶經過。其奈西樓上。新秋明月何。庭蕪淒白露。池色澹金波。況是初長夜。東城砧杵多。

題謝公東山障子

賢愚共在浮生內。貴賤同趨羣動間。多見忙時已衰病。少聞健日肯休閒。鷹饑受縲從難退。鶴老乘軒亦不還。拂衣攜妓入東山。

謝楊東川寄衣服

年年衰老交遊少。處處蕭條書信稀。唯有巢兄不相忘。春茶未斷寄秋衣。

詠懷寄皇甫朗之

老大多情足往還。招僧待客夜開關。學調氣後衰中健。不用心來鬧處閒。養病未能辭薄俸。忘名何必入深山。與君別有相知分。同置身於木雁閒。

東城晚歸

一條筇杖懸龜榼。雙角吳童控馬銜。晚入東城誰識我。短靴低帽白蕉衫。

與夢得沽酒閒飲且約後期

少時猶不憂生計。老後誰能惜酒錢。共把十千沽一斗。相看七十欠三年。

閒徵雅令窮經史。醉聽清吟勝管絃。更待菊黃家醞熟。共君一醉一陶然。

與牛家妓樂雨夜合宴

玉管清絃聲旖旎。翠釵紅袖坐參差。兩家合奏洞房夜。八月連陰秋雨時。

歌臉有情凝睇久。舞腰無力轉裙遲。人閒歡樂無過此。上界西方即不知。

和楊六尚書喜兩弟漢公轉吳興魯士賜章服命賓開宴用慶恩榮賦長句見示

華筵賀客日紛紛。劍外歡娛洛下聞。朱紱寵光新照地。彫轡喜氣遠凌雲。

榮聯花萼詩難和。樂助瓊簾酒易醺。感羨料應知我意。今生此事不如君。

自詠

鬢白面微紅。醺醺半醉中。百年隨手過。萬事轉頭空。臥疾瘦居士。行歌狂老翁。仍聞好事者。將我畫屏風。

夢得相過援琴命酒因彈秋思偶詠所懷兼寄繼之待價二相府

閒居靜侶偶相招。小飲初酣琴欲調。我正風前弄秋思。君應天上聽雲韶。
雲韶雅曲。上多與宰相同聽之。
時和始見陶鈞力。物遂方知盛聖朝。雙鳳棲梧魚在藻。飛沈隨分各逍遙。

九月八日酬皇甫十見贈

君方對酒綴詩章。我正持齋坐道場。處處追遊雖不去。時時吟詠亦無妨。
霜蓬舊鬢三分白。露菊新花一半黃。惆悵東籬不同醉。陶家明日是重陽。
慕巢尚書書云。室人欲爲置一歌者。非所安也。以詩相報。因而和之。

東川已過二三春。南國須求一兩人。富貴大都多老大。歡娛大半爲親賓。

如愁翠黛應堪重。買笑龍金莫訴貧。他日相逢一杯酒。樽前還要落梁塵。

杪秋獨夜

無限少年非我伴。可憐清夜與誰同。歡娛牢落中心少。親故凋零四面空。
紅葉樹飄風起後。白鬚人立月明中。前頭更有蕭條物。老菊衰蘭三兩叢。

憑李睦州訪徐凝山人

凝即睦州之民也。

郡守輕詩客。鄉人薄釣翁。解憐徐處士。唯有李郎中。

蘇州故吏

江南故吏別來久。今日池邊識我無。不獨使君頭似雪。華亭鶴死白蓮枯。

蓮鶴皆蘇州同來。

得揚湖州書。頗誇撫民接賓縱。酒題詩。因以絕句戲之。

豈獨愛民兼愛客。不唯能飲又能文。白蘋洲上春傳語。柳使君輸楊使君。

天宮閣秋晴晚望

洛城秋霽後。梵閣暮登時。此日風煙好。今秋節候遲。霞光紅泛豔。樹影碧參差。
莫慮言歸晚。牛家有宿期。

酬夢得暮秋晴夜對月相憶

露月光如練。盈庭復滿池。秋深無熱後。夜淺未寒時。露葉團荒菊。風枝落病梨。
相思懶相訪。應是各年衰。

同夢得和思黯見贈來詩中先敘三人同讌之歡。次有歎髮髮漸衰嫌孫

子催老之意。因酬妍唱兼吟鄙懷。

醉伴騰騰白與劉。何朝何夕不同遊。甃連燈下明猶飲。斷送樽前倒卽休。

催老莫嫌孫稚長。加年須喜鬢毛秋。教他伯道爭存活。無子無孫亦白頭。

聽歌

管妙絃清歌入雲。老人合眼醉醺醺。誠知不及當年聽。猶覺聞時勝不聞。

三年冬隨事鋪設小堂寢處稍以穩煖因念衰病偶吟所懷

小宅非全陋。中堂不甚卑。聊堪會親族。足以貯妻兒。煖帳迎冬設。溫爐向夜施。

裘新青兔褐。褥軟白猿皮。似鹿眠深草。如雞宿穩枝。逐身安枕席。隨事有屏帷。

病致衰殘早。貧營活計遲。由來蠶老後。方是繭成時。

初冬卽事呈夢得

青氈帳煖喜微雪。紅地爐深宜早寒。走筆小詩能和否。潑醅新酒試嘗看。

僧來乞食因畱宿。客到開樽便共歡。臨老交親零落盡。希君恕我取人寬。

自罷河南已換七尹。每一入府悵然舊遊。因宿內廳偶題西壁兼呈韋尹常侍

每日河南府。依然似到家。杯嘗七尹酒。七尹酒味不同。備嘗之矣。樹看十年花。卽府中新果園。

且健須歡喜。雖衰莫歎嗟。迎門無故吏。侍坐有新娃。煖閣謀宵宴。寒庭放晚衙。

主人畱宿定。一任夕陽斜。

天寒晚起引酌詠懷寄許州王尚書汝州李常侍

葉覆冰池雪滿山。日高慵起未開關。寒來更亦無過醉。老後何由可得閒。

四海故交唯許汝。十年貧健是樊蠻。相思莫忘櫻桃會。一放狂歌一破顏。

櫻桃花時。數與許汝二君。歡會甚樂。

四年春

柳梢黃嫩草芽新。又入開成第四春。近日放慵多不出。少年嫌老可相親。

分司吉傅頻過舍。致仕崔卿擬卜鄰。時輩推遷年事到。往還多是白頭人。

白髮

白髮生來三十年。而今鬚鬢盡皤然。歌吟終日如狂叟。衰疾多時似瘦仙。

八戒夜持香火印。三元朝念藥珠篇。其餘便被春收拾。不作閒遊卽醉眠。

追歡偶作

追歡逐樂少閒時。補貼平生得事遲。何處花開曾後看。誰家酒熟不先知。

石樓月下吹蘆管。金谷風前舞柳枝。十聽春啼變鶯舌。三嫌老醜換蛾眉。

樂天一過難知分。猶自咨嗟兩鬢絲。蘆管柳枝已下。皆十年來洛中之事。

公垂尚書以白馬見寄光潔穩善以詩謝之

翩翩白馬稱金羈。領綴銀花尾曳絲。毛色鮮明人盡愛。性靈馴善主偏知。

免將妾換慙來處。試使奴牽欲上時。不蹶不驚行步穩。最宜山簡醉中騎。

西樓獨立

身著白衣頭似雪。

時時醉立小樓中。

路人迴顧應相怪。

十一年來見此翁。

書事詠懷

官俸將生計。雖貪豈敢嫌。

金多輸陸賈。

酒足勝陶潛。

陶潛詩云。常苦酒不足。

牀煖僧敷坐。

樓晴妓卷簾。日遭齋破用。

每月常持十齋。

春賴閨加添。

是年閨正月也。

老向歡彌切。

狂於飲不廉。十年閒未足。亦恐涉無厭。

酬夢得比萱草見贈

來篇云。唯君比萱草。相見可忘憂。

杜康能散悶。萱草解忘憂。

借問萱逢杜。

何如白見劉。

老衰勝少夭。

閒樂笑忙愁。

借問同年內。何人得白頭。

問皇甫十

苦樂心由我。窮通命任他。

坐傾張翰酒。

行唱接輿歌。

榮盛傍看好。

優閒自適多。

知君能斷事。勝負兩如何。

早春獨登天宮閣

天宮日煖閣門開。

獨上迎春飲一杯。

無限遊人遙怪我。

緣何最老最先來。

送蘇州李使君赴郡二絕句

憶拋印綬辭吳郡。

衰病當時已有餘。

今日賀君兼自喜。

八迴看換舊銅魚。

予自罷蘇州及茲換八刺史矣。

【二】

館娃宮深春日長。

館娃宮。今靈巖寺也。

烏鵲橋高秋夜涼。

烏鵲橋。在蘇州南門。

風月不知人世變。奉君直似

奉吳王。

長洲曲新詞

茂苑綺羅佳麗地。

女湖桃李豔陽時。

心奴已死胡容老。

後輩風流是阿誰。

白樂天詩後集卷十六

律詩

凡一百首

病中詩并序

開成己未歲。余蒲柳之年六十有八。冬十月甲寅旦。始得風痺之疾。體目眩。左足不支。蓋老病相乘時而至耳。余早棲心釋梵。浪跡老莊。因疾觀身。果有所得。何則。外形骸而內忘憂恚。先禪觀而後順醫治。旬月以還。厥疾少閒。杜門高枕。澹然安閒。吟諷興來。亦不能遏。因成十五首。題為病中詩。且貽所知。兼用自廣。昔劉公幹病漳浦。謝康樂臥臨川。咸有

篇章抒詠其志。今引而序之者。慮不知我者加詰焉。

初病風

六十八衰翁。乘衰百疾攻。朽株難免蠹。空穴易來風。肘痺宜生柳。頭旋劇轉蓬。恬然不動處。虛白在胸中。

枕上作

風疾侵凌臨老頭。血凝筋滯不調柔。甘從此後支離臥。賴是從前爛熯遊。迴思往事紛如夢。轉覺餘生杳若浮。浩氣自能充靜室。驚飈何必蕩虛舟。腹空先進松花酒。膝冷重裝桂布裘。若問樂天憂病否。樂天知命了無憂。

答開上人來問因何風疾

一牀方丈向陽開。勞動文殊問疾來。欲界凡夫何足道。四禪天始免風災。色界四天。初禪無二火災。三禪無二水災。四禪無二風災也。

病中五絕句

世間生老病相隨。此事心中久自知。今日行年將七十。猶須慙愧病來遲。
【一】
方寸成灰鬢作絲。假如強健亦何爲。家無憂累身無事。正是安閒好病時。
【二】

李君墓上松應拱。元相池頭竹盡枯。李元皆子執友也。杓直少子八歲。即世已九年。微之少子七年。薨已八年矣。今子始病。得非幸乎。

多幸樂天今始病。

不知合要苦治無。

【四】

目昏思寢即安眠。足軟妨行便坐禪。

身作醫王心是藥。

不勞和扁到門前。

【五】

交親不要苦相憂。亦擬時時強出遊。

但有心情何用脚。

陸乘肩輿水乘舟。

送嵩客

登山臨水分無期。泉石煙霞今屬誰。

君到嵩陽吟此句。

與教三十六峰知。

罷灸

病身佛說將何喻。變滅須臾豈不聞。

莫遣淨名知我笑。

休將火艾灸浮雲。

維摩經云。是身如浮雲。須臾變滅也。

賣駱馬

五年花下醉騎行。臨賣迴頭嘶一聲。

項籍顧驢猶解歎。

樂天別駱豈無情。

別柳枝

兩枝楊柳小樓中。嫋娜多年伴醉翁。

明日放歸歸去後。

世間應不要春風。

就暖偶酌戲諸詩酒舊侶

白樂天詩後集卷十六

低屏軟褥臥藤牀。鼻向前軒就日陽。一足任他爲外物。三杯自要沃中腸。頭風若見詩應愈。齒折仍誇笑不妨。細酌徐吟猶得在。舊遊未必便相忘。

歲暮呈思黯相公皇甫朗之及夢得尙書

歲暮幡然一老夫。十分流輩九分無。莫嫌身病人扶侍。猶勝無身可遣扶。

自解

房傳往世爲禪客。世傳房太尉前生爲禪僧。與妻師德友善。慕其爲人。故今生有妻之遺風也。王道前生應畫師。王右丞詩云。宿世是詞客。前生應畫師。

我亦定中觀宿命。多生債負是歌詩。不然何故狂吟詠。病後多於未病時。

已上病中十五首。

歲暮病懷贈夢得。時與夢得同患足疾。

十年四海故交親。零落唯殘兩病身。共遣數奇從是命。同教步蹇有何因。眼隨老減嫌長夜。體待陽舒望早春。新樂堂前舊池上。相過亦不要他人。

雪後過集賢裴令公舊宅有感

梁王捐館後。枚叟過門時。有淚人還泣。無情雪不知。臺亭畱盡在。賓客散何之。

唯有蕭條鴈。時來下故池。

酬夢得貧居詠懷見贈

歲陰生計兩蹉跎。相顧悠悠醉且歌。厨冷難畱鳥止屋。詩云。瞻鳥爰止。于誰之屋。言鳥多止富家之屋也。日望揮金賀新命。

門閉可與雀張羅。病添莊舄吟聲苦。貧欠韓康藥債多。

來篇云。若有金揮勝二疏。俸錢依舊又如何。時夢得罷賓客。除祿監祿俸略同。故云。

酬夢得見喜疾瘳

暖臥摩綿褥。晨傾藥酒螺。昏昏布裘底。病醉睡相和。未疾徒云爾。傳云。風淫未疾。未謂四肢。

餘年有幾何。須知差與否。相去校無多。

夜聞箏中彈瀟湘神曲感舊

縹緲巫山女。歸來七八年。殷勤湘水曲。畱在十三絃。苦調吟還出。深情咽不傳。萬重雲水思。今夜月明前。

感蘇州舊舫

畫梁朽折紅窗破。獨立池邊盡日看。守得蘇州船舫爛。此身爭合不衰殘。

感舊石上字

閒撥船行尋舊池。幽情往事復誰知。太湖石上鐫三字。十五年前陳結之。

見敏中初到邠寧秋日登城樓詩。詩中頗多鄉思。因以寄和。從殿中侍御史。出副邠寧。

想爾到邊頭。蕭條正值秋。二年貧御史。八月古邠州。絲管聞雖樂。風沙見亦愁。

望鄉心若苦。不用數登樓。

齋戒

每日齋戒斷葷腥。

漸覺塵勞染愛輕。

六賊定知無氣色。

三尸應恨少恩情。

酒魔降伏終須盡。

詩債填還亦欲平。

從此始堪為弟子。

竺乾師是古先生。

戲禮經老僧

香火一爐燈一盞。

白頭夜禮佛名經。

何年飲著聲聞酒。

直到如今醉未醒。

近見慕巢尚書詩。中屢有歎老思退之意。又於洛下新置郊居然寵寄方

深。歸心大速。因以長句戲而諭之

近見詩中歎白髮。

遙知闔外憶東都。

煙霞偷眼窺來久。

富貴粘身擺得無。

新置林園猶濩落。

未終婚嫁且踟躕。

應須待到懸車歲。

然後東歸伴老夫。

對鏡偶吟贈張道士抱元

閒來對鏡自思量。

年貌衰殘分所當。

白髮萬莖何所怪。

丹砂一粒不曾嘗。

眼昏久被書料理。

肺渴多因酒損傷。

今日逢師雖已晚。

枕中治老有何方。

病入新正

枕上驚新歲。

花前念舊歡。

是身老所逼。

非意病相干。

風月情猶在。

杯觴興漸闌。

便休心未伏。更試一春看。

臥疾來早晚

臥疾來早晚。懸懸將十旬。

婢能尋本草。

犬不吠醫人。

酒甕全生醜。

歌筵半委塵。

風光還欲好。爭向枕前春。

強起迎春戲寄思黯

杖策人扶廢病身。

晴和強起一迎春。

他時蹇跛縱行得。

笑殺平原樓上人。

夢得前所酬篇有鍊盡美少年之句。因思往事兼詠今懷。重以長句答之

鍊盡少年成白首。

憶初相識到今朝。

昔饒春桂長先折。

今伴寒松取後凋。

生事縱貧猶可過。

風情雖老未全銷。

聲華寵命人皆得。

若箇如君歷七朝。

病後寒食

故紗絳帳舊青氈。

藥酒醺醺引醉眠。

抖擻弊袍春晚後。

摩挲病脚日陽前。

行無筋力尋山水。

坐少精神聽管絃。

拋擲風光負寒食。

曾來未省似今年。

老病相仍。以詩自解

榮枯憂喜與彭殤。

都似人閒戲一場。

蟲臂鼠肝猶不怪。

雞膚鶴髮復何傷。

昨因風發甘長往。今遇陽和又小康。春暖來風。痺稍退也。還似遠行裝束了。遲廻且住亦何妨。

皇甫郎中親家翁赴任絳州宴送出城贈別

慕賢入室交先定。結援通家好復成。新婦不嫌貧活計。嬌孫同慰老心情。

洛橋歌酒今朝散。絳路風煙幾日行。欲識離羣相戀意。爲君扶病出都城。

春 暖

風痺宜和暖。春來脚校輕。鶯留花下立。鶴引水邊行。髮少嫌巾重。顏衰訝鏡明。

不論親與故。自亦味平生。

殘春晚起伴客笑談

掩戶下簾朝睡足。一聲黃鳥報殘春。披衣岸幘日高起。兩角青衣扶老身。

策杖強行過里巷。引杯閒酌伴親賓。莫言病後妨談笑。猶恐多於不病人。

送唐州崔使君侍親赴任

連持使節歷專城。獨賀崔侯最慶榮。烏府一拋霜簡去。朱輪四從板輿行。

崔郎中從殿中運典。四郡皆侍親赴任。發時止許沙鷗送。到日方乘竹馬迎。唯慮郡齋賓友少。

數杯春酒共誰傾。

春晚詠懷贈皇甫朗之

豔陽時節又蹉跎。遲暮光陰復若何。一歲中分春日少。百年通計老時多。

多中更被愁牽引。少裏兼遭病折磨。賴有銷憂治悶藥。君家醞耐我狂歌。

春盡日宴罷感事獨吟 開成五年三月三十日作。

五年三月今朝盡。客散筵空獨掩扉。病共樂天相伴住。春隨樊素一時歸。

閒聽鶯語移時立。思逐楊花觸處飛。金帶縋腰衫委地。年年衰瘦不勝衣。

病中辱崔宣城長句見寄兼有餽綺之贈。因以四韻總而酬之

劉楨病發經春臥。謝朓詩來盡日吟。三道舊誇收片玉。昔予考制策。崔君登科也。

一章新喜獲雙金。信題霞綺絨情重。酒試銀觥表分深。科第門生滿霄漢。

歲寒少得似君心。

前有別柳枝絕句。夢得繼和云。春盡絮飛留不得。隨風好去落誰家。又復

戲答

柳老春深日又斜。任他飛向別人家。誰能更學孤童戲。尋逐春風捉柳花。

池上早夏

水積春塘晚。陰交夏木繁。舟船如野渡。籬落似江村。靜拂藤牀席。香開酒庫門。

慵閒無一事。時弄小嬌孫。

談氏外孫生三日。喜是男。偶吟詩篇。兼戲呈夢得。

玉芽珠顆小男兒。羅薦蘭湯浴罷時。芣苢春來盈女手。梧桐老去長孫枝。

慶傳媒氏燕先賀。喜報談家烏預知。明日貧翁具雞黍。應須酬賽引鸚鵡詩。

前年談氏外孫女初生。夢得有賀詩云。從此引鸚鵡。今幸是男。前言似有徵。故云。

開成大行皇帝挽歌詞四首。奉敕撰進

御宇恢皇化。傳家叶至公。華夷臣妾內。堯舜弟兄中。制度移民俗。文章變國風。

開成與貞觀。實錄事多同。

【二】

晏駕辭雙闕。靈儀出九衢。上雲歸碧落。下席葬蒼梧。冀晚餘堯曆。龜新啓夏圖。

三朝聯棣夢。從古帝王無。

【三】

嚴恭七月禮。哀慟萬人心。地感勝秋氣。天愁結夕陰。鼎湖龍漸遠。濛汜日初沈。

唯有雲韶樂。長留治世音。

【四】

化成同軌表清平。恩結連枝感聖明。帝與九齡雖吉夢。山呼萬歲是虛聲。

月低儀仗辭蘭路。風引笳簫入柏城。老病龍髯攀不及。東周退傅最傷情。

時熱少見客。因詠所懷

冠櫛心多懶。逢迎興漸微。況當時熱甚。幸遇客來稀。濕灑池邊地。涼開竹下扉。

露牀青篾簟。風架白蕉衣。院靜留僧宿。樓空放妓歸。衰殘強歡宴。此事久知非。

宣州崔大夫閣老忽以近詩數十首見示。吟諷之下。竊有所喜。因以長句

寄題郡齋

謝玄暉歿吟聲寢。郡閣寥寥筆硯閒。無復新詩題壁上。虛教遠岫列窗閒。

謝宣城郡內詩云。窗中列遠岫。忽驚歌雪今朝至。必恐文星昨夜還。再喜宣城章句動。

飛觴遙賀敬亭山。謝又有題敬亭山詩。並見文選。

足疾

足疾無加亦不瘳。綿春歷夏復經秋。開顏且酌樽中酒。代步多乘池上舟。

幸有眼前衣食在。兼無身後子孫憂。應須學取陶彭澤。但委心形任去留。

晚池汎舟。遇景成詠。贈呂處士

岸淺橋平池面寬。飄然輕棹汎澄瀾。風宜扇引開懷入。樹愛舟行仰臥看。

別境客稀知不易。能詩人少詠應難。唯憐呂叟時相伴。同把磻溪舊釣竿。

夢微之

夜來攜手夢同遊。晨起盈巾淚莫收。漳浦老身三度病。咸陽宿草八回秋。君埋泉下泥銷骨。我寄人閒雪滿頭。阿衛韓郎相次去。夜臺茫昧得知不。

阿衛。微之小男。韓郎。微之愛婿。

感秋詠意

炎涼遷次速如飛。又脫生衣著熟衣。遠壁暗蛩無限思。戀巢寒燕未能歸。須知流輩年年失。莫歎衰容日日非。舊語相傳聊自慰。世閒七十老人稀。

老病幽獨偶吟所懷

眼漸昏昏耳漸聾。滿頭霜雪半身風。已將心出浮雲外。笙歌散後妓房空。猶寄形於逆旅中。觴詠罷來賓閣閉。笙歌散後妓房空。世緣俗念消除盡。別是人閒清淨翁。

維摩經云。是身如浮雲也。

和楊尚書罷相後夏日遊永安水亭兼招本曹楊侍郎同行

道行無喜退無憂。舒卷如雲得自由。良治動時為哲匠。巨川濟了作虛舟。竹亭陰合偏宜夏。水檻風涼不待秋。遙愛翩翩雙紫鳳。入同官署出同遊。

在家出家

衣食支分婚嫁畢。從今家事不相仍。夜眠身是投林鳥。朝飯心同乞食僧。清唳數聲松下鶴。寒光一點竹間燈。中宵入定跏趺坐。女喚妻呼都不應。

夜涼

露白風清庭戶涼。老人先著夾衣裳。舞腰歌袖拋何處。唯對無絃琴一張。

繼之尙書自余病來寄遺非一。又蒙覽醉吟先生傳題詩以美之。今以此篇

用伸酬謝

衰殘與世日相疎。惠好唯君分有餘。茶藥贈多因病久。衣裳寄早及寒初。所寄贈之物皆及時。交情鄭重金相似。詩韻清鏘玉不如。醉傅狂言人盡笑。

獨知我者是尙書。

五年秋病後獨宿香山寺三絕句

經年不到龍門寺。今夜何人知我情。還向暢師房裏宿。新秋月色舊灘聲。

【二】

飲徒歌伴今何在。雨散雲飛盡不迴。從此香山風月夜。祇應長是一身來。

【三】

石盆泉畔石樓頭。十二年來晝夜遊。更過今年年七十。假如無病亦宜休。

題香山新經堂招僧

煙滿秋堂月滿庭。香花漠漠磬泠泠。

誰能來此尋真諦。

白老新開一藏經。

偶題鄧公

公即給事中璉之子也。飢窮老病。退居此村。

偶因攜酒尋村客。聊復迴車訪辟蘿。

且值雪寒相慰問。

不妨春煖更經過。

翁居山下年空老。我得人間事校多。

一種共翁頭似雪。

翁無衣食又如何。

早入皇城贈王留守僕射

津橋殘月曉沈沈。風露淒清禁署深。

城柳宮槐謾搖落。

悲愁不到貴人心。

寄題廬山舊草堂兼呈二林寺道侶

三十年前草堂主。而今雖在鬢如絲。

登山尋水應無力。

不似江州司馬時。

漸伏酒魔休放醉。猶殘口業未拋詩。

君行過到鑪峰下。

爲報東林長老知。

此詩憑錢知進侍御。往題草堂中也。

改業

先生老去飲無興。

居士病來閒有餘。

猶覺醉吟多放逸。

不如禪定更清虛。

予先有醉吟先生傳。今故云。

柘枝紫袖教丸藥。

羯鼓蒼頭遣種蔬。

卻被山僧戲相問。

一時改業意何如。

山下畱別佛光和尙

勞師送我下山行。此別何人識此情。

我已七旬師九十。

尙知後會在他生。

山中五絕句

遊嵩陽。見五物。各有所感。感興不同。隨興而吟。因成五絕。

嶺上雲

嶺上白雲朝未散。

田中青麥旱將枯。

自生自滅成何事。

能逐東風作雨無。

石上苔

漠漠斑斑石上苔。

幽芳靜綠絕纖埃。

路傍凡草榮遭遇。

曾得七香車輾來。

林下樗

香檀文桂苦雕鐫。

生理何曾得自全。

知我無材老樗否。

一枝不損盡天年。

澗中魚

海水桑田欲變時。

風濤翻覆沸天池。

鯨吞蛟鬪波成血。

深澗遊魚樂不知。

洞中蝙蝠

千年鼠化白蝙蝠。

黑洞深藏避網羅。

遠害全身誠得計。

一生幽闇又如何。

自戲三絕句

閒臥獨吟。無人酬和。聊假身心相戲。往復偶成三章。

心問身

白樂天詩後集卷十六

心問身云何泰然。嚴冬暖被日高眠。放君快活知恩否。不早朝來十一年。

身報心

心是身王身是宮。君今居在我宮中。是君家舍君須愛。何事論恩自說功。

心重答身

因我疎慵休罷早。遣君安樂歲時多。世閒老苦人何限。不放君閒奈我何。

會昌元年春五絕句

病後喜過劉家

忽憶前年初病後。此身甘分不銜杯。誰能料得今春事。又向劉家飲酒來。

贈舉之僕射

今春與僕射。三為寒食之會。

雞毬餉粥屢開筵。談笑謳吟閒管絃。一月三回寒食會。春光應不負今年。

盧尹賀夢得會中作

病聞川守賀筵開。起伴尙書飲一杯。任意少年長笑我。老人自覓老人來。

題朗之槐亭

春風可惜無多日。家醞唯殘軟半瓶。猶望君歸同一醉。籃舁早晚入槐亭。

勸夢得酒

誰人功畫麒麟閣。何客新投魍魅鄉。兩處榮枯君莫問。殘春更醉兩三場。

過裴令公宅二絕句

裴令公在日。同常聽楊柳枝歌。每遇雪天。無非招宴。二物如故。因成感情。

風吹楊柳出牆枝。憶得同歡共醉時。每到集賢坊北過。不曾一度不低眉。

【二】

梁王舊館雪濛濛。愁殺鄒枚二老翁。此句兼屬夢得。假使明朝深一尺。亦無人到兔園中。

百日假滿少傅官停。自喜言懷

長告今朝滿十旬。從茲蕭灑便終身。老嫌手重拋牙笏。病喜頭輕換角巾。

疏傅不朝懸組綬。向平無累畢婚姻。人言世事何時了。我是人閒事了人。

早熱

畏景又加早。火雲殊未收。籬暄饑有雀。池涸渴無鷗。岸幘頭仍痛。褰裳汗亦流。

若爲當此日。遷客向炎州。時楊李二相各貶湖詔。

題崔少尹上林坊新居

坊靜居新深且幽。忽疑縮地到滄洲。宅東籬缺嵩峯出。堂後池開洛水流。願伴田蘇日日遊。

白樂天詩後集卷十六

新澗亭

煙蘿初合澗新開。閉上西亭日幾回。老病歸山應未得。且移泉石就身來。

對酒有懷寄李十九郎中

往年江外拋桃葉。結之也。去歲樓中別柳枝。樊蠻也。寂寞春來一杯酒。

此情唯有李君知。李君嘗有悼故妓詩云。直應人世無風月。恰是心中忘却時。今故云。吟君舊句情難忘。風月何時是盡時。

楊六尚書頻寄新詩。詩中多有思閒相就之志。因書鄙意。報而諭之。

君年殊未及懸車。未合將閒逐老夫。身健正宜金印綬。位高方稱白髭鬚。

若論塵事何由了。但問雲心自在無。進退是非俱是夢。丘中闕下亦何殊。

偶吟自慰兼呈夢得。予與夢得甲子同。今俱七十。

且喜同年滿七旬。莫嫌衰病莫嫌貧。已爲海內有名客。又占世閒長命人。

耳裏聲聞新將相。眼前失盡故交親。尊榮富壽難兼得。閒坐思量最要身。

寄潮州楊繼之

相府潮陽俱夢中。夢中何者是窮通。他時事過方應悟。不獨榮空辱亦空。

雪暮偶與夢得同致仕裴賓客王尚書飲

黃昏慘慘雪霏霏。白首相歡醉不歸。四箇老人三百歲。裴年九十餘。王八十餘。予與夢得俱七十。合三百餘歲。可謂希有之會也。人閒此會亦應稀。

雪朝乘興欲詣李司徒畱守。先以五韻戲之

夜寒生酒思。曉雪引詩情。熱飲一兩盞。冷吟三五聲。鋪花連地凍。銷玉畏天晴。

好拂烏巾出。宜披鶴氅行。梁園應有興。何不召鄒生。

贈思黯。前以履道新小灘詩寄思黯。報章云。請向歸仁砌下看。思黯歸仁宅亦有小灘。

爲憐清淺愛潺湲。一日三回到水邊。若道歸仁灘更好。主人何故別三年。

聽歌六絕句

聽都子歌。詞云。試問常娥更要無。一聲格轉已堪聽。更聽唱到常娥字。猶有樊家舊典刑。

都子新歌有性靈。一聲格轉已堪聽。更聽唱到常娥字。猶有樊家舊典刑。

樂世。一名六么。管急絃繁拍漸稠。綠腰宛轉曲終頭。誠知樂世聲聲樂。老病人聽未免愁。

管急絃繁拍漸稠。綠腰宛轉曲終頭。誠知樂世聲聲樂。老病人聽未免愁。

水調。第五偏乃五言。調韻最切。五言一遍最殷勤。調少情多似有因。不會當時翻曲意。此聲腸斷爲何人。

五言一遍最殷勤。調少情多似有因。不會當時翻曲意。此聲腸斷爲何人。

想夫憐。王維右丞詞云。秦川一。半夕陽開。此句尤佳。

白樂天詩後集卷十六

玉管朱絃急催。容聽歌送十分杯。

長愛夫憐第二句。

請君重唱夕陽開。

何滿子

開元中。滄州有歌者何滿子。臨刑進此曲以贖死。上竟不免。

世傳滿子是人名。臨就刑時曲始成。

一曲四調歌八疊。

從頭便是斷腸聲。

離別難

綠楊陌上送行人。馬去車迴一望塵。

不覺別時紅淚盡。

歸來無淚可霑巾。

閒樂

坐安臥穩輿平肩。倚杖披衫遶四邊。

空腹三杯卯後酒。

曲肱一覺醉中眠。

更無忙苦吟閒樂。恐是人閒自在天。

白樂天詩後集卷十七

律詩

凡一百八首

春池閒況

綠塘新水平。紅檻小舟輕。解纜隨風去。開襟信意行。淺憐清演漾。深愛綠澄泓。白撲柳飛絮。紅浮桃落英。古文科斗出。新葉剪刀生。樹集鶯朋友。雲行鴈弟兄。

飛沈皆適性。酣飲自怡情。花助銀杯氣。松添玉軫聲。魚跳何事樂。鷗起復誰驚。莫唱滄浪曲。無塵可濯纓。

池上寓興二絕

濠梁莊惠謾相爭。未必人情知物情。

獺捕魚來魚躍出。

此非魚樂是魚驚。

【二】

水淺魚稀白鷺飢。勞心瞪目待魚時。

外容閒暇中心苦。

似是而非誰得知。

宴後題府中水堂贈盧尹中丞。昔余爲尹日。創造之。

水齋歲久漸荒蕪。自媿甘棠無一株。

新酒客來方宴飲。

舊堂主在重觀娛。

府妓有歌楊柳枝曲者。因以名焉。

直致櫻桃樹已枯。

府西有櫻桃。因樹爲名。今樹亦枯也。

從我到君十一尹。相看自置府中無。

自子罷後。至中丞。凡十一尹也。

和敏中洛下卽事。時敏中爲殿中分司。

昨日池塘春草生。阿連新有好詩成。

花園到處鶯呼入。

駿馬遊時客避行。

水暖魚多似南國。人稀塵少勝西京。

洛中佳境應無限。

若欲語知問老兄。

送敏中新授戶部員外郎西歸。

千里歸程三伏天。官新身健馬翩翩。

行衝赤日加餐飯。

上到青雲穩著鞭。

長慶老郎唯我在。

客曹故事望君傳。

前鴻後鴈行難續。

相去迢迢二十年。

長慶初。予爲主客郎中。知制誥。遷中書舍人。去今二十一年也。

南侍御以石相贈助成水聲。因以絕句謝之。

泉石磷磷聲似琴。

閉眠靜聽洗塵心。

莫輕兩片青苔石。

一夜潺湲直萬金。

閒居自題戲招宿客

水畔竹林邊。

閒居二十年。

健常攜酒出。

病即掩門眠。

解綬收朝佩。

寒裳出野船。

屏除身外物。

擺落世閒緣。

報曙窗何早。

知秋簟最先。

微風深樹裏。

斜日小樓前。

渠口添新石。

籬根寫亂泉。

欲招同宿客。

誰解愛潺湲。西亭牆下。泉石有聲。

李留守相公見過池上。泛舟舉酒。話及翰林舊事。因成四韻。以獻之。

引棹尋池岸。

移樽就菊叢。

何言濟川後。

相訪釣船中。

白首故情在。

青雲往事空。

同時六學士。五相一漁翁。

閏九月九日獨飲

黃花叢畔綠尊前。

猶有些些舊管絃。

偶遇閏秋重九日。

東籬獨酌一陶然。

自從九月持齋戒。

不醉重陽十五年。

覽盧子蒙侍御舊詩。多與微之唱和。感今傷昔。因贈子蒙題於卷後。

早聞元九詠君詩。

恨與盧君相識遲。

今日逢君開舊卷。

卷中多道贈微之。

相看掩淚情難說。

別有傷心事豈知。

聞道咸陽墳上樹。

已抽三丈白楊枝。

寒亭畱客

今朝閒坐石亭中。

爐火銷殘尊又空。

冷落若爲畱客住。

冰池霜竹雪髯翁。

新小灘

石淺沙平流水寒。

水邊斜插一漁竿。

江南客見生鄉思。

道是嚴陵七里灘。

和李中丞與李給事山居。雪夜同宿小酌。

憲府觸邪峨豸角。

瑣闥駁正犯龍鱗。

二人當官盛事。爲時所稱也。

那知近地齋居客。

忽作深山同宿人。

一盞寒燈雲外夜。

數杯溫酎雪中春。

林泉莫作多時計。

諫獵登封憶舊臣。

履道西門二首

履道西門有敝居。

池塘竹樹繞吾廬。

豪華肥壯雖無分。

飽煖安閒卽有餘。

行竈朝香炊早飲。

小園春暖撥新蔬。

夷齊黃綺誇芝蕨。

比我盤餐恐不如。

【二】

履道西門獨掩扉。

官休病退客來稀。

亦知軒冕榮堪戀。

其奈田園老合歸。

跛鼈難隨騏驥足。傷禽莫趁鳳皇飛。

世閒認得身人少。

今我雖愚亦庶幾。

偶吟

人生變改故無窮。

昔是朝官今野翁。

久寄形於朱紫內。

漸抽身入蕙荷中。

來春或擬往江東。

無情水任方圓器。

下繫舟隨去住風。

猶有鱸魚蓴菜興。

荷衣蕙帶。皆楚詞也。

雪夜小飲贈夢得

同為懶慢園林客。

共對蕭條雨雪天。

小酌酒巡銷永夜。

大開口笑送殘年。

久將時背成遺老。

多被人呼作散仙。

呼作散仙應有以。

曾看東海變桑田。

歲暮夜長病中燈下聞盧尹夜宴以詩戲之且為來日張本也

榮鬧興多嫌晝短。

衰閒睡少覺明遲。

當君秉燭銜杯夜。

是我停殮服藥時。

枕上愁吟堪發病。

府中歡笑勝尋醫。

明朝強出須謀樂。

不擬車公更擬誰。

病中數會張道士見譏以此答之

亦知數出妨將息。

不可端居守寂寥。

病即藥窗眠盡日。

興來酒席坐通宵。

賢人易狎須勤飲。

蛇女難禁莫漫燒。

張道士輸白道士。

一杯沉湎便逍遙。

卯飲

短屏風掩臥牀頭。

烏帽青氈白氎裘。

卯飲一杯眠一覺。

世閒何事不悠悠。

寄題餘杭郡樓兼呈裴使君

官歷二十政。宦遊三十秋。

江山與風月。

最憶是杭州。

北郭沙堤尾。西湖石岸頭。

綠觴春送客。紅燭夜迴舟。

不敢言遺愛。

空知念舊遊。

憑君吟此句。題向望濤樓。

楊六尚書畱太湖石在洛下借置庭中因對舉杯寄贈絕句

借君片石意何如。

置向庭中慰索居。

每就玉山傾一酌。

興來如對醉尙書。

喜入新年自詠

時年七十一

白鬚如雪五朝臣。

又值新正第七旬。

老過占他藍尾酒。

病餘收得到頭身。

銷磨歲月成高位。

比類時流是幸人。

大曆年中騎竹馬。

幾人得見會昌春。

灘聲

碧玉斑斑沙歷歷。

清流泱泱響泠泠。

自從造得灘聲後。

玉管朱絃可要聽。

題石泉

殷勤傍石繞泉行。

不說何人知我情。

漸恐耳聾兼眼暗。

聽泉看石不分明。

送王卿使君赴任蘇州因思花迎新使感舊遊寄題郡中木蘭西院

一別蘇州十八載。

時光人事隨年改。

不論竹馬盡成人。

亦恐桑田半為海。

鶯入故宮含意思。花迎新使生光彩。

為報江山風月知。

至今白使君獨在。

出齋日喜皇甫十早訪。

三旬齋滿欲銜杯。平旦敲門門未開。

除卻朗之攜一棹。

的應不是別人來。

會昌二年春題池西小樓。

花邊春水水邊樓。一坐經今四十秋。

望月橋傾三遍換。

采蓮船破五回修。

園林一半成喬木。隣里三分作白頭。

蘇李冥蒙隨燭滅。

陳樊漂泊逐萍流。

蘇庶子弘。李中丞道樞。及陳樊二妓。十餘年皆樓中歌酒中伴。或歿或散。獨予在焉。

雖貧眼下無妨樂。

縱病心中不與愁。

自笑靈光巋然在。春來遊得且須遊。

酬南洛陽早春見贈

物華春意尚遲迴。賴有東風晝夜催。

寒繩柳腰收未得。

暖熏花口噤初開。

古詩云。口噤不能開。

先喜瓊琚入袖來。

久病長齋詩老退。

爭禁年少洛陽才。

對新家醞甌自種花

香麴親看造。芳叢手自栽。迎春報酒熟。

垂老看花開。

紅蠟半含夢。綠油新酸醅。

玲瓏五六樹。激澀兩三杯。恐有狂風起。

愁無好客來。

獨酣還獨語。待取月明回。

攜酒往朗之莊居同飲

慵中又少經過處。別後都無勸酒人。

不挈一壺相就醉。

若為將老度殘春。

以詩代書酬慕巢尚書見寄

慕巢書中。頗切歸休結。侶之意。故以此答。

書意詩情不偶然。若云夢想在林泉。

願為愚谷煙霞侶。

思結空門香火緣。

每媿尚書情眷眷。

自憐居士病縣縣。

不知待得心期否。

老校於君六七年。

春盡日

芳景銷殘暑氣生。

感時思事坐含情。

無人開口共誰語。

有酒回頭還自傾。

醉對數叢紅芍藥。

渴嘗一盃綠昌明。

蜀茶之名也。

春歸似遣鶯留語。

好住林園三兩聲。

招山僧

能入城中乞食否。

莫辭塵土汗袈裟。

欲知住處東城下。

繞竹泉聲是白家。

夏日與閒禪師林下避暑

落景牆西塵土紅。

伴僧閒坐竹泉東。

綠蘿潭上不見日。

白石灘邊長有風。

熱惱漸知隨念盡。

清涼常願與人同。

每因毒暑悲親故。

多在炎方瘴海中。

是歲潮詔等郡。皆有親友謫居。

題新澗亭兼酬寄朝中親故見贈

何處披襟風快哉。一亭臨澗四門開。金章紫綬辭腰去。白石清泉就眼來。自得所宜還獨樂。各行其志莫相哈。禽魚出得池籠後。縱有人呼可更回。

病中看經贈諸道侶

右眼昏花左足風。金篦石水用無功。金篦刮眼病。見涅槃經。磁石水治風。見外臺方。無子同居草菴下。見法華經。有妻偕老道場中。何煩更請僧爲侶。

月上新歸伴病翁。

時適談氏女子自太原初歸。維摩詰有女名月上也。

遊豐樂招提佛光三寺

竹鞋葵扇白綃巾。林野爲家雲是身。山寺每遊多寄宿。都城暫出卽經旬。漢容黃綺爲逋客。堯放巢由作外臣。昨日制書臨郡縣。不談愚谷醉鄉人。

醉中得上都親友書以予停俸多時憂問貧乏偶乘酒興詠而報之

頭白醉昏昏。狂歌秋復春。一生耽酒客。五度棄官人。蘇州。刑部侍郎。河南尹。同州刺史。太子少傅。皆以病免也。異世陶元亮。前身劉伯倫。臥將琴作枕。行以鉢隨身。歲要衣三對。年支穀一困。園葵烹佐飯。林葉掃添薪。沒齒甘蔬食。搖頭謝搢紳。自能拋爵祿。終不惱交親。但得杯中滌。從生甑上塵。煩君問生計。憂醒不憂貧。

池畔逐涼

風清泉冷竹修修。三伏炎天涼似秋。黃犬引迎騎馬客。青衣扶下釣魚舟。衰容自覺宜閒坐。蹇步誰能更遠遊。料得此身終老處。只應林下與灘頭。

池鶴八絕句并序

池上有鶴介然不羣。烏鳶雞鵝次第嘲噪。諸禽似有所謂。鶴亦時復一鳴。余非治長。不通其意。因戲與贈答。以意斟酌之。聊亦自取笑耳。

雞贈鶴

一聲警露君能薄。五德司晨我用多。不會悠悠時俗士。重君輕我意如何。

鶴答雞

爾爭伉儷泥中鬪。我整羽儀松上棲。不可遣他天下眼。卻輕野鶴重家雞。

烏贈鶴

與君白黑太分明。縱不相親莫見輕。我每夜啼君怨別。玉微琴裏忝同聲。

琴曲有烏夜啼。別鶴怨。

鶴答烏

吾愛棲雲上華表。汝多攫肉下田中。吾音中羽汝聲角。琴曲雖同調不同。

別鶴怨在羽調。烏夜啼在角調。

鷺贈鶴

君誇名鶴我名鷺

君叫聞天我戾天

更有與君相似處

飢來一種啄腥羶

鶴答鷺

無妨自是莫相非

清濁高低各有歸

鸞鶴羣中彩雲裏

幾時曾見喘鷺飛

鵝贈鶴

君因風送入青雲

我被入驅向鴨羣

雪頸霜毛紅網掌

請看何處不如君

鶴答鵝

右軍歿後欲何依

只合隨雞逐鴨飛

未必犧牲及吾輩

大都我瘦勝君肥

談氏小外孫玉童

外翁七十孫三歲

笑指琴書欲遣傳

自念老夫今耄矣

因思穉子更茫然

中郎餘慶鍾羊祜

子幼能文似馬遷

才與不才爭料得

東牀空後且嬌憐

談氏初逝。

送後集往廬山東林寺兼寄雲阜上人

後集寄將何處去

故山迢遞在匡廬

舊僧獨有雲阜在

三二年來不得書

別後道情添幾許

老來筋力又何如

來生緣會應非遠

彼此年過七十餘

客有說

客即李浙東也。所說不能具錄其事。

近有人從海上迴

海山深處見樓臺

中有仙龕虛一室

多傳此待樂天來

答客說

吾學空門非學仙

恐君此說是虛傳

海山不是我歸處

歸即應歸兜率天

予晚年結彌勒上生業。故云。

哭劉尚書夢得二首

四海齊名白與劉

百年交分兩綢繆

同貧同病退閒日

一死一生臨老頭

杯酒花雄君與操

曹公曰。天下英雄唯使君與操耳。

文章微婉我知丘

仲尼云。後世知丘者春秋。又云。春秋之旨。微而婉也。

賢豪雖歿精靈在

應共微之地下遊

【二】

今日哭君吾道孤

寢門淚滿白髭鬚

不知箭折弓何用

兼恐唇亡齒亦枯

宵宵窮泉埋寶玉

駸駸落景挂桑榆

夜臺暮齒期非遠

但問前頭相見無

昨日復今辰

昨日復今辰。悠悠七十春。所輕多故處。

卻想似前身。散秩優遊老。閒居清淨貧。

螺杯中有物。鶴鬢上無塵。解佩收朝帶。抽簪換野巾。風儀與名號。別是一生人。

病瘡

門有醫來往。庭無客送迎。病銷談笑興。老足歎嗟聲。鶴伴臨池立。人扶下砌行。

脚瘡春斷酒。那得有心情。

遊趙邨杏花一無遊字

趙邨紅杏每年開。十五年來看幾迴。七十三人難再到。今春來是別花來。

刑部尚書致仕

十五年來洛下居。道緣俗累兩何如。迷路心迴因向佛。宦途事了是懸車。

全家遜世曾無悶。一半俸資身亦有餘。唯是名銜人不會。毘耶長者白尙書。

初致仕後戲酬畱守牛相公并呈分司諸寮友

南北東西無所羈。挂冠自在勝分司。看花嘗酒多先到。拜表行香盡不知。

包筒烹魚飽餐後。擁袍枕臂醉眠時。報君一語君應笑。兼亦無心羨保釐。

問諸親友

七十人難到。過三更較稀。占花租野寺。定酒典朝衣。趁醉春多出。貪歡夜未歸。

不知親故口。道我是耶非。

戲問牛司徒

抖擻塵纓捋白鬚。半酣扶起問司徒。不知詔下懸車後。醉舞狂歌有例無。

不與老爲期

不與老爲期。因何兩鬢絲。纔應免天促。便已及衰羸。昨夜夢何在。明朝身不知。

百憂非我所。三樂是吾師。閉目常閒坐。低頭每靜思。存神機慮息。養氣語言遲。

行亦攜詩篋。眠多枕酒卮。自慙無一事。少有不安時。

開龍門八節石灘詩二首并序

東都龍門潭之南。有八節灘。九峭石。船筏過此。例及破傷。舟人楫師。推挽束縛。大寒之月。裸跣水中。饑凍有聲。聞於終夜。予嘗有願。力及則救之。會昌四年。有悲智僧道遇。適同發心。經營開鑿。貧者出力。仁者施財。於戲。從古有礙之險。未來無窮之苦。忽乎一旦。盡除去之。茲吾所用。適願快心。拔苦施樂者耳。豈獨以功德福報爲意哉。因作二詩。刻題石上。以其地屬寺。事因僧故。多引僧言。見志。

鐵鑿金鎚殷若雷。八灘九石劒稜摧。竹篙桂楫飛如箭。百筏千艘魚貫來。

振錫導師憑衆力。揮金退傅施家財。他時相逐西方去。莫慮塵沙路不開。

【二】

七十三翁且暮身。誓開險路作通津。
十里叱灘變河漢。八寒陰獄化陽春。
閻施慈悲與後人。八寒地獄。見佛名及涅槃經。故以八節灘爲比。
夜舟過此無傾覆。朝脛從今免苦辛。
我身雖歿心長在。

閒坐

婆婆放雞犬。嬉戲任兒童。閒坐槐陰下。
開襟向晚風。漚麻池水裏。曬棗日陽中。
人物何相稱。居然田舍翁。

酬寄牛相公同宿話舊勸酒見贈

每來政事堂中宿。共憶華陽觀裏時。
交遊今日唯殘我。富貴當年更有誰。
日暮獨歸愁米盡。彼此相看頭雪白。
泥深同出借驢騎。一杯可合重推辭。

道場獨坐

整頓衣巾拂淨牀。一餅秋水一爐香。
朝謁久停收劍珮。宴遊漸罷廢壺觴。
不論煩惱先須去。世間無用殘年處。
直到菩提亦擬忘。祇合逍遙坐道場。

偶作寄朗之

歷想爲官日。無如刺史時。歡娛接賓客。
分司勝刺史。致仕勝分司。何況園林下。
飽暖及妻兒。自到東都後。安閒更得宜。
欣然得朗之。仰名同舊識。爲樂卽新知。

有雪先相訪。無花不作期。鬪醞乾釀酒。
岐分兩回首。書到一開眉。葉落槐亭院。
身與心俱病。容將力共衰。老來多健忘。
誇妙細吟詩。里巷千來往。都門五別離。
唯不忘相思。

狂吟七言十四韻

亦知世是休明世。自想身非富貴身。
遊依二室成三友。住近雙林當四鄰。
香山閒宿一千夜。梓澤連遊十六春。
藥停有喜閒銷疾。金盡無憂醉忘貧。
但恐人間爲長物。不如林下作遺民。
俸隨日計錢盈貫。祿逐年支粟滿囷。
性海澄滄平少浪。心田灑掃淨無塵。
遊邨果熟饋爭新。詩章人與傳千首。
是客相逢皆故舊。無僧每見不殷勤。
東都除我更無人。喜裴濤使君攜詩見訪。醉中戲贈。
補綻衣裳媿妻女。支持酒肉賴交親。
洛堰魚鮮供取足。點檢一身微俸事。
壽命天教過七旬。

喜裴濤使君攜詩見訪。醉中戲贈

忽聞扣戶醉吟聲。不覺停杯倒屣迎。
共放詩狂同酒癖。與君別是一親情。

得潮州楊尙書繼之書并詩。以此寄之

詩情書意兩殷勤。來自天南瘴海濱。
親視銀鈞還啓齒。細吟瓊什欲霑巾。

鳳池隔絕三千里。

蝸舍沈冥十五春。

唯有新昌故園月。

至今分照兩鄉人。

鳳池屬楊相也。蝸舍自謂也。

宿府池西亭

池上平橋橋下亭。

夜深睡覺上橋行。

白頭老尹重來宿。

十五年前舊月明。

閒眠

暖牀斜臥日曛腰。

一覺閒眠百病銷。

盡日一餐茶兩椀。

更無所要到明朝。

楊柳枝詞

一樹春風千萬枝。

嫩於金色軟於絲。

永豐西角荒園裏。

盡日無人屬阿誰。

詔取永豐柳植禁苑感賦

一樹衰殘委泥土。

雙枝榮耀植天庭。

定知玄象今春後。

柳宿光中添兩星。

齋居春久感事遣懷

齋戒坐三旬。

笙歌發四鄰。

月明停酒夜。

眼闔看花人。

猶思閒語笑。

未忘舊交親。

久作龍門主。

多爲兔苑賓。

事事皆過分。

時時自問身。

風光拋得也。

七十四年春。

每見呂南二郎中新文輒竊有所歎惜。因成長句以詠所懷。

雙金百鍊少人知。

縱我知君徒爾爲。

望梅閣老無妨渴。

二賢詞藻。爲瞻麗衆多。以子曾忝詞語。故呼閣老。

畫餅尙書不救飢。

喻無益自戲也。

白日回頭看又晚。

青雲舉足躡何遲。

遣把閒杯吟詠詩。

壯年可惜虛銷擲。

歡喜二偈

得老加年誠可喜。

當春對酒亦宜歡。

心中別有歡喜事。

開得龍門八節灘。

【二】

眼暗頭旋耳重聽。

唯餘心口尙醒醒。

今朝歡喜緣何事。

禮徹佛名百部經。

閒居貧活計

冠蓋閒居少。

簞瓢陋巷深。

稱家開戶牖。

量力置園林。

飢烹一斤肉。

暖臥兩重衾。

尊有陶潛酒。

囊無陸賈金。

贈諸少年

少年莫笑我蹉跎。

聽我狂翁一曲歌。

入手榮名取雖少。

關心穩事得還多。

老慙退馬霑芻秣。

謂致仕半俸也。

高喜歸鴻脫弋羅。

官給俸錢天與壽。

些些貧病奈吾何。

感所見

巧者焦勞智者愁。愚翁何喜復何憂。莫嫌山木無人用。大勝籠禽不自由。
網外老雞因斷尾。盤中鮮膾爲吞鉤。誰人會我心中事。冷笑時時一掉頭。

寄黔州馬常侍

閒看雙節信爲貴。樂飲一杯誰與同。可惜風情與心力。五年拋擲在黔中。

和李相公畱守題漕上新橋六韻

同用黎字

選石鋪新路。安橋壓古堤。似從銀漢下。落傍玉川西。影定闌干倒。標高華表齊。
煙開虹半見。月冷鶴雙棲。材映夔龍小。功嫌元凱低。從容濟世後。餘力及黔黎。

閒居

風雨蕭條秋少客。門庭冷靜晝多關。金羈駱馬近賣卻。羅袖柳枝尋放還。
書卷略尋聊取睡。酒杯淺把粗開顏。眼昏入夜休看月。脚重經春不上山。
心靜無妨喧處寂。機忘兼覺夢中閒。是非愛惡銷停盡。唯寄空身在世閒。

新秋夜雨

蟋蟀暮啾啾。光陰不少畱。松檐半夜雨。風幌滿牀秋。曙早燈猶在。涼初簟未收。

新晴好天氣。誰伴老人遊。

春眠

枕低被暖身安穩。日照房門帳未開。還有少年春氣味。時時暫到睡中來。

喜老自嘲

面黑頭雪白。自嫌還自憐。毛龜著下老。蝙蝠鼠中仙。名籍同逋客。衣裝類古賢。
裘輕被白氎。靴暖蹋烏氈。周易休開卦。陶琴不上絃。任從人棄擲。自與我周旋。
鐵馬因疲退。鉛刀以鈍全。行開第八秩。可謂盡天年。時俗謂七十已上爲開第八秩。
河陽石尚書破迴鶻迎貴主。過上黨射鷺鷥。繪畫爲圖。猥蒙見示。稱歎不足。以詩美之。

塞北虜郊隨手破。

山東賊壘掉鞭收。

白馬將軍入潞州。

劔拔青鱗蛇尾活。

弦抨赤羽火星流。

須知烏目猶難漏。

清商一部管絃秋。

三軍歡躍。其事上聞。詔下美之。

縱有天狼豈足憂。

畫角三聲刁斗曉。

清商一部管絃秋。

他時麟閣圖勳業。

更合何人居上頭。

自詠老身示諸家屬

壽及七十五。俸露五十千。夫妻偕老日。甥姪聚居年。粥美嘗新米。袍溫換故絛。
家居雖濩落。眷屬幸團圓。置榻素屏下。移爐青帳前。書聽孫子讀。湯看侍兒煎。
走筆還詩債。抽衣當藥錢。支分閒事了。爬背向陽眠。

自問此心呈諸老伴

朝問此心何所思。暮問此心何所為。

不入公門慵斂手。

不看人面免低眉。

居士室閒眠得所。

少年場上飲非宜。

閒談臺臺留諸老。

美醞徐徐進一卮。

心未曾求過分事。

身常少有不安時。

此心除自謀身外。

更問其餘盡不知。

六年立春日人日作

二日立春人七日。

盤蔬餅餌逐時新。

年方吉鄭猶為少。

家比劉韓未是貧。

鄉園節歲應堪重。

親故歡遊莫厭頻。

試作循潮封眼想。

何由得見洛陽春。

分司致仕官中。吉傳。鄭語議最老。韓庶子。劉員外尤貧。循潮封三郡遷客。皆洛下舊遊也。

齋居偶作

童子裝爐火。

行添一炷香。

老翁持麈尾。

坐拂半張牀。

甘鮮新餅果。

穩暖舊衣裳。

止足安生理。

優閒樂性場。

豈有物相累。

兼無情可忘。

不須憂老病。

心是自醫王。

詠身

自中風來三歷閏。

病風八年。凡三閏矣。

從懸車後幾逢春。

周南留滯稱遺老。

見太史公傳。

漢上羸殘號半人。

見習鑿之商傳。

薄有文章傳子弟。

斷無書札答交親。

餘年自問將何用。

恐是人閒賸長身。

予與山南

英華作荆南。

王僕射淮南李僕射事歷五朝。踰三紀。海內年輩今唯

三人。榮路雖殊。交情不替。聊題長句。寄舉之公。垂二相公。

故交海內只三人。

二坐巖廊一臥雲。

老愛詩書還似我。

榮兼將相不如君。

百年膠漆初心在。

萬里煙霄中路分。

阿閣鶯鳳野田鶴。

何人信道舊同羣。

讀道德經

玄元皇帝著遺文。

烏角先生仰後塵。

金玉滿堂非己物。

子孫委蛻是他人。

世閒盡不關吾事。

天下無親於我身。

只有一身宜愛護。

少教冰炭逼心神。

禽蟲十二章并序

莊列寓言。風騷比興。多假蟲鳥。以為筌蹄。故詩義始於關雎。鵲巢。道說先乎鯤鵬。蜩鷓之類是也。子閒居乘興。偶作一十二章。頗類志怪放言。每章可致一哂。一哂之外。亦有以自警。其衰耄封執之惑焉。頃如此作。多與故人微之。夢得共之。微之夢得嘗云。此乃九奏中新聲。八珍中異味也。有旨哉。有旨哉。今則獨吟。想二君在目。能無恨乎。

燕違戊己鵲避歲。茲事因何羽族知。疑有鳳皇頌鳥曆。一時一日不參差。

不知其然也。燕銜泥。常避戊己日。鵲巢口。常避太歲。驗之皆信。

白樂天詩後集卷十七

水中科斗長成蛙。

林下桑蠶老作蛾。

蛙跳蛾舞仰頭笑。

焉用鯤鵬鱗羽多。

【三】

江魚羣從稱妻妾。

塞鴈聯行號弟兄。

但恐世閒真眷屬。

親疎亦是強爲名。

故名也。江沱間有魚。每遊輒三。如膠隨妻。一先二後。土人號爲婢妾魚。禮云。雁兄弟行。

【四】

蠶老繭成不庇身。

蜂飢蜜熟屬他人。

須知年老憂家者。

恐是二蟲虛苦守。

自警也。

【五】

阿閣鸕鷀田舍烏。

妍蚩貴賤兩懸殊。

如何閉向深籠裏。

一種摧頽觸四隅。

有所感也。

【六】

獸中刀槍多怒吼。

鳥遭羅弋盡哀鳴。

羔羊口在緣何事。

閻死屠門無一聲。

有所悲也。

【七】

螻蛄殺敵蚊巢上。

蠻觸交爭蝸角中。

應似諸天觀下界。

一微塵內鬪英雄。

自照也。

【八】

蠨蛸網上罨蜉蝣。

反覆相持死始休。

何異浮生臨老日。

一彈指頃報恩讐。

誠報也。

【九】

蟻王化飯爲臣妾。

螺母偷蟲作子孫。

彼此假名非本物。

其閒何怨更何恩。

【十】

豆苗鹿嚼解烏毒。

艾葉雀銜奪燕巢。

鳥獸不曾看本草。

諳知藥性是誰教。

嘗獵者說云。鹿若中箭發。即嚼豆葉食之。多消解。箭毒多用烏頭。故云。烏毒。又燕惡艾。雀欲奪其巢。先銜艾致其窠。輒避去。因而有之。

【十一】

一鼠得仙生羽翼。

衆鼠相看有羨色。

豈知飛上未半空。

已作烏鳶口中食。

【十二】

鵝乳養雛遺在水。

魚心想子變成鱗。

細微幽隱何窮事。

知者唯應是聖人。

鷺放乳水中。不能離。羣雛從而食之。皆飽而去之。又如魚想子。子成魚。如是佛經中說。

白樂天詩後集卷十八

格律詩 一首

窗中列遠軸

以題中平聲爲韻。○按各本別附宣州試射中正鶴賦後

天靜秋山好。

窗開曉翠通。

遙憐峰窈窕。

不隔竹朦朧。

萬點當虛室。

千重疊遠空。

列檐攢秀氣。

緣隙助清風。

碧愛新晴後。

明宜反照中。

宣城郡齋在。

望與古時同。

玉水記方流

以流字爲韻。六十字成。○按各本別附省試性習遠近賦後

良璞含章久。

寒泉徹底幽。

矩浮光灑灑。

方折浪悠悠。

凌亂波紋異。

縈迴水性柔。

似風搖淺瀨。

疑月落清流。

潛穎應傍達。

藏真豈上浮。

玉人如不見。

淪棄卽千秋。

大社觀獻捷詩

以功字爲韻。四韻成

淮海妖氛滅。

乾坤嘉氣通。

班師郊社內。

操袂凱歌中。

廟算無遺策。

天兵不戰功。

小臣同鳥獸。

率舞向皇風。

自誨

樂天樂天。

來與汝言。

汝宜拳拳。

終身行焉。

物有萬類。

錮人如鎖。

事有萬感。

熱人如火。

萬類遞來。

鑲汝形骸。

使汝未老。

形枯如柴。

萬感遞至。

火汝心懷。

使汝未死。

心化爲灰。

樂天樂天。

可不哀。

汝胡不懲往而念來。

人生百歲七十

稀。

設使與汝七十期。

汝今年已四十四。

卻後二十六年能幾時。

汝不思二十五六

年來事。

疾速倏忽如一寐。

往日來日皆瞥然。

胡爲自苦於其閒。

樂天樂天。

可不

大哀。

而今而後。

汝宜饑而食。

渴而飲。

晝而興。

夜而寢。

無浪喜。

無妄憂。

病

則臥。

死則休。

此中是汝家。

此中是汝鄉。

汝何捨此而去。

自取其遑遑。

遑遑兮

欲安往哉。

樂天樂天歸去來。

三 謠 并序

余廬山草堂中有朱藤杖一。蟠木机一。素屏風二。時多杖藤而行。隱机而坐。掩屏而臥。宴息之暇。筆研在前。偶爲三謠。各導其意。亦猶座右陋室銘之類爾。

蟠木謠

蟠木蟠木。有似我身。不中乎器。無用於人。下擁腫而上鱗菌。桷不桷兮輪不輪。天子建明堂兮。既非梁棟。諸侯斲大輅兮。材又不中。唯我病夫。或有所用。用爾爲几。承吾臂支吾頤而已矣。不傷爾性。下枉爾理。爾怏怏爲几之外無所用爾。

爾既不材。吾亦不材。胡爲乎人閒徘徊。蟠木蟠木。吾與汝歸草堂去來。

素屏謠

素屏素屏。胡爲乎不文不飾。不丹不青。當世豈無李陽冰之篆字。張旭之筆跡。邊鸞之花鳥。張璪之松石。吾不令加一點一畫於其上。欲爾保真而全白。吾於香爐峰下置草堂。二屏倚在東西牆。夜如明月入我室。曉如白雲圍我牀。我心久養浩然氣。亦欲與爾表裏相輝光。爾不見當今甲第與玉宮。織成步障錦屏風。綴珠陷鈿貼雲母。五金七寶相玲瓏。貴豪待此方悅目。晏然寢臥乎其中。素屏素屏。物各有所宜。用各有所施。爾今木爲骨兮紙爲面。捨吾草堂欲何之。

朱藤謠

朱藤朱藤。溫如紅玉。直如朱繩。自我得爾以爲杖。大有裨於股肱。前年左選東南萬里。交遊別我於國門。親友送我於澆水。登高山兮。車倒輪摧。渡漢水兮。馬阻蹄開。中途不進。部曲多迴。唯此朱藤。實隨我來。瘴癘之鄉。無人之地。扶衛衰病。驅訶魑魅。吾獨一身。賴爾爲二。或水或陸。自北徂南。泥黏雪滑。足力不堪。吾本兩足。得爾爲三。紫霄峰頭。黃石巖下。松門石磴。不通與馬。吾與爾披雲撥水。環山繞野。二年蹋徧匡廬閒。未嘗一步而相捨。雖有佳子弟良

朋友。扶危助蹇。不如朱藤。嗟乎窮既若是。通復何如。吾不以常杖待爾。爾勿以常人望吾。朱藤朱藤。吾雖青雲之上黃泥之下。誓不棄爾於斯須。

無可奈何歌

無可奈何兮。白日走而朱顏積。少日往而老日催。生者不住兮。死者不迴。況乎寵辱豐頽之外物。又何常不十去而一來。去不可挽兮。來不可推。無可奈何兮已焉哉。惟天長而地久。前無始兮後無終。嗟吾生之幾何。寄瞬息兮其中。又如太倉之稊米。委一粒於萬鍾。何不與道逍遙。委化從容。縱心放志。洩洩融融。胡爲乎分愛惡於生死。繫憂喜於窮通。倔強其骨髓。齟齬其心胃。合冰炭以交戰。祇自苦兮厥躬。彼造物者。云何不爲。此與化者。云何不隨。或煦或吹。或盛或衰。雖千變與萬化。委一順以貫之。爲彼何非。爲此何是。誰冥此心。夢蝶之子。何禍非福。何吉非凶。誰達此觀。喪馬之翁。俾吾爲秋毫之杪。吾亦自足。不見其小。俾吾爲泰山之阿。吾亦無餘。不見其多。是以達人。靜則昭然與陰合迹。動則浩然與陽同波。委順而已。孰知其他。時邪命邪。吾其無奈彼何。委邪順邪。彼亦無奈吾何。夫兩無奈何。然後能冥至順而合太和。故吾所以飲太和扣至順。而爲無可奈何之歌。

池上篇并序

都城風土水木之勝。在東南偏。東南之勝。在履道里。里之勝。在西北隅。西開北垣第一第。即白氏叟樂天退老之地。地方十七畝。屋室三之一。水五之一。竹九之一。而島樹橋道閒之。初樂天既為主。喜且曰。雖有臺。無粟不能守也。乃作池東粟廩。又曰。雖有子弟。無書不能訓也。乃作池北書庫。又曰。雖有賓朋。無琴酒不能娛也。乃作池西琴亭。加石樽焉。樂天罷杭州刺史時。得天竺石一。華亭鶴二。以歸。始作西平橋。開環池路。罷蘇州刺史時。得太湖石。白蓮。折腰菱。青版舫。以歸。又作中高橋。通三島。逕罷刑部侍郎時。有粟千斛。書一車。泊臧獲之習。筦磬絃歌者。指百以歸。先是潁川陳孝山與釀法酒。味甚佳。博陵崔晦叔與琴韻甚清。蜀客姜發授秋思。聲甚淡。弘農楊貞一與青石三。方長平滑。可以坐臥。太和三年夏。樂天始得請為太子賓客。分秩於洛下。息躬於池上。凡三任所得。四人所與。泊吾不才身。今率為池中物矣。每至池風春。池月秋。水香蓮開之旦。露清鶴唳之夕。拂楊石。舉陳酒。援崔琴。彈姜秋思。頽然自適。不知其他。酒酣琴罷。又命樂童登中島亭。合奏霓裳散序。聲隨風飄。或凝或散。悠揚於竹煙波月之間者久之。曲未竟。而樂天陶然已醉。睡於石上。矣。睡起偶詠。非詩非賦。阿龜握筆。因題石閒。視其粗成韻章。命為池上篇云爾。

十畝之宅。五畝之園。有水一池。有竹千竿。勿謂土狹。勿謂地偏。足以容鄙。

足以息肩。有堂有亭。有橋有船。有書有酒。有歌有絃。有叟在中。白鬚飄然。識分知足。外無求焉。如鳥擇木。姑務巢安。如龜居坎。不知海寬。靈鶴怪石。紫菱白蓮。皆吾所好。盡在吾前。時飲一杯。或吟一篇。妻孥熙熙。雞犬閒閒。優哉遊哉。吾將終老乎其閒。

齒落辭并序

開成二年。予春秋六十六。瘠黑衰白。老狀具矣。而雙齒又墮。慨然感歎者久之。因為齒落辭。以自廣。其辭曰。

嗟嗟乎雙齒。自吾有之。而俾爾嚼肉咀蔬。銜杯漱水。豐吾膚革。滋吾血髓。從幼逮老。勤亦至矣。幸有輔車。非無斷齧。胡然捨我。一旦雙落。齒雖無情。吾豈無情。老與齒別。齒隨涕零。我老日來。爾去不廻。嗟嗟乎雙齒。孰謂而來哉。孰謂而去哉。齒不能言。請以意宣。為口中之物。忽乎六十餘年。昔君之壯也。血剛齒堅。今君之老矣。血衰齒寒。輔車斷齧。日削月朘。上參差而下。齧。曾何足以少安。嘻君其聽哉。女長辭姥。臣老辭主。髮衰辭頭。葉枯辭樹。物無細大。功成者去。君何嗟嗟。獨不聞諸道經。我身非我有也。蓋天地之委形。君何嗟嗟。又不聞諸佛說。是身如浮雲。須臾變滅。由是而言。君何有焉。所宜委百

骸而順萬化。胡爲乎嗟嗟於一牙一齒之間。吾應曰吾過矣。爾之言然。不能忘情吟并序

樂天既老。又病風。乃錄家事。會經費。去長物。妓有樊素者。年二十餘。綽綽有歌舞態。善唱楊枝。人多以曲名。名之。由是名聞洛下。籍在經費中。將放之。馬有駟壯駿穩。乘之亦有年。籍在經物中。將鬻之。圉人牽馬出門。馬驥首反顧一鳴。聲音閒似知去而旋戀者。素聞馬嘶。慘然立且拜。婉變有辭。辭畢泣下。予聞素言。亦感默不能對。且命迴勒反袂。飲素酒。自飲一杯。快吟數十聲。聲成文。文無定句。句隨吟之短長也。凡二百五十五言。噫。予非聖達。不能忘情。又不至於不及情者。事來攬情。情動不可柅。因自哂。題其篇曰不能忘情吟。吟曰。

鬻駟馬兮放楊柳枝。掩翠黛兮頓金羈。馬不能言兮。長鳴而卻顧。楊柳枝再拜長跪而致辭。辭曰。主乘此駟五年。凡千有八百日。銜槩之下。不驚不逸。素事主十年。凡三千有六百日。巾櫛之間。無違無失。今素貌雖陋。未至衰摧。駟力猶壯。又無虺隤。即駟之力。尙可以代主一步。素之歌亦可以送主一杯。一旦雙去。有去無迴。故素將去其辭也苦。駟將去其鳴也哀。此人之情也。馬之情也。豈主君獨無情哉。予俯而歎。仰而吟。且曰駟駟爾勿嘶。素素爾勿啼。駟反廐。素反

聞。吾疾雖作年雖頽。幸未及項籍之將死。何必一日之內。棄驩兮而別虞兮。乃目素兮素兮。爲我歌楊柳枝。我姑酌彼金壘。我與爾歸醉鄉去來。

白樂天詩後集卷十九

格律詩

凡五十首

勸酒

以下出文苑英華

昨與美人對尊酒。	朱顏如花腰似柳。	今與美人傾一杯。	秋風颯颯頭上來。
年光似水向東去。	兩鬢不禁白日催。	東鄰起樓高百尺。	璇題照日光相射。
珠翠無非二八人。	盤筵何啻三千客。	鄰家儒者方下帷。	夜誦古書朝忍饑。
身年三十未入仕。	仰望東鄰安可期。	一朝逸翮乘風勢。	金榜高張登上第。
春闈未了冬登科。	九萬搏風誰與繼。	不逾十稔居台衡。	門前車馬紛縱橫。
人人仰望在何處。	造化筆頭雲雨生。	東鄰高樓色未改。	主人云亡息猶在。
金玉車馬一不存。	朱門更有何人待。	牆垣反鎖長安春。	樓臺漸漸屬西鄰。
松篁薄暮亦棲鳥。	桃李無情還笑人。	憶昔東鄰宅初構。	雲甍彩棟皆非舊。

瑋瑋筵前翡翠樓。芙蓉池上鴛鴦鬪。日往月來凡幾秋。一衰一盛何悠悠。

但教帝里笙歌在。池上年年醉五侯。

南陽小將張彥破口鎮稅人場射虎歌

海內昔年狎太平。橫目穰穰何崢嶸。天生天殺豈天怒。忍使朝朝餵猛虎。

關東驛路多丘荒。行人最苦稅人場。張彥雄特制殘暴。見之叱起如叱羊。

鳴絃霹靂越幽阻。往往依林猶旅拒。草際旋看委錦茵。腰閒不更抽白羽。

老饕已斃衆雞恐。童穉擲揄皆自勇。忠良效順勢亦然。一劍猜狂敢輕動。

有文有武方爲國。不是英雄伏不得。試徵張彥作將軍。幾箇將軍願策勳。

陰雨

潤葉濡枝浹四方。濃雲來去勢何長。曠然寰宇清風滿。救旱功高暑氣涼。

喜雨

西北油然雲勢濃。須臾霽沛雨飄空。頓疎萬物焦枯意。定看郊秋稼穡豐。

過故洛城

故城門前春日斜。故城門裏無人家。市朝欲認不知處。漠漠野田飛草花。

詔失婢勝

出唐詩紀事

宅院小牆卑。坊門帖榜遲。舊恩慙自薄。前事悔難追。籠鳥無常主。風花不戀枝。今宵在何處。惟有月明知。

江南喜逢蕭九徹因話長安舊遊贈五十韻

出才調集

憶昔嬉遊伴。多陪歡宴場。寓居同永樂。幽會共平康。師子尋前曲。聲兒出內坊。花深態奴宅。竹錯得憐堂。庭晚開紅藥。門閑蔭綠楊。經過悉同巷。居處盡連牆。時世高梳髻。風流澹作妝。戴花紅石竹。帔暈紫檳榔。鬢動懸蟬翼。釵垂小鳳行。拂胸輕紛絮。煖手小香囊。選勝移銀燭。邀歡舉玉觴。爐煙凝麝氣。酒色注鵝黃。急管停還奏。繁絃慢更張。雪飛迴舞袖。塵起繞歌梁。舊曲翻調笑。新聲打義揚。多情推阿軟。巧語許秋孃。風暖春將暮。星迴夜未央。宴餘添粉黛。坐久換衣裳。結伴歸深院。分頭入洞房。綵帷開翡翠。羅薦拂鴛鴦。畱宿爭牽袖。貪眠各占牀。綠窗籠水影。紅壁背燈光。索鏡收花鈿。邀人解袷襠。暗嬌妝靨笑。私語口脂香。怕曉聽鐘坐。羞明映綬藏。眉殘蛾翠淺。鬢解綠雲長。聚散知無定。憂歡事不常。離筵開夕宴。別騎促晨裝。去住青門外。畱連滻水傍。車行遙寄語。馬駐共相望。雲雨分何處。山川共異方。野行初寂寞。店宿乍栖惶。別後嫌宵永。愁來厭歲芳。幾看花結子。頻見露爲霜。歲月何超忽。音容坐渺茫。往還書斷絕。來去夢遊揚。

自我辭秦地。逢君客楚鄉。常嗟異岐路。忽喜共舟航。話舊堪垂淚。思鄉數斷腸。
 愁雲接巫峽。淚竹近瀟湘。月落江湖闊。天高節候涼。浦深煙渺渺。沙冷月蒼蒼。
 紅葉江楓老。青燕驛路荒。野風吹蟋蟀。湖水浸菰蔣。帝路何由見。心期不可忘。
 舊遊千里外。往事十年強。春晝提壺飲。秋林摘橘嘗。強歌還自感。縱飲不成狂。
 永夜長相憶。逢君各共傷。殷勤萬里意。并寫贈蕭郎。

贈薛濤 出張爲 主客圖

蛾眉山勢接雲霓。

欲逐劉郎北路迷。

若似剡中容易到。

春風猶隔武陵溪。

酬令狐畱守尚書見贈十韻 以下出錢氏 絳雲樓藏本

長慶清風在。夔龍愛理餘。太和膏雨降。周邵保釐初。嵩少當官署。伊瀍入禁渠。
 曉關開玉兔。夕鑰納銀魚。舊眷憐移疾。新吟念索居。離聲雙白鸚。行色一籃輦。
 罷免無餘俸。休閒有敝廬。慵於嵇叔夜。渴似馬相如。酒每蒙酤我。 詩鄭箋云。酤。賣也。音沽。

聽蘆管

幽咽新蘆管。淒涼古竹枝。似臨猿峽唱。疑在鴈門吹。調爲高多切。聲緣小乍遲。
 麤豪嫌盛築。細妙勝參差。雲水巴南客。風沙隴上兒。屈原收淚夜。蘇武斷腸時。

仰秣胡駒聽。驚棲越鳥知。何言胡越異。聞此一同悲。

送滕庶子致仕歸婺州

春風秋月攜歌酒。八十年來翫物華。已見曾孫騎竹馬。猶聽侍女唱梅花。
 入鄉不杖歸時健。出郭乘輶到處誇。兒著繡衣身衣錦。東陽門戶勝滕家。

送劉郎中赴任蘇州

仁風膏雨去隨輪。勝境歡遊到逐身。水驛路穿兒店月。花船棹入女湖春。
 宣城獨詠窗中岫。柳惲單題汀上蘋。何似姑蘇詩太守。

吟詩相繼有三人。 領吳郡日。劉嘗贈予詩云。蘇州刺史例能。西掖今來替左司。故有三人之戲耳。

福先寺雪中餞劉蘇州

送君何處展離筵。大梵王宮大雪天。庾嶺梅花落歌管。謝家柳絮撲金田。
 亂從紈袖交加舞。醉入籃輦取次眠。卻笑召鄒兼訪戴。只持空酒駕空船。

除夜言懷兼贈張常侍

三百六旬今夜盡。六十四年明日催。不用歎身隨日老。亦須知壽逐年來。
 加添雪興憑氈帳。消殺春愁付酒杯。唯恨詩成君去後。紅箋紙卷爲誰開。

送張常侍西歸

二年花下為閒伴。一旦樽前棄老夫。西午橋街行悵望。南龍興寺立踟躕。此身應不離東都。

和河南鄭尹新歲對雪

白雪吟詩鈴閣開。故情新興兩徘徊。昔經勤苦照書卷。今助歡娛飄酒杯。又有詩人作尹來。

吹笙內人出家

雨露難忘君念重。電泡易滅妾身輕。金刀已剃頭然髮。佛教云。若救頭然。道場夜半香花冷。

猶在燈前禮佛名

醉中見微之舊卷有感

今朝何事一霑襟。檢得君詩醉後吟。老淚交流風病眼。春箋搖動酒杯心。更無消息到如今。

壽安歇馬重吟

春衫細薄馬蹄輕。一日遲遲進一程。野棗花含新蜜氣。山禽語帶破袍聲。櫻桃欲熟筍應生。

贈張處士山人

蘿襟蕙帶竹皮巾。雖到塵中不染塵。每見俗人多慘澹。惟逢美酒即殷勤。

池畔閒坐兼呈侍中

池畔最平處。樹陰新合時。移牀解衣帶。坐任清風吹。舉棹鳥先覺。垂綸魚未知。

初冬即事憶皇甫十

冷竹風成韻。荒街葉作堆。欲尋聯句卷。先飲煖寒杯。帽為迎霜戴。爐因試火開。

小庭寒夜寄夢得

庭小同蟬舍。門閒稱雀羅。火將燈共盡。風與雪相和。老睡隨年減。衰情向夕多。

西還壽安路西歇馬

槐陰歇鞍馬。柳絮惹衣巾。日晚獨歸路。春深多思人。去家纔百里。為客只三旬。

雨中訪崔十八

肩舁仍挈榼。莫怪就君來。秋雨經三宿。無人勸一杯。

夢得得新詩

池上今宵風月涼。閒教少樂理霓裳。集仙殿裏新詞到。便播笙歌作樂章。

初見劉二十八郎中有感

欲話毘陵君反袂。欲言夏口我霑衣。誰知臨老相逢日。悲歎聲多語笑稀。

夜題玉泉

遇客多言愛山水。逢僧盡道厭羸塵。玉泉潭畔松閒宿。要且經年無一人。

拜表早出贈皇甫賓客

一月一回同拜表。莫辭侵早過中橋。老於君者應無數。猶趁西京十五朝。

贈鄭尹

府池東北舊亭臺。久別長思醉一回。但請主人空掃地。自攜杯酒管絃來。

別楊同州後卻寄

潘驛橋南醉中別。下邳邨北醒時歸。春風怪我君知否。榆葉楊花撲面飛。

狐泉店前作

野狐泉上柳花飛。逐水東流便不歸。花水悠悠兩無意。因風吹落偶相依。

贈盧績

餘杭縣裏盧明府。虛白亭中白舍人。今日相逢頭似雪。一杯相勸送殘春。

與裴華州同過敷水戲贈

使君五馬且踟躕。馬上能聽絕句無。每過桑閒試畱意。何妨後代有羅敷。

閒遊

欲笑隨情酒逐身。此身雖老未辜春。春來點檢閒遊數。酒自多於年少人。

招韜光禪師

白屋炊香飯。葷膾不入家。瀘泉澄葛粉。洗手摘藤花。青芥除黃花。紅薑蒂紫芽。

命師相伴食。齋罷一甌茶。

和柳公權登齊雲樓

樓外春晴百鳥鳴。樓中春酒美人傾。路傍花日添衣色。雲裏天風散珮聲。

向此高吟誰得意。偶來閒客獨多情。佳時莫起興亡恨。遊樂今逢四海清。

毛公壇

毛公壇上片雲閒。得道何年去不還。千載鶴翎歸碧落。五湖空鎮萬重山。

靈巖寺

館娃宮畔千年寺。水閣雲多客到稀。聞說春來更惆悵。百花深處一僧歸。

白雲泉

天平山上白雲泉。雲自無心水自閒。何必奔衝山下去。更添波浪向人閒。

寄韜光禪師

出東坡題跋。

一山門作兩山門。兩寺原從一寺分。東澗水流西澗水。南山雲起北山雲。

前臺花發後臺見。上界鐘聲下界聞。遙想吾師行道處。天香桂子落紛紛。

和夢得夏至憶蘇州呈盧賓客

以下出泰與李氏手校宋本。

憶在蘇州日。常諳夏至筵。糗香筒竹嫩。炙脆子鵝鮮。水國多臺榭。吳風尚管絃。

每家皆有酒。無處不過船。交印君相次。褰帷我在前。此鄉俱老矣。東望共依然。

子與劉盧三人。前後相次典蘇州。今同分司。老於洛下。 洛下麥秋月。江南梅雨天。齊雲樓上事。已上十三年。

曲江

細草岸西東。酒旗搖水風。樓臺在花杪。鷗鷺下煙中。翠幄晴相接。芳洲夜暫空。

何人賞秋景。興與此時同。

歲夜詠懷兼寄思黯

徧數故交親。何人得六句。與思黯夢得。數還論沒者。少過得六十一。 今年已入手。餘事豈關身。老自無多興。

春應不揀人。陶窗與弘閣。風景一時新。

寒食日過棗糲店

寒食棗糲店。春低楊柳枝。酒香畱客住。鶯語和人詩。困立攀花久。慵行上馬遲。

若為將此意。前字與僧期。

宿張雲舉院

不食胡麻飯。杯中自得仙。隔房招好客。可室致芳筵。美醞香醪嫩。時新異果鮮。

夜深唯畏曉。坐穩不思眠。棊罷嫌無敵。詩成媿在前。明朝題壁上。誰得衆人傳。

惜花

可憐天豔正當時。剛被狂風一夜吹。今日流鶯來舊處。百般言語泥空枝。

七夕

煙霄微月澹長空。銀漢秋期萬古同。幾許歡情與離恨。年年并在此宵中。

宿誠禪師山房題贈

不出孤峰上。人閒四十秋。視身如傳舍。閱世任東流。法爲因緣立。心從次第修。

中宵問真偈。有住是吾憂。

新池

數日自穿鑿。引泉來近陂。尋渠通咽處。繞岸待清時。深好求魚養。閒堪與鶴期。幽聲聽難盡。入夜睡常遲。

南池

蕭條微雨絕。荒岸抱清源。入舫山侵塞。分泉道接邨。秋聲依樹色。月影在蒲根。淹泊方難遂。他宵關夢魂。

宿池上

泉來從絕壑。亭敞在中流。竹密無空岸。松長可絆舟。蟪蛄潭上夜。河漢島前秋。異夕期新漲。攜琴卻此遊。

翻經臺

出咸淳臨安志。

一會靈山猶未散。重翻貝葉有來由。是名精進纔開眼。巖石無端亦點頭。

寄題上强山精舍寺

出王象之輿地紀勝。今湖州石刻尚存。

慣遊山水住南州。行盡天台及虎丘。惟有上强精舍寺。最堪遊處未曾遊。

句二

學織繚綾功未多。亂投機杼錯拋梭。莫教宮錦行家見。把此文章殺笑他。

如今不重文章事。莫把文章誇向人。

盧氏雜語云。盧氏子合下第。步出都門。投逆旅。有一人續至。吟詩云云。盧愕然。憶是白居易詩。問之。曰。某世織

綾錦。以薄藝投本行。皆云如今花樣與前不同。且東歸去。

白樂天詩後集卷二十 補遺 卷下

雜體連句 凡三十首

七老會詩

刑部尚書致仕太原白居易 年七十 四并序

胡吉劉鄭盧張等六賢。皆多年壽。余亦次焉。偶於東都敝居履道坊。合成尚齒之會。七老相顧。既醉且歡。靜而思之。此會希有。因各賦七言六韻詩一章以紀之。或傳諸好事者。會昌五年三月二十四日。於白家履道宅同宴。宴罷賦詩。時祕書監狄兼謩。河南尹盧貞。以年未七十。雖與會而不及列。

七人五百八十四。拖紫紆朱垂白鬚。手裏無金莫嗟歎。尊中有酒且歡娛。
吟成六韻神還壯。飲到三杯氣尚麤。鬼峨狂歌教婢拍。婆娑醉舞遣孫扶。
天年高過二疏傅。人數多於四皓圖。除卻三山五天竺。三仙山。五天竺。多老壽者。

人閒此會更應無。

九老圖詩并序

會昌五年三月。胡吉。劉。盧。張等六賢。於東都。敝居履道坊。合尚齒之會。其年夏。又有二老。年貌絕倫。同歸故鄉。亦來斯會。續命書姓名年齒。寫其形貌。附於圖右。與前七老。題爲九老圖。仍以一絕贈之。

洛中遺老李元爽 年一百三十六

歸洛僧如滿 年九十五

雪作鬚眉雲作衣。 遼東華表暮雙歸。 當時一鶴猶希有。 何況今逢兩令威。

一字至七字詩

白居易賦詩

詩。綺美。瓊奇。明月夜。落花時。能助歡笑。亦傷別離。調清金石怨。吟苦鬼神悲。天下只應我愛。世閒唯有君知。自從都尉別蘇句。便到司空送白辭。

宴興化池亭送白二十二東歸聯句

東洛言歸去。西園告別來。白頭青眼客。池上手中杯。離瑟殷勤奏。仙舟委曲回。

征輪今欲動。賓閣爲誰開。坐弄琉璃水。行登綠褥苔。花低妝照影。萍散酒吹醅。

岸蔭新抽竹。亭香欲變梅。隨遊多笑傲。遇勝且徘徊。澄澈連天鏡。潺湲出地雷。

林塘難共賞。鞍馬莫相催。信及魚還樂。機忘鳥不猜。晚晴槐起露。新暑石添苔。

擬作雲泥別。猶思頃刻陪。歌停珠貫斷。飲罷玉峰頹。雖有消搖志。其如磊落才。

會當重入用。此去肯悠哉。

首夏猶清和聯句

記得謝家詩。清和卽此時。餘花數種在。密葉幾重垂。芳謝人人惜。陰成處處宜。

水萍爭點綴。梁燕共追隨。亂蝶憐疎蘂。殘鶯戀好枝。草香殊未歇。雲勢漸多奇。

單服初寧體。新篁已出籬。與春爲別近。覺日轉行遲。繞樹風光少。侵階苔蘚滋。

唯思奉歡樂。長得在西池。

薔薇花聯句

似錦如霞色。連春接夏開。波紅分影入。風好帶香來。得地依東閣。當階奉上台。

淺深皆有態。次第暗相催。滿地愁英落。緣堤惜權回。芳濃濡雨露。明麗隔塵埃。

似著胭脂染。如經巧婦裁。奈花無別計。只有酒殘杯。

西池落泉聯句

東閣聽泉落。能令夜興多。散時猶帶沫。涼處卻跳波。偏洗磷磷石。還驚泛泛鵝。

居易 色青塵不染。光白月相和。再錫噴雪縈松竹。攢珠濺菱荷。籍對吟時合響。觸樹更搖柯。

杏園聯句

杏園千畝欲隨風。醉上一醉同人此暫同。司空老態忽忘絲鬢裏。衰顏宜解酒杯中。
絳上白曲江日暮殘紅盡。主客翰苑年深舊事空。居易上二十四年流落者。

故人相引到花叢。再

花下醉中聯句

共醉風光地。花飛落酒杯。絳送二殘春猶可賞。晚景莫相催。再錫送
酒幸年年有。花應歲歲開。居易送兵且當金韻擲。莫遣玉山頹。絳送
高會彌堪惜。良時不易陪。承宜送誰能拉花住。爭換得春回。再錫送
我輩尋常有。佳人早晚來。嗣復送寄言三相府。欲散且徘徊。居易時戶部

喜遇劉二十八偶書兩韻聯句

病來佳興少。老去舊遊稀。居易笑語縱橫作。杯觴絡繹飛。再錫清談如冰玉。逸韻貫珠璣。
高位當金鉉。虛懷似布衣。居易已榮狂取樂。仍任醉忘機。捨眷將何適。畱歡便是歸。
風儀常欲附。蛟力自知微。願假尊壘末膺門自此依。

劉二十八自汝赴左馮塗經洛中相見聯句

不歸丹掖去。銅竹漫云云。居易唯喜因過我。須知未賀君。詩開安石詠香見令公熏。
欲首函關路。來披緹嶺雲。貂蟬公獨步鴛鴦我同羣。插羽先飛酒交鋒便戰文。
鎮嵩知表德。定鼎為銘勳。顧鄙容商洛徵歡候汝墳。頻年多謔浪此夕任喧紛。
故態猶應在。行期未要聞。遊藩榮已久捧袂惜將分。詎厭杯行疾唯愁日向曛。
窮陰初莽蒼。離思漸氤氳。殘雪午橋畔斜陽伊水濱。上謨尊右掖全略靜東軍。
萬頃徒稱量。滄溟詎有垠。

予自到洛中與樂天為文酒之會時時構詠樂不可支則慨然共憶夢得而夢得亦分司至止歡愜可知因為聯句

成周文酒會。吾友勝鄒枚。唯憶劉夫子而今又到來。居易欲迎先倒屣。一座便傾杯。
飲許伯倫石。詩推公幹才。竝以久曾聆郢唱。重喜上燕臺。晝話牆陰轉
宵歡斗柄迴。新聲還共聽。故態復相哈遇物皆先賞。從花半未開。起時烏帽側
散處玉山頹。墨客喧東閣。文星犯上台詠吟君稱首。疎放我為魁。憶戴何勞訪
時夢得分詞鋒不可摧。此兩韻美畱髡不用猜。宴席上老夫暫起奉觴承麴蘖。落筆捧瓊瑰。醉弁無妨側
司而來詞鋒不可摧。此兩韻美畱髡不用猜。樂天密坐不動足水軒看翡翠。石徑踐莓苔。童子能騎竹佳人解詠梅。

陪遊南宅之境。

洛中三可矣。鄴下七悠哉。

自向風光急。

不須絃管催。

居易樂觀魚踴躍。

閒愛鶴徘徊。

度煙柳青凝黛。

波萍綠撥醅。

禹錫春榆初改火。

律管又飛灰。

紅藥多遲發。

碧松宜亂栽。

度馬嘶馳陌上。

鷓泛鳳城隈。

色色時堪借。

步步病莫推。

禹錫涸流尋軋軋。

餘刃轉恢恢。

從此知心伏。

無因敢自媒。

居易室隨親客入。

席許舊寮陪。

逸興嵇將阮。

交情陳與雷。

此二句屬夢得也。

禹錫洪爐思哲匠。

大厦要羣材。

他日登龍路。

應知免曝顯。

秋霖卽事聯句三十韻

居易蕭索窮秋月。

蒼茫苦雨天。

泄雲生棟上。

行潦入庭前。

送上高響愁晨坐。

苔色侵三徑。

波聲想五絃。

井蛙爭入戶。

轍鮒亂歸泉。

送上散漫疎還密。

禹錫空濛斷復連。

空階警夜眠。

鶴鳴猶未已。

起蟻穴亦頻遷。

送上池添水馬憐。

居易有苗霑叢露。

無月弄潺湲。

禹錫籬菊潛開秀。

荷滴白珠圓。

起地濕灰蛾滅。

孤嘯聳蒼肩。

居易橋柱黏黃菌。

牆衣點綠錢。

草荒行藥路。

園蔬已罷鮮。

起斷行隨鴈翅。

高入榻且懸。

此思劉白之來也。

披霧邈無緣。

以答懸懸之召。

沙泛釣魚船。

起長者車猶阻。

趨風誠有戀。

蓋灑高松上。

絲繁細柳邊。

玉爵幾時傳。

近井桐先落。

禹錫當檐石欲穿。

急景暗彫年。

人多蒙翠被。

馬盡著連乾。

起拂叢時起蝶。

庖薪濕起煙。

禹錫鳴雞潛報曉。

蓋灑高松上。

絲繁細柳邊。

玉爵幾時傳。

居易廩米陳生醜。

隨葉乍驚蟬。

禹錫巾角皆爭墊。

裙裾別似瀟。

人多蒙翠被。

馬盡著連乾。

起好客無來者。

貧家但悄然。

禹錫濕泥印鶴迹。

漏壁絡蝸涎。

蚊聚雷侵室。

鷗翻浪滿川。

上樓愁霧羃。

繞舍厭濺濺。

禹錫律候今秋矣。

歎娛久曠焉。

但令高興在。

晴後奉周旋。

喜晴聯句

居易苦雨晴何喜。

喜多於雨時。

氣收雲物變。

聲樂鳥鳥知。

送上白日開天路。

起蕙泛光風圃。

蘭開皎月池。

千峰分遠近。

送上九陌好追隨。

青蕪濕更滋。

禹錫白日開天路。

玄陰卷地維。

餘清在林薄。

新照入漣漪。

居易碧樹涼先落。

青蕪濕更滋。

禹錫白日開天路。

玄陰卷地維。

舞去商羊速。

飛來野馬遲。

居易柱邊無潤礎。

臺上有遊絲。

禹錫白日開天路。

玄陰卷地維。

宮城開睥睨。

觀闕麗采芻。

居易洛水澄清鎮。

嵩煙展翠帷。

禹錫白日開天路。

玄陰卷地維。

藉草風猶暖。

攀條露已晞。

居易屋穿添碧瓦。

牆缺召金鎚。

禹錫白日開天路。

玄陰卷地維。

霞文晚煥爛。

星移夕參差。

居易爽助門庭肅。

寒摧草木衰。

禹錫白日開天路。

玄陰卷地維。

假蓋閒誰惜。

彈絃燥更悲。

居易散蹄良馬穩。

炙背野人宜。

禹錫白日開天路。

玄陰卷地維。

推林出書目。

傾筥上衣施。

居易道路行非阻。

軒車望可期。

禹錫白日開天路。

玄陰卷地維。

山閣蓬萊客。

古以祕書喻蓬萊。

居易儲宮羽翼師。

此言少傳。

禹錫白日開天路。

玄陰卷地維。

以酬圭寶之言。

禹錫甌景方搔首。

懷人尙斂眉。

因吟仲文什。

高興盡於斯。

會昌春連宴卽事

元年寒食日。上已暮春天。居易雞黍三家會。鶯花二節連。再錫光風初澹蕩。美景漸暄妍。

簪組蘭亭上。車輿曲水邊。居易松聲添奏樂。草色助鋪筵。再錫雀舫宜閑泛。螺杯任漫傳。

園蔬香帶露。厨柳暗藏煙。居易麗句輕珠玉。清談勝管絃。再錫陌暄金距鬪。樹動綵繩懸。

姍女妝梳豔。遊童衣服鮮。居易圃香知種蕙。池暖憶開蓮。再錫怪石雲疑觸。天桃火欲然。

正歡唯恐散。雖醉未思眠。居易嘯傲人閒世。追隨地上仙。再錫燕來雙涎涎。鴈去累翩翩。

行樂真吾事。尋芳獨我先。居易滯周慙太史。太史公語滯周南。今榮示慙古人矣。入洛繼先賢。此言劉白聲價。與二陸爭長矣。望重青雲客。情深白首年。

昔恨多分手。今歡謬比肩。居易病猶陪讌飲。老更奉周旋。起斷金多感激。倚玉貴遷延。

偏嘗珍饌後。許入畫堂前。居易舞袖翻紅炬。歌鬢插寶蟬。起興伴王尋戴。謂隨僕射過尚書也。實藝皆三捷。虛名媿六聯。

說史吞顏注。論詩笑鄭箋。居易松筠寒不變。膠漆冷彌堅。起與蘭猶舉白。話靜每思玄。更記歸時好。亭亭月正圓。

榮同隗在燕。謂白僕射起來示有三春向晚四者難并之說。誠哉是言。輒引起題。重為聯句。

興關猶舉白。話靜每思玄。更記歸時好。亭亭月正圓。起疲兵再戰。勅敵難降。下筆之時。輒然自哂。走呈僕射。兼簡尚書。劉禹錫

三春今向晚。四者昔難并。居易借問低眉坐。何如攜手行。起舊遊多過隙。新宴且尋盟。

鸚鵡林須樂。麒麟閣未成。再錫分陰當愛惜。遲景好逢迎。林野熏風起。樓臺穀雨晴。

鷓鴣低山半出。池廣水初平。居易橋轉長虹曲。舟回小鷁輕。起殘花猶布繡。密竹自聞笙。

欲過芳菲節。難忘宴慰情。居易月輪行似箭。時物始如傾。再錫見鴈隨兄去。聽鶯求友聲。

蕙長書帶展。菰嫩剪刀生。居易坐密衣裳煖。堂虛絲管清。再錫峰巒侵碧落。草木近朱明。

與點非沂水。陪膺是洛城。居易白為三川守。故云。新命寵春卿。再錫有喜鵲頻語。無機鷗不驚。起青林思小隱。

何人喚解醒。舊儀尊右相。居易登高賴九城。鄼侯司管鑰。疏傳傲簪纓。綸綍會同掌。

白雪仰芳名。訪舊殊千里。居易書殿忝連衡。蘭室春彌馥。松心晚更貞。琴招翠羽下。

煙霽即上征。冊庭嘗接武。居易誰能避兕觥。方知醉兀兀。應是走營營。鳳閣鸞臺路。

從他年少爭。更呈二公。樂天是月長齋。鄙夫此時愁臥。里閭非遠。雲霧難披。因以寄懷。遂為聯句。

所期解悶。焉敢驚禪。夢得五月長齋月。文心苦行心。夢得蘭蕙不入戶。薜蘿自成林。樂天護戒先辭酒。嫌喧亦撤琴。

塵埃賓位靜。香火道場深。夢得我靜馴狂象。餐餘施衆禽。定知於佛佞。豈復向書淫。

蘭藥凋紅豔。庭槐換綠陰。樂天風光徒滿目。雲霧未披襟。樹為清涼倚。池因盥漱臨。


蘋芳遭燕拂。蓮坼待蠶尋。樂天舍下環流水。窗中列遠岑。苔斑錢剝落。石怪玉嶽岑。

夢得 鵲頂迎秋禿。鶯喉入夏瘡。綠楊垂嫩色。縹棘露長鍼。樂天 散秩身猶幸。趨朝力不任。
樂天 官將方共拙。年與病交侵。徇樂非時選。忘機似陸沈。鑒容稱四皓。捫腹有三壬。
樂天 攜手慙連璧。同心許斷金。紫芝雖繼唱。前後各在賓客。 白雪少知音。夢得 憶罷吳門守。
樂天 相逢楚水潯。舟中頻曲宴。夜後各加樹。濁酒銷殘漏。絃聲閒遠砧。造次必相箴。樂天 酡顏舞長袖。
夢得 密坐接華簪。持論峰巒峻。戰文矛戟森。笑言誠莫逆。陰魄初離畢。將有雨。 往事應如昨。
五月之節。 餘歡迄至今。迎君常倒屣。訪我輒攜衾。待公休一食。縱飲共狂吟。陽光正在參。

白樂天詩集終

(出版會承認イ 190151 號)

昭和十八年九月十日印刷
昭和十八年九月十五日發行



全八卷 定價金六拾圓 賣價六拾三圓
特別行爲稅三圓

編者 佐久節
 發行者 東京都神田區駿河臺町三ノ七一
 井田宗一
 (出版會員一〇二五〇三番)
 印刷者 東京都神田區松住町一
 眞保三郎
 (東東一五三四)

發行所 株式會社 井田書店
 東京都神田區駿河臺町三ノ七
 東京神田區淡路町二ノ九
 日本出版配給株式會社

配給元

#11125

